

ASO FARAILE, 26 FEPUARI 2021

Na nofoia e le Fofoga Fetalai le Nofoa i le itula e 9:12 i le taeao.

Tatalo.

FOFOGA FETALAI: Ou te faasilasila atu ua toe amatalia Taulumaga a le Fono Aoao Faitulafono.

Ia, avea ia lenei avanoa ou te faatalofa atu ai ma le agaga faaaloalo i lau Afioga i le Palemia ma le Kapeneta aemaise o sui usufono filifilia o lenei Palemene. Malo le soifua malo le lagi e mama.

TUUINA ATU O PEPA

Na tolauluina e le Failautusi le Faasologa o le Tuuina atu o Pepa e tusa ai ma T.T.49(2).

1. S.R.2021/6, Tulafono e Fuafua Tatau ai le Ava Malosi 2020 – Faasilasilaga o le Amata Faamamaluina.
2. S.R.2021/7, Faasilasilaga o Suiga i le Tulafono Laitiiti o Fale i Samoa 2017 ma le aso e Amata Faamamaluina ai.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2020/2021 – felafolafoaiga faaauau i luga o le
faitauga faalua – Aso 27**

FOFOGA FETALAI: E tolopo Galuega a le Fono Aoao i le po anapo o lo o saunoa le Afioga i le Minisita o le Soifua Maloloina.

Ma lou faaaloalo ou te tapa ai ma le faaaloalo lau Afioga i le Taitai o le Malo mo lau saunoaga Faa-Minisita.

26 FEPUARI 2021

SAUNOAGA FAA-MINISITA A LE AFIOGA I LE PALEMIA
Susuga Hon Tuilaepa Auelua Fatialofa Lupesoliai Lolofietele Neioti
Aiono Galumalemana Dr. Sailele Malielegaoui

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, ou te tulai atu ma le agaga faaaloalo e faatulou ma faatalofa atu foi i le mamalu o le tatou Palemene nei, i le afio o lau Afioga i le Fofoga Fetalai faapea foi le maleifua mai o sui usufono mamalu o le Fono Aoao Faitulafono.

E faatulou foi ma faatalofa atu i le tapuaiga i le mamalu o le tatou atunuu. Muamua i paia faale-Malo, i le tapuai leleoa a le Afioga i Le Ao Mamalu a lo tatou Malo, le Afioga i le Sui Tofia faapea foi le paia i le itutino o le Faamasinoga, ae a le tapuaiga i le mamalu o le tatou atunuu i ona tulaga faalupe. Aiga ma latou Tama, faapea foi le usoga a Tumua ma Puleono i Salafai. E faapea foi le faanonogamanu a auauna a le Atua.

A ua ou tulai atu i lau Afioga i le Fofoga Fetalai, ona ou te manatu foi e tatau ona avatu se upu ia te au o le Taitai o le Maota. O lenei ua agai atu ina faaiuiu le tatou Fonotaga, a maea saunoaga a Minisita ona faasolosolo atu ai lea i le auiliiliina o le tatou Tala Faatatau Faaopoopo o le Tupe, ona agai ai loa lea i tatou Tulafono ma tatou malolo ai lea, ma faataape loa le Palemene ma fai ai le sauniga mamalu faapitoa e afio mai ai le Afioga i Le Ao Mamalu o le Malo e fai foi sana upu faafetai i a outou Afioga a o le i toe taliu atu i itumalo e tapenapena mo le faiga filifiliga a Samoa. Ua agai ai le Kapeneta i le tulaga e fulisia i le tolaulauina o latou galuega sa faatino i lenei tausaga po o lenei vaitau o le Nofoaiga, ina ia faatino upu o lo o taiala i Faigamalo lelei. E manino mea uma. O le a foi la se matau ua tau fai si lautele atu o mataupu o lo o talanoa atu ai Minisita, ia sala i le lautele, ona e leai se mea e leaga ai le mea o le faamalamalama. O lea foi e taumafai pe a manatunatu i le po anapo sa ou tuualalo atu ai faalauaitetele i le Minisita e agai loa le saunoaga i tiute o lo o feagai ai ma le Matagaluega. Ma o lau tuualalo foi lena i Minisita o lo o totoe, ia 99% o a outou saunoaga o totoe ia agai ia talatalapipi mai galuega o lo o feagai ma outou aua le faafogafoga malamalama a lo tatou atunuu. E le o se mea leaga foi le faamalamalama ia malamalama le atunuu. O upu foi e fai i le tatou Maota lenei, e le milia faauu upu o le Maota lenei.

26 FEPUARI 2021

Saunoaga Faa-Minisita a le Afioga i le Palemia

Lau Afioga i le Fofoga Fetalai, e faamalulu atu. O le a foi se matau, e i ai taimi e siisii ai finagalo o le Maota lenei, sala ina siisii, leaga o le faalupega lena o galuega tatou te fai. Lau Afioga i le Fofoga Fetalai, faamalo atu le onosai, ona e toatasi le Nofoa ae toatele matou. E sili atu ona taofiofigata Fonotaga a Nofoaiga sa ou auai. Ma o lea ou te tau manatua ua 9 ai au Nofoaiga i totonu o le Maota lenei, i le taimi sa tai-tolu ai tausaga seia tau mai i le 1991 ona tai 5 loa lea o tausaga. O lea la a oo atu i le isi Paeaiga o lea ua finagalo tama o le itumalo e toe faafoi mai au e aunoa ma se palota, ou te faalo i le tofamamao a Tapaau o Lepa faapea foi le tausiga a Fatialofa ma Auelua o Tama Punefu o Tulaniu o Atua, ae a le fetalaiga ia Malielegaoi ma lona Faleatua ma Salefao. Afai la ua 9 au Nofoaiga, 10, e tatau ona faapea ane, ua lava foi si ou malamalama, ua tau maua si ou malamalama i taualumaga o Fonotaga i lona faagasolo mai i Nofoaiga ua tuanai. E le milia faauu ai upu. O le masani lea, o le tu lea a Samoa. E oo loa ina faasoa taumafa, o le taimi lea e pisa ai le nuu, ua pisapisao. Ia ma o le isi e valaau mai lava, se tuuga o ai, se tuuga o ai, se tuuga o ai. Ae a oo loa ina faasoa le manifata, na ona ooti lava velo, tulou. A alu atu lava e tau i le fatafata o le taulealea o le aiga palasi i lalo i le palapala, e ave lava fufulu fai ai taumafa. Ou te talanoa atu i a tatou tu ma a tatou aga. Lau Afioga i le Fofoga Fetalai, e oo loa ina faasoa taumafa, o upu ia, tulou lava. Se pupula mata, pupula mata ua fai meaai. Ia ma pisapisao ai lava ina ne i te i ua i ai se isi e leai sana faalumaga.

O le faavae foi lena o lea e faasoa ai manū i totonu o le Maota lenei, e lagalaga finagalo o sui usufono, ae tapui lava i a tatou tu ma tatou agaifanua. Ona faapea ai lea o upu, e ui lava ina tetele a pesega e pei o upu e fai ia Faleata, ae matua lava i le oō. O aga ia faaleaganuu. O le a foi la se matau mai a i latou e le o malamalama, e faapena aga a le Maota lenei.

I le taimi na ou sau ai au ma ou maua mai toeaia matutua, e matua maoae upu. E le i taitai oo i ai upu a le Maota lenei. Fai mai le saunoaga a le isi sui usufono, “Le sui usufono lea o Lepa, tago e aofai uma lava au numera ae ave e fafaga ai matai o lou itumalo.” Se i vaai i le maoae o upu? A o upu ia ua masani ai toeaia. Toe fai mai le isi toeaia ia te au, “Le sui usufono lea mai Lepa, tulou lava, aua ne i toe ee mai lou atoato ia te au.” E maoae upu. O le a lau tali? Ia ona ou tu ae foi lea o au ma ou faapea mai, “Ua lelei, o le a ou faia lou finagalo, ae aua foi la e te faapena mai ia te au.” Ia ma fai foi nai au upu. Lau Afioga i le Fofoga Fetalai o aga na a le tatou Palemene.

26 FEPUARI 2021

Saunoaga Faa-Minisita a le Afioga i le Palemia

O le ala lea ou te faamalulu atu ai i lau Afioga i le Nofoa, le Fofoga Fetalai, ia po o taimi foi e tulai mai ai le Sui Fofoga Fetalai. O le Maota

lenei, e eseese taleni, ae o lo o i ai le agavaa. E eseese foi uiga. O isi e matua tumu i le naunau, le naunau lea e fia molimoli mai le sao. E molimoli mai le sao i le fausia o le fale o Samoa. Aisea? Leaga o le fale e fai ai upu. O a upu? O le fale o Samoa e fautele.

Lau Afioga i le Fofoga Fetalai, e faapena o tatou uiga, uiga faa-matai. A tatou omai i totonu o le Maota lenei, e tele le naunau, e oo ai foi lava ina faaaoga gagana tuusao, gagana tuusao ina ia malamalama ai se mataupu.

Lau Afioga i le Fofoga Fetalai, sa ou talanoa atu, e tele taleni, e tele le ituaiga tomai, e tele foi le tofa lea e i ai i totonu, o le tofa faaleaganuu. O le a le uiga o lea mea? O le tofa faaleaganuu na fausia ae i totonu o nuu. E mafai ona ou faapea atu, o saienitisi ia o mataupu tau Malo. Leaga o Malo o tagata, o upufai o Malo e agai tonu lava i le pulea o amio a tagata ina ia maua le toafilemu. O le isi la toaina, e mafai ona faapea, o le matua saienitisi i mataupu faale-pulega a Malo – Science of Politics. Lea e maua mai ai faailoga PhDs, Doctor of Philosophy of Politics.

A o le isi lava la tagata, e le i alu i fafo, a ua matua polofesa o mea tau pulega Malo, upufai o Malo, ona o upufai e agai tonu lava i le puipuia o le amio, puipuia o le saogalemu ma le toafilemu o tatou tagata ina ia ola i le Tulafono. E i ai lau upu na fai, o alii ma faipule, o leoleo. E muliga o atu leoleo a le Malo, a o leoleo ia, o le Fale Faamasino lea, o le Palemene lea a Samoa ae le i omai papalagi, o le Palemene latou te faia tonu, latou te faia Tulafono, pasia Tulafono. O le role po o tiute ia o le Palemene, fausia Tulafono. Ona a lea? Ona ave loa lea i le Faamasinoga latou te faauigaina le Tulafono. Ae faatino e ai? E faatino e le Malo. Pasia, faauigaina, faatino. O Faigamalo na sa i ai a Samoa ae le i omai pulega malo a papalagi. O le pasia o Tulafono o le maota o matai.

O le faauigaina o Tulafono o le maota o matai. Faatinoina o Tulafono o le maota o matai. Lau Afioga, o le Malo lena o Samoa, o le Malo lena o Samoa. Lea e i ai uma i i le Tafatolu, i totonu o le Maota, o le fale o matai. Lea e ala ai ona faapea upu, a e fia aoga, alu i le fale o matai e te aoga mai ai. Le tomai lena o lea e aumai i totonu o le Maota lenei. Ae i ai foi tatou ua ave i fafo, ua o i fafo omai ma faailoga i tomai eseese, o inisinia, o loia, o suetusi, o fomai, saofafai i totonu o le Palemene lenei. E i ai la taimi e galue, galue, galue ma faasolo a tatou felafolafoaiga, ae faalogo atu loa ia se tasi o lo o i ai le poto faapitoa lea ua sese, taumafai loa ona tu i luga e faasao. Aisea? Leaga o le anava lena a tagata ua i ai le profession, ua i ai le poto faapitoa.

26 FEPUARI 2021

Saunoaga Faa-Minisita a le Afioga i le Palemia

Ua faafia ona tu i luga le Afioga ia Tuitama? Ua faafia ona tu i luga le sui usufono mo Faleata le alii fomai e faasao mataupu tau soifua maloloina? Faafia? E i ai foi ma loia ia e i totonu. E lotea loa se mataupu tau loia tutu loa loia ua le mafai ona taofiofia. Aisea? Leaga o lea e i ai le tomai

faapitoa. O le upu a le Tusi, “O le tagata na te iloa le mea e tatau ona fai ae le faia, o le agasala lena i luma o le Atua.”

O le ala lena e alu alu ai tatou felafolafoaiga ona faigata lea i lau Afioga i le Fofoga Fetalai ona taofiofi. E tasi lava le mea e galulue ai ma taofiofi le naunau, ua galulue faa-Pati, o le faaaloalo i le faaaloalo. Na pau lava lena. Na pau lava lena o le mea o lea e fusia faatasi ai sui usufono i se Vaega Faaupufai, ona o le latou talitonuga ua maumauai, ua lotomau, ua galulue faatasi ma le faamaoni ona o le talitonuga a lau Afioga i le Fofoga Fetalai, o se atinae ua loto gatasitasi i ai, o se mea e manuia ai le atunuu atoa. O se mea e manuia ai le atunuu atoa ua tuufaatasi ai o latou loto, ua le faamuamua i o latou loto mea tau latou lava, mea tau pisinisi a latou, a ua faamuamua le galue mo le atunuu o lo o tapuaia maia o latou faiva, aemaise taitai o Ekalesia, le aufaigalueg paia a le Atua. A o le taiala pito sili ona taua lau Afioga i le Fofoga Fetalai, o le tautoga na fai i luma i i, tauto ai i luga o le Tusi Paia, o Afioga ia a le Atua. A tatou talanoa loa i le Upu ua tatou talanoa i lo tatou Alii, lo tatou Alii o Iesu Keriso. Leaga o lea e fai mai le Tusi a Ioane, sa i le amataga le Upu, ua liutino tagata le Upu, ma o le Upu o le tatou Alii Faaola. O le mea lena e taua ai tele le faalogologo atu a i latou o lea e i ai tomai faapitoa le taofiofi loa pe a faalogo atu ua faauigasese mai e se tagata e leai se tomai o i ai, lagalaga ai loa le tatou Maota.

Lau Afioga i le Fofoga Fetalai, o le tagata na faia e le Atua, pau lava lea e manifi lava le eseese, O le eseese o le tagata ma le meaola. Manifi aisea? Leaga na faia e le Atua le lagi ma le lalolagi ma mea o tumu ai, ma manufelegele ma manuvaefa, ona faia loa lea ma le tagata, tuu loa i ai le meaalofa e eseese ai le tagata ma le meaola. O a meaalofa ia lau Afioga i le Fofoga Fetalai? Tuu i ai e le Atua le agaga, le agaga. Tuu i ai e le Atua ma le conscious, le mafaufau, le faautautaga tatau nate iloa ai le mea sao ma le mea sese. O le faalavelave, e le mafai lava ona tea ai ma Satani nate faasese, a o le saolotoga lea na ave e le Atua i le tagata e pule ai ia, exercise. Po o le itu lelei po o le itu leaga, po o le malaia po o le manuia e faavavau. Ae i ai le taimi e pogisa ai le mafaufau ona ua pulea e Satani le mafaufau.

26 FEPUARI 2021

Saunoaga Faa-Minisita a le Afioga i le Palemia

E pei foi ona pulea e Satani le mafaufau o Iuta, o le ala lena a talanoa lo tatou Alii i ona toe itula, e taumafai lava le tatou Alii ina ia tatalo ia faasao Iuta. Faatino pea ae faatino e se isi, lea na afutoto ai lo tatou Alii, a ia aua lava ne i faatino e Iuta ua leva ona taumafai e faasao, a ua le mafai lava. Leaga e le o Iuta lea ua tulai mai o Iuta, ae ua Satani lea ua i totonu o Iuta.

Lau Afioga i le Fofoga Fetalai, o uiga na o lea e afua ai ona alu alu lava le tagata filifili loa le ala i le malaia, ma e matua manifi lava le eseese o le tagata pe a oo i le taimi o le pogisa, le tagata o le tagata ola e i ai le agaga ma le tagata ua liua ma amio faa-meaola, ua matua manifi lava le eseese. O le ala lena e taua ai tele le tulaga lea, tatou tatalo ia fesoasoani mai le Atua ia i tatou, ia aua ne i osofaia tatou e le tiapolo.

Lau Afioga i le Fofoga Fetalai, sa ou talanoa atu i le tulaga o taleni. O taleni e faaaoga e i tatou uma tatou te faia faaiuga lelei mo le tatou Malo. A o le fesili, o ai ea le Malo? O ai le Malo lea tatou te galulue ai? O ai le Malo? E i ai le faauigaina, a tatou talanoa i le Malo, ona tatou talanoa lea i itutino e tolu ua vaetolu i ai le pule. O le itutino e fausia Tulafono o le Palemene, ma le itutino e faauigaina le Tulafono, Tulafono e pasi atu le Palemene, o le Faamasinoga ma le itutino e faatinoina Tulafono, o le Pule Faatonu po o le Pulega Faatonu. O le isi lena faauigaina o le Malo, e vaapiapi le faauigaina. A oo loa ina faalautele le upu Malo, e aofia ai le Ao o le Malo, Sui Tofia, le Palemene, le Pule Faatonu, le Faamasinoga, Ekalesia uma lava faapea ma tagata uma o le tatou atunuu. O le faalupega lautele lena, o tatou uma lava. O le Malo ea o ai? O le Malo o Samoa atoa. O le Palemene lena o le a? O le Palemene o le Malo Tutoatasi o Samoa. A tatou talanoa la i le Malo, tatou te talanoa i le nauna lautele. E i ai tagata e manatu, tatou o e faaleaga le Malo, tatou o e faaleaga. Tusa ua e nofo lava oe ma faaleaga oe i le vaaiga lautele. O tatou uma lava, tatou te taumafai e atiae lo tatou Malo.

I le Fono lea e faifaipea faatasi i le 2 masina a le Kapeneta, o au ma le Kapeneta, Ofisa Sili o Pulega uma o Matagaluega ma Faalapotopotoga ma o latou soatau, e faatalatalanoa po o le a le tulaga au i luma o lea atinae ma lea atinae. E masani lava ona a uma ona ou faapea lea, o le tatou GDP, Gross Domestic Product, o le faapuupuuga o le isi faauigaina, o le Gross Domestic Product, o le faitauaofai lea o tupe uma lava e sau i totonu o le atunuu, lea e silia laitiiti i le \$2 piliona, e aofia uma ai le Malo, e aofia ai tagata taitoatasi. Po o fea lava le mea sau ai ana seleni, e i ai le auala e fua ai, ona faapea loa lea o lau upu, “Ia, omai ina o ma ia outou manatua le mea lena, o outou o vaega uma o le Malo...”

26 FEPUARI 2021

Saunoaga Faa-Minisita a le Afioga i le Palemia

O le GDP lea o fua o a outou galuega ia e fai. O lona uiga o lea mea, e faalagolago le isi i le isi. A sau ea oe lena e te galue i le Matagaluega o le Fono Aoaofa o lea, ae e vaai atu ua pa le paipa, tu lau taavale ae telefoni i o i le Matagaluega po o le Faalapotopotoga o le Vai. O i tonu lava i tafatafa o le HRPP lea e pa ai le vai. Aisea? Leaga o i tatou uma lava o le itutino o le Malo. E le manaomia se tagata e nofonofo i lona tulimanu ma faapea ifo, o lau lava lea Matagaluega faitalia i latou i o, pe leaga le latou

tautua. E tasi lava le lagoon mate, ae maumau ai ma eloelea se i tulou le suauu manogi. E tofui i tatou uma ma le tatou sao. O luitau ia e feagai pea ma i tatou lau Afioga i le Fofoga Fetalai ma le mamalu o le Maota, o luitau ia. E i ai lava lagoon, manatu faapito e tupu ae, i lea taimi ma lea taimi. O luitau ia e faafeagai ma le Malo. E te manatu lava oe na o oe. E 2 vaega o le a oo atu i ai si na au faamatalaga puupuu, e demonstrate ai, pe mafai ona fai ma faataitaiga.

Sa tatou talanoa anapo i le maliega po o le MOU po o le agreement po o se maliega faafeagaiga na sainia, ae le i avatua i o i le Kapeneta. Sa tulai mai le HRPP i le faaiuga o le 1982, ona tofia ai lea o au e Tofilau ou te galue i Matagaluega e 3. A o lou Ofisa ou te galue i i, i le Matagaluega o Tupe. O le Matagaluega la o Tupe sa faaigoa ai au, o au o le Minisita Lagolago, Associate Minister. A o lea la ou te galue, o lona uiga o le tele o lau galuega sa fai, o mataupu tonu lava faa-Minisita i totonu o le Tupe. A oo loa la i taimi, e tai pei o le presentation o le budget iinei i le Palemene, ona tauave lea e le Palemia o le Minisita foi o Tupe. O lea la ou te galue, ae tu loa le Minisita o Faatoaga. Fai mai le Minisita o Faatoga, se ua ou sau ia te oe uso. E i ai faipisinisi ia mai fafo, e omai e tele a latou tupe, fai mai e tele a latou tupe, fai mai la e i ai le MOU, o le latou feagaiga, se maliega e fia saini vave lava. Ou fai atu, se i aumaiga, aumai loa lea, si tamai pepa lava faapea, ou faitau ai. O ia la, e le i faigaluega i le Malo, o au ua leva ona ou faigaluega i le Malo, ma ou iloa ai ala o mea. Mo le puipuiga o le dignity o le Malo lenei. O lea la na ma talanoa ou fai atu, vaai, tago e ave ifo sau pepa e ave i le Kapeneta. Ona ave lea o le pepa lena e aumai se lipoti a le Loia Sili. E tilotilo lelei i ai le Loia Sili i le tulaga faale-tulafono po o ogatasi ma tatou Tulafono. Aemaise o le puipuiga o le Malo o Samoa from any liabilities i so o se vaega e ono aafia ai lo tatou Malo. Ona tapa lea ma se lipoti mai le Matagaluega o le Tupe, o i latou o le Ofisa Sili o Pulega o le Matagaluega o le Tupe, o i latou ia e i ai le tomai faava-o-Malo e mafai ai ona latou tilotilo loa ia a latou fuafuaga ma fesiligia. E vave lava ona latou iloina, pe o se miti le mea lea e sau, po o se mea moni.

26 FEPUARI 2021

Saunoaga Faa-Minisita a le Afioga i le Palemia

E i ai foi o latou sootaga faapitoa e fesootai ai i fafo i Faalapotopotoga po o atunuu e omai ai. E maua mai ai lipoti, independent reports, tuusao mai lava i latou faletupe, e iloa ai pe i ai ni latou tupe pe leai. Na fono ai le Kapeneta i le Aso Lulu na sosoo ai, o le Aso Gafua lea ma te talanoa ai. O la e soifua mai le Minisita lena, a o faalogologo mai nei ona manatua lea o mea na tutupu i le tausaga 1983 o le mea lena na fai. Ma o lau Tusi Paia lena e oo mai lava i le taimi lenei. A avatu se pepa a se Minisita, tapa se lipoti mai le Matagaluega mai i le Ofisa o le Loia Sili e tilotilo, i le tulaga faale-Tulafono po o lava puipua lo tatou Malo. Ia tapa se lipoti mai le

Matagaluega o le Tupe. O i i le Matagaluega o le Tupe lea e i ai tagata ua train faapitoa i feuiaga faava-o-Malo, mataupu uma i mea tau tupe. E mulimuli ane tulai mai faatu le tatou Faletupe Tutotonu, lea foi la ua i ai i totonu o le Faletupe Tutotonu, le tomai faapitoa lea.

O le faapuupuuga o au faamatalaga, o le fale o Samoa e fau tele. Ae mo le puipuiga o le tatou Malo, o mea ia e fai. E so o se MOU e aumai, e sau se faipisinisi i fafo, e aumai i se Minisita po o ai lava. Ave i le faletele, aisea? O tonu e fau tele, o le tonu lena e maua ai le tonu e lelei mo Samoa. Ma o le mea lava lena o lea e fai. E i ai foi nai isi taimi, pe ua avane le naunau e ono fai ai se iuga, e le tupu tele. Ae na o faafitauli e faafegai ma le Malo i ituaiga uiga faapena. O le ala lena, o lau tauloto lea e fai i Minisita uma. Ia tapa lipoti, tapa lipoti, aumai le fautuaga a Ofisa Sili o Pulega o Matagaluega ina ia fai ai a tatou iuga, e aafia ai le atunuu. A o iuga ua uma ona oo i ai ia leo eseese, e faufau ai ia se tonu fai a lo tatou Malo.

Lau Afioga i le Fofoga Fetalai, o le mataupu lea tau misela. O lea foi sa lagalaga ai le Maota anapo. A matau lelei i le faamai lenei, tatou te tilotilo i mea na tutupu i le taimi lea. O a mea na tutupu i le taimi lea? O lea ua fai le iuga a le Kapeneta, e toe foi mai le Pulega tutoatasi a le vaega lea a fomai. O lea sa faaigoa o le National Health Services, NHS. Sa ese lava lona ia pule, ese foi le pule o le pulega lautele a le Falemai ma le Soifua Maloloina. Na ala ona fai le suiga lea i le 2006, ona ua tele Komiti Suesue na fai muamua atu, ma taunuu ai lava i le ituaiga model lea. E tele tulaga faaletonu o le pulega o le Falemai. Ae sau lava le Komisi Suesue, o le model lea e faaigoa e tatou, tatou alu ai i le faiga lea. A o fea e sau ai? Aua foi o le au Niu Sila ia e omai e fai suesuega, ma omai loa aumai le model la e mulimuli ai falemai i Niu Sila.

26 FEPUARI 2021

Saunoaga Faa-Minisita a le Afioga i le Palemia

O le ala lena, e pei ua fausia ai se manatu tatou alu i le faiga lea i le 2026. E pei ona silafia, i le taimi tonu lava o lea o le 2019, lea foi na tulai mai ai le misela i le amataga o le tausaga. O lea na fai ai le iuga a le Kapeneta, i luga o talitonuga ma tusitusiga ma fautuaga ua taoto mai i le Malo. Ma le tuualalo foi a le Nurses Association, o latou ia o tamaitai tausii soifua. Na matua tusi mai ai lava le Peresetene ua tuumalo, o Faamanatu. Ma faapea mai, Tui se tuu ia lenei mea valea na outou faia, e le lelei. O lea la, ua fai loa ma le iuga a le Malo, o le a toe foi lava i le mea na i ai. Ua uma ona try out, mulimuli le Malo i fautuaga ia na fai e le Komisi, ma maua ai i i e le i foia ai lava le faafitauli lea o le galulue faatasi. O lea la na fai ai loa le Komisi Suesue, na tuu i ai i totonu o le Komisi Suesue lea, ia polofesa. Sa i

ai Professor Asofou, sa i ai ia le tamaitai lea sa pule i le PSC, o Dr. Faamausili Matagalofi. Na tuu loa i ai ma le sa avea ma Attorney General, o Brender. Ua matua saili mai lava lauia, e faia le Komisi Suesue, se i aumai lava se latou lagona i le faatulagaga lea o le a fai. Ae tupu ai loa ma faafitauli ia na tutupu, ua i ai feeseeseaiga. Na oo lava i nusipepa o ta mai ai le tetee a isi tamaitai tausii soifua. E le o le itutino atoa o tamaitai tausii soifua, a o nisi. Ae tasi lava le mea na agai i ai le latou tetee. O le tilotilo atu i le auivi lea ua faataoto mai o le toe faatulagaga o le Matagaluega. O lea e tafatolu faatulagaga maiga, e pei e le o manino le tulaga e tuu i ai ia tamaitai tausii soifua i luga ia manao ia Deputy. Na ou valaauina le fonu i totonu o le potu o le Kapeneta i lou taumafai e fai se fofo. Ou vaai atu se matua pulu uma tagata, e leai lava se isi e fia alu ifo i lalo. Ona ou avea loa lea o le mataupu i le Kapeneta, o le a fai le Komisi Suesue. O lea la na fai ai le Komisi Suesue.

Ua fai nei le Komisi Suesue, ae tupu loa foi ma le faafitauli lea na tupu i Savaii. O lea na maliliu ai nai fanau e toa-lua, o le ala lena o lea na ou faapea atu ai. E le mafai ona malamalama se tina, po o se tama, e leai sana fanau i le mataupu lea. I mea ia o tui ia sa pisa ai. E na o latou e fai fanau, aemaise lava latou o lea e i ai a latou pepe. O lea la na tatou faalogologo uma lava i tala na aumai, ma lipoti na aumai. Alu ane le isi tina ua oo i le taimi e tataua ona tui ai. E toa-lua nurses, tui lava i ina, e le i umi ae oti le tamaititi. A o lea ua saofai ma le isi tina, o lea la ua iloa e le tina lea o lea ua faaletonu, ae la ua musu. Ae faamalosi e le isi nurse, aumai lau tama e tui. Ua faamalosi loa ona tui, toe oti atu ma ia. E leaga la o le tina foi lea e naunau i lana tama, i le tui lava i ona luma. O lea ua taoto mai le isi ua oti, a o lea ua toe faamalosi e le isi e toe tui. O le a la le lagona o le tina lea ina ua oti?

26 FEPUARI 2021

Saunoaga Faa-Minisita a le Afioga i le Palemia

Ou te le tau faamatala atua, e malamalama lelei i ai le tina o lea e i ai lana tama. A o lea faatoa uma atu le isi Komisi, toe fai ai lea ma le iuga a le Kapeneta, toe fai le isi Komisi Suesue i i i le mea lea. O lea la e fai Komisi Suesue ia, ae ua alu le talaiga lau Afioga i le Fofoga Fetalai. Ua faasalalau e i latou e tetee, aua ne i tuia a outou fanau. Sa matou talatalanoa ai i totonu o le Kapeneta faasamasamanoa. Silasila i le matautia o le mea lea e tupu, le siosiomaga o lea ua i ai le pulega a le Falemai. O le siosiomaga lea e tau fofo atu le mataupu lea, o lea ua fai le iuga o le a tuufaatasi. O lea e fetauai, fai le Komisi Suesue ae toe tupu mai ma le mea lea i Savaii, fai le isi Komisi Suesue. Tatou nonofo la ma tatou manatunatu o oe lea e i ai i uta. O lea faatoa talanoa le mea lea e faatali mai se iuga. Ae tutupu mai loa mea ia, o oe o le tagata faigaluega a le Malo. E le o oe o se agelu, e subject

uma i ituaiga, o le popole atu i lea mea, popole mai i lea mea, popole mai i lea mea. O lea ua faapenei uma atu ia te oe.

Lau Afioga i le Fofoga Fetalai, o le mea lenei o le fai o se Komisi Suesue, e le o se mea lelei. Aisea? E atagia ai le Minisita, e atagia ai le faatautaiga a le Ofisa Sili o Pulega ma latou ia e i le Pulega, e matua atagia lava. I le fai o Komisi suesue ua sosoo lava. O le a le mea na tupu? O lea foi la ua feoti tonu ai ma tamaiti ia. O lea la e faatali le Kapeneta i se iuga e fai. Ae sau le lipoti, ua faatelegese le iuga a le Komisi Suesue ua defer, aisea? Se i uma suesuega a leoleo, ua ou le iloa po o ua oo mai lava i le faaiuga o Tesema i le faaiuga o le tausaga, faatoa ou maua le lipoti a leoleo. O lea faatoa tautino ai loa e tina ia, le tulaga sa la teena mai lava i le amataga. Ai a na vave tetee, manu ua iloa e tagata le faaletonu lea e i ai. Ae o le mea lea e tupu, ua mumusu tina e toe o e toe tui ni a latou fanau. Semanu e talatalanoa ai lava i totonu o le Kapeneta.

Lau Afioga i le Fofoga Fetalai, o le a la le mea na tupu? Ua o nei isi ua o i Niu Sila, ua o i Niu Sila e tui ai nai a latou pepe. Ua sau faasalalauga a le nusipepa, faitio. E i ai ma isi tagata tetee fai mai e le sefe le vaccine, e le sefe. Ae sau ma isi latou te matua tetee, e matua matou tetee. Aisea? E leaga o le talitonuga a le matou ekalesia, aua ne i o matou tui ae o sao lava i le Atua e sau ai mai le Atua, sau sao lava mai le Atua, ia le fofo. A lea sa fai ai lau tala faatusa i i. I le taua o le mea lea o le faalogo i fomai, ma le latou fautuaga, aumai fanau e ta tui.

26 FEPUARI 2021

Saunoaga Faa-Minisita a le Afioga i le Palemia

O lea na fai ai lau tautalaga i i, o le tala o le tala faatusa. O le tala faatusa i se faifeau, sau le lolo. Ua alu ae alu ae le lolo ua oo i luga o le folia o le fale, sau le vaa faaola, e toa-tolu tagata ia e o mai ai. Lau susuga i le faifeau, oso mai i luga tatou o i le paumatu. Fai mai le faifeau, ou te talitonu o le Atua o lo o soifua. O le a na Ia faasaoina lana auauna. Ua alu le vaa faaola. Ua alu alu lava alu le timuga, oo i luga o le tualuga o le fale. O le a le mea lea ua i ai? O lea ua piipii i le tualuga, ua oo i ai le lolo. Toe sau le vaa faaola, sega oso mai tatou o i le paumatu. Ae fai mai le faifeau, ou te talitonu i le Atua, o le a na taofia le timu ma faasaoina lana auauna. Toe alu le vaa faaola. Timu ai lava, timu ai lava malemo loa ma le faifeau, ua oti. Alu atu loa i luma o le Alii. Alu atu loa lea fai lana complain. Ua fiu alii e tatalo mai alii ae leai sau fesoasoani. Ona fai mai lea o le Alii, ua faafia ona ou auina atu le vaa faaola. O ai e te toe faatali i ai? Lau Afioga i le Fofoga Fetalai, na auina mai e le Alii ia fomai, e ta tui a tatou fanau. A o

le a le mea lea na tupu? E mumusu, ona o le mataupu lea i Savaii. Lau Afioga i le Fofoga Fetalai, e le tau faia ni tala i na mea. O lea tatou te malamalama, ua faafia ona sau i po uma, po uma, aumai a outou fanau e ta tui. Faalogo atu oti lea, oti lea, oti lea. E avatu i le falemai ae enquire atu le fomai, ae fai mai, o lea sa fofu lava. Taumafai lava e fofu, a o lea ua aumai aumai ua le aoga. O le mea sa tau atu ai i luga, ua ese foliga o le misela. Ua ese i se a? Ua sau faatasi ma le niuonia.

O lea e manatu lava tina nei, o ia na togafiti i le fuefuesina. Aua e faapea o 1963, faatoa sau ai le tui lea, o tua atu o tagata na fanau i le 1963, o le fuefuesina ma isi fofu na fofu ai, na fofu ai ma au i le fuefuesina. O le a la le mea e fai? O lea e o lava tina ia, la latou te iloa lelei, na fofu lava na i a latou misela i fuefuesina. O lea la ua ave i ai a latou fanau. E tiga la ona tuitui atu le falemai, tatou vaavaai uma lava i ai, o po uma, po uma, sau pea, sau pea, sau pea. O le a la le mea na tupu? O lea ua o i tua le Malo, tapuni masalo o tatou o se atunuu muamua na alu atu ai le upu lea i le Malo afaatasi alu atu ai i fafo, close down. Ua matua tapuni lava le Malo ae o i tua. Aisea? Aisea? Ua o i tua taitaiga a le Malo lenei, le Kapeneta, o i tua aua le toe faatali. O lea sa matou taamilo ai. E tui ia tatou fanau, talosaga i alii ma faipule e o ane ma latou. Na matou foi mai Savaii taamilo mai i i Aana, faasolo mai i Tuamasaga matou mataitu.

26 FEPUARI 2021

Saunoaga Faa-Minisita a le Afioga i le Palemia

Na ou alu lava i totonu ou vaai i ai, ou te fia vaai i ai i foliga o le misela. Lau Afioga i le Fofoga Fetalai, o le tulaga lena. O lea la sa talanoa mai se isi i fua mumu, le auala lea e agai atu i le falemai. O le taeao na tui ai, vaai e le mamao e le mamao le falemai. E na ona tu lava savalivali atu e le atoa le 2 minute e alu atu ai alu i le falemai. Ae fua mumu loaloa, e le i tuia, aisea? E le talitonu, o lea la e faapea se manatu, a na tui lava ia Mati na sau ai le fautuaga, po o Mati po o tua mai ai Fepuari, po o tua mai ia Tesema. E le mafai ona aveesea le talitonuga lea. Lau Afioga i le Fofoga Fetalai, o le tulaga lena. O le faamaoniga lea, ua uma ua tapuni, ua tui uma tagata. Ae o atu le latou mop up operation, le Afioga ia Tuitama ma le latou Matagaluega, e 2,500 i latou e le i tuia i Savaii. Mumusu, o le manatu la faapea, a na tui lava ia Mati, semeamanu e leai se isi e oti. E faapefea ona faatalitonuina le manatu o le tina. Lau Afioga i le Fofoga Fetalai, o le proof lena, pe 2 tausaga i tua atu. Ae a le malie lava le tina latou, aemaise o lea ua i ai faailo, ia red flags la ia. Ua oti ia fanau aemaise o le le talia e tina ia, tau mai ua sese laua. Faatoa tau lava ina ua oo i le taeao o le faamasinoga.

Ua mafua ona ou taua le itu lea, ona e taua tele tatou felafolafoaiga, i le mea lea o le tuuaifua. A o totonu lava o lau Kapeneta, e tasi lava le Tulafono, e tasi lava le Tulafono. O le Tulafono o le Collective Responsibility. A i ai sou manatu e fia faaalua, a o le i faia le iuga, faaali, faaali. Ae uma loa le faatalanoaga ua fai le iuga, ua noatia uma latou uma a o lea e maua le avanoa. Afai la e te auese ai, ona e faamavae loa lea, faamavae loa lea, ia se i silasila. Ma o totonu foi o le Kapeneta, e faafia ona fai a matou fonu, o le a tapa saunoa uma outou, saunoa lea saunoa lea, saunoa lea, o au o le taitai ou te matua moomia fautuaga e fau ai le Malo. Ina ua tuua le tatou Fonu anapo, sa aumai ai, na ou faalogo na laga e le tamaitai sa Minisita i lenei taimi, sa ia talanoa i le Minisita. Aua o le taimi atoa sa ou i ai i totonu, e leai ma se isi na te le i laga le mataupu lea. Ua leva ona ou fia faalogo i ni fautuaga, ae faapea mai, sa laga e le matou Fonu a o e malaga. Na matou talatalanoa ai lava lea, uma foi ona ou faamatala ma uma atu ai lava. O le Kapeneta, o ai le Minisita i totonu o le Kapeneta na te iloa se mataupu ogaoga pe a ou leai, e fai le faaiuga, faamau i lalo faaiuga a le Kapeneta. O le faaiuga a le Kapeneta, FK, Faaiuga F, Kapeneta K faanumera fai loa le faaiuga. Ou toe foi mai, ia o au la ua ou lagona lou mafatia alofa i le aufaigaluega, i lou mataitu e usu mai i le taeao e le i ao.

26 FEPUARI 2021

Saunoaga Faa-Minisita a le Afioga i le Palemia

Ona ave ai lea o lau tusi, na ou tusi ai lea i le tamaitai Minisita o le Falemai. E faapea foi ma kopi ia Tuitama, kopi i lau Minisita, o lou lima taumatau o le Sui Palemia. O lau tusi lenei sa ave. E momoli atu lau faafetai ia te oe mo lou loto tele, e molimoli atu foi lau faamalo i le aufaigaluega atoa sa latou galulue i le ao ma le po e faataunuu le galuega tele mo le tuiga, e taofia ai o le faamai lenei o le misela. Lau susuga i le Minisita, o ai e faatautee i mea nei? O ai se tasi e le lagolagoina oe, ma faiga lelei o lo o faataoto, aumai lau pepa i le Kapeneta e faamalolo ai. E po o se tagata po o le Ofisa Sili po o ai e faaletonu, aumai sau pepa i totonu o le Kapeneta e faamalolo ai, pe a le faamaoni, po o le pule. Ona ou avea loa lea o faataitaiga, i ina i le falemai sa i ai foi le Pule, e tau mai ia te au. Ae na ona oo mai lava o le study tele lava e faafoliga mai e i ai ni faaletonu, ia ona ou avea lea i le Kapeneta. Fai le faaiuga, faamalolo le tumau ae fai le suesuega. Tagata e tau mai ia te au, aemaise o lea ou te igoa ai i le igoa sa igoa ai. E i ai foi le isi na tau mai ia te au, le Ofisa Sili o le isi Matagaluega. Na ona aumai lava o le fautuaga a le panel fautua mai le isi tagata lea, ia, o le a faamalolo le alii lea e faauluulu i le Matagaluega. E leai sou leo ou te faatautee, ae ma te suafa faatasi, o lou uso a matai. Lau

Afioga i le Fofoga Fetalai, e taua tele mea ia. Na ou taua i ai, e oo lava i tagata na tau mai ia te au i faatumutumuga o Matagaluega, na aumai lava fai le iuga a le Kapeneta.

Lau Afioga i le Fofoga Fetalai, o le faiga lena o faaiuga faale-Malo. E fai i luma, ae le tomumu i tua. O le tagata e alu tomumu i tua ma faitio i iuga sa fai ma faasinolima i ai, faasinolima i lima e fa, ona manatua lea e tasi le lima lea e faasino ia te oe. E fa ou tamatamailima e te faasino ai i le isi tagata, ae tasi le lima matua lea e faasino ia te oe. Ae e te le i faitioina se isi, tilotilo muamua ia te oe, po o faapefea mai oe.

Lau Afioga i le Fofoga Fetalai, o le tulaga lena sa ou manatu ou te talanoa atu ai. O le uiga o faamatalaga e fai nei, a e alu loa i fafo ma e talanoa i au mea sa fai i totonu o le Kapeneta ma e faitioina a o lea sa e saofai ai, ona e manatua lea, o le ua e talepea le Tulafono Auro a Kapeneta uma lava o Faigamalo faa-Palemene. I le taimi tou te faia ai le iuga ae e faitioina, lona uiga, ua galo ia te oe lou tiute ma lau tautoga, tautoga o le faamaoni.

Lau Afioga i le Fofoga Fetalai, ia o lau tautalaga lena Faa-Minisita, e aoga mo nei ma le lumanai, aemaise nisi e ono tofia i le Faigamalo fou. Pe finagalo le Atua e tofi mai, toe tofi mai matou pe leai, ae aoga tele upu ia ua ou talanoa atu ai, e i ai le principle e mulimuli ai Minisita uma o le Kapeneta, le principle of collective responsibility. Le principle e faamaoni i au galuega faa-Kapeneta.

26 FEPUARI 2021

Saunoaga Faa-Minisita a le Afioga i le Palemia

E te fai loa le tautoga, e avanoa uma lava tagata e fai sao i ai, fai sao i ai i tonu e fai. Ae a maea loa le tonu e fai ua noatia uma ai outou, o le tonu lea. Ia manatua mo se Kapeneta fou. Tatou te le iloa na o le Atua na te tofia Malo. A o principle na, o taiala na o le faamaoni e te tautua i lou atunuu.

I le matou talanoaga ma le savali na sau a le Faletupe o le Lalolagi, na matou talanoa ai a o le i faia le suiga lea o le Pulega o le Falemai. Fai mai lea o latou, ua matou fialia tele i le suiga lea o le a toe fai. O le auala lea e alu ai outou, o le auala na mulimuli ai Niu Sila, o le tuueseese o le Health Services ma le Pulega. O upu ia a le savali mai le Faletupe o le Lalolagi. O lea la ua matou fialia o lea o le a outou o ese ai. Ua leva ona o ese Niu Sila, ua vaai atu Niu Sila e oti ai i i. A o la e mulimuli ai lava Peretania, ma o le Health Services a Peretania, o le tasi lea tautua pito sili ona faaletonu i Europa atoa.

Lau Afioga i le Fofoga Fetalai, o le taua ia o tuualalo, ma le latou tala, o le a fesoasoani mai le Faletupe o le Lalolagi e faatupe uma le faatinoga o mea ia.

Lau Afioga i le Fofoga Fetalai, o le faatinoga lena o mau ia sa ou tutulai atu ai, ua saunoa foi i ai le toatele. E mafua ona aumai fesoasoani a tatou paaga, ona e muliai a latou suesuega ma talitonu ai, o se mea lelei lea o le a

fai. Ae vaai mai loa i se fuafuaga e matua tumu i tulaga soonafai, tipi motu ai lava i ina le fesoasoani.

Lau Afioga i le Fofoga Fetalai, ia faamanuia mai le Atua i le tatou Fonotaga i lenei aso. Soifua ma ia manuia.

FOFOGA FETALAI: Malo faafetai. Ia, ua manino auofala ma ua faapena foi ona logo faafofoga le paia o le Palemene i le saunoaga faamalamalama a le Taitai o le Malo. Ona i ai lea o le manatu, o le saunoaga e poupou ai i le lumanai. O ai lava le Faigamalo, e le faapitoa manu ia tasi. O ai i latou ua faapena o le a valaauina e le Atua, ia o taiala ia o lea ua aumai e faagaioi ai le tatou Faigamalo, o le tatou piiama ma piioa faatasi e mama ai se galuega. Ioe. E pei e faapena, ae autu lava i le finagalo o le Atua foi lenei, o se Malo e fevaevaeai e le tumau. O se Malo e faapena ona galulue faatasi, tasi le loto tasi le agaga, ae, ia o le Malo lena e auai le Atua, fai mai e leai se malosi e mafai ona faasagatau mai. Ia, e aoga mo tatou uma lava.

Ae tapa lau Afioga i le... Ia, tulai mai lau Afioga i le Minisita mo Tina ma Tamaitai.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, leai o lea na ou tu atu e faatu se lafo, *Ina ia faamauiina le Saunoaga faa-Minisita a le Afioga i le Palemia, faataatia i luga o le Laulau-a-Fono e aveia ma faamaumauga o lenei Fonotaga. Ma le faaaloalo.*

Faaluaina e le Minisita mo Pisinisi, Alamanuia ma Leipa ma le Minisita mo Tagata Tafafao Maimoa Mai Fafu.

Na faamaonia le lafo.

FOFOGA FETALAI: Ia ma o le a faapena ona fai. Ou te tapa lau Afioga i le Tamaitai Minisita. Ia masalo e le o toe umi foi sau tapenaga o totoe, o lea ua tele lava ina faapena ona faamanino ma faamalamalama itu lautetele o le Matagaluega ma faiga faavae o le Matagaluega a le Soifua Maloloina. Tulai maia e faaiu mai lau saunoaga.

Tofa Hon FAIMALOTOA KIKA IEMAIMA STOWERS (Minisita mo le Soifua Maloloina): Faafetai i lau Afioga i le Fofoga Fetalai ua toe

maua le avanoa e faaauau ai le folasaga a lenei sui usufono aemaise o si a matou Matagaluega o lo o taputapu mai. E faatalofa atu foi i lenei taeao fou i faguga lelei i le tatou alafai mai i le alofa ma le agalelei o le Atua i le paia maualuga o le Maota, aemaise lo tatou atunuu o lo o taputapu mai.

Faafetai foi i le saunoaga malamalama a le Afioga i le Taitai ua faamanino ai le tele o nisi o mataupu e ao ona tatou malamalama i ai aemaise ai foi le vaega mulimuli o le saunoaga, lea ua toe faamanino ma faapupula malamalama ai nisi o vaega e pei ona i ai le folasaga i le mataupu lea i le po anapo e faatatau i le misela. Ou te talitonu ua tele ina malamalama i le folasaga, ae tasi lava si mea lea lau Afioga i le Fofoga Fetalai ou te fia faaopoopo atu ona o lea e faafogafoga si a matou Matagaluega.

O le faamalamalama, o le taimi lea i le 2018, e 2 vaega o le soifua maloloina na i ai, lea e taua ai lipoti nei. O le National Health Service o le service provider le latou role. O i na faatino ai le auunaga mo le soifua maloloina o tagata i togafitiga, o le vaaia o gasegase mamai, e aofia ai la ma mea nei o tui puipui mo alo ma fanau.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

O le role a le Matagaluega o le Soifua Maloloina i lenei taimi, o le regulatory and monitoring. O i latou sa mataituina ma taumafai e faatonutonu galuega la ia ma auunaga, lea e faatino e le NHS. E pei la o si mea lenei e fia... E tupu la le faalavelave lea i Safotu e pei ona saunoa lau Afioga, o lo o i lalo o le NHS le faatinoina o le polokalame lea o le EPI, po o le Extended Programme Immunization. O le Komisi Suesue foi la e pei ona saunoa le Afioga e uiga i le faalavelave, o le fautuaga e pei ona aumai, o le Komisi la lea sa tuuina i ai le Lipoti a le MOH po o le Ministry of Health e uiga i le faalavelave na tupu i Safotu, ma le fautuaga a le MOH po o le Matagaluega o le Soifua Maloloina, o lana fautuaga, ina ia vave amata ona fai tui puipui o le fanau. Ou te talitonu o le Lipoti lea o lea e refer mai ai. O le Lipoti na ave e le Matagaluega i le Komisi Suesue, lea na fautuaina ai e le Matagaluega le tulaga lea.

Ia, o lo o manino. Ae mo le pasia la o le Tulafono a le Palemene e toe tuufaatasia ai le Matagaluega, ia e tasi le masina na tuufaatasia ai ma tapena ai loa le toe amatalia o le faiga o tui puipui o le misela ia Aperila lea i le 2019 a o le taimi lenei ou te le i amata i le Matagaluega o lea lava ou te i le isi Matagaluega.

O faailoilo foi po o red flags ua taua e le tamaitai sui usufono faapea e le i iloaina, o le faamatalaga mai le Matagaluega...

FOFOGA FETALAI: Ia, ou te fautua atu i alu Afioga i le Minisita, silasila foi, ua fefoifoiai le saunoaga a le Afioga i le Taitai o le Malo i itu uma na, ua manino ma malamalama, a e lailoa lava e toe tau aumai. A o lea ua manino tulaga o lo o i ai. O lea foi e... O faafitauli, a tatou o loa i faafitauli, tatou te le toe faamamafa faafitauli, ae tatou te faamamafa le fofo o faafitauli. O lea la ua maua le fofo, ua uma foi o lea ua faagasolo o lea ua toa lena tulaga. A foi lea na saunoa le Palemia, na tatou matua tapuni lava ae o e fai. E matua matautia lea mea na tatou faia i lenei itu o le lalolagi. Ia ua uma. E leai la se isi mea tatou te toe foi i ai e toe faamalamalama. Ae malie lau Afioga, ia, se i... O a nisi mea e le i oo i ai, ia, se malie e oo i ai. Ioe. Tatou faia le upu foi lea a le faafafine, o a mea e le i oo i ai, oo i ai.

Ae talu ai ona o lea ua tatou taunuu i le tatou malologa, ia faaoo i ai lau saunoaga ia ma faauma ai loa pe a tatou toe taliu mai i le tatou malologa. Ua faataatiaese Galuega a le Fono Aoa mo lana malologa.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Na faataatiaese Taulumaga a le Fono Aoa Faitulafono mo lana malologa masani i le itula e 10:25 i le taeao ma toe faaauau i le itula e 11:08 i le taeao.

Na toe faaauau felafolafoaiga ma Tali a le Malo i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasilasila atu ua toe amatalia Galuega ma Taulumaga a le Fono Aoa Faitulafono.

E faia le malologa o lo o saunoa le Afioga i le Minisita o le Soifua Maloloina. Ia, ua ou manatu ma le faaaloalo e tapa lau Afioga i le Tamaitai Minisita mo le Soifua Maloloina e tulai maia e saunoa, ou te manatu e le o toe tele foi nisi o mea o lo o faapena ona tapena. Ia manuia le saunoaga.

Tofa Hon FAIMALOTOA KIKA IEMAIMA STOWERS: Faafetai i lau Afioga i le Fofoga Fetalai. Ou te talitonu o lea foi ua maua le malosia o le tino e faaauau ai le tatou galuega i lenei taeao, e faafetai ai i lau Afioga ma le Matagaluega i le tapenaina o lea tulaga.

O anapo e pei ona faafofoga sa ou talanoa ma tolaulau le tele ma le anoanoai o Tulafono. E le gata i lea o le tele o faiga faavae ua maea fausia,

o fuafuaga e faatino ai ia faiga faavae ma le faatinoga o le tele o vaega tau auaunaga a le Matagaluega.

Ia, e tele ma anoanoai isi mea ae o le a ou taumafai e ootoo atu loa na o tulaga mo le fia faailoa. Mai le tausaga e 2016 seia oo mai i le tausaga lenei, o nisi nei o galuega ma polokalame ua maea faatinoina e le Soifua Maloloina, e faaleleia ai le faagasologa o le faatinoga o auaunaga, e faapena foi ona faalelei ai le faatinoga o pulega ma le faafoeina o galuega. O lena ua fausia, faatino ma iloilo Tulafono, o faiga faavae, taiala ma alafua e limataitaiina ai auaunaga ma polokalame faatino a le soifua maloloina. O le isi vaega, ua faavaeina ma galueaiina e le Komiti Faufautua mo Polokalame o le Soifua Maloloina, lea ua i ai le Komiti Faapitoa ua faavaeina mo le galueaiina o ia fautuaga ma ia fuafuaga, le Health Programme Advisory Committee.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

O nisi o atinae tetele mo le soifua maloloina sa faatinoina ma ausia, e aofia ai le faatuina o se fale e gaosia ai itutino faapipii e pei ona ua tatalaina ma amata faaaogaina. Toe faaleleia ma le faateleina o le falemai o le Malietoa Tanumafili i Tuasivi i Savaii e pei ona tatala aloaiaina mo le faaaogaina i le aso 23 Tesema i le 2016. Faapena foi ona tatalaina ma faaaogaina aloaia le uluai fale teuoloa e teumaluina vailaau ma fualaau mo togafitiga, le pharmaceutical warehouse. I lenei foi vaitaimi maaleale ua tatou i ai ona o aafiaga o le lalolagi i le Koviti-19, ua aoga tele lava lenei fale teu oloa e tuuina ai oloa moomia mo auaunaga faasauniuni e tali atu ai i le faamai e pei ona i ai nei le lalolagi, ma teumaluina ai mo le faasoasoina ona o lea ua tatou molimauina le tulaga faigata o le auina mai o oloa mai fafo talu ai le faamai.

Ua faapena foi ona tatalaina aloaia le Ofisa Tutotonu o Auaunaga Aoaotetele o le Soifua Maloloina – Primary Health Care Center e taaofai i ai auaunaga uma o lo o faatinoina mo le soifua maloloina aoaotetele o le atunuu. Ua maea foi le galuega mo le faaleleia o le 60 mo le nofoaga e 60 masini e ofi ai e see atu i ai le Faalapotopotoga o Faavae Tau Fatugao a Samoa. Peitai, o lo o talia i le taimi nei se laolao mo le tatalaina o femalagaiga ina ia mafai ona oo mai inisinia mai Siamani mo le faapipiina o ia masini faamama vai. I le taimi nei, na o le 22 masini o lo o faatinoina ai le auaunaga a le Faalapotopotoga tau Fatugao a Samoa.

O nisi o auaunaga faaleleia o le soifua maloloina ua faapena ona faatino, e aofia ai le faaleleia o masini o lo o auina atu ai le vai vevela i le falemai, le tatou Boiler System, ua maea ona faatino ia vaega uma. O lea ua faataunuina le masini faapitoa e gaosia ai okesen mo le falemai tutotonu

faatasi ai, o lea foi ua faatauina mai masini e faaaogaina mo le faia o taotoga o fofoga po o mata. Ua faapena foi ona i ai le fetuunaiga o auunaga i totonu o falemai faaitumalo. E pei ona silafia o le 2019 ina ua aloaia le toe tuufaatasia o le Matagaluega e tusa ai ma fuafuaga a le Malo i le masina o Fepuari ua faatinoina ai fetuunaiga ina ia avea falemai faaitumalo ma nofoaga e faatino ai auunaga aoatotele o le soifua maloloina, le primary health care services ma auunaga mo le soifua maloloina lautele, public health services. Ina ia toe faaolaola le faatinoina o nei auunaga e galulue faatasi ai ma pulega o nuu ma itumalo ina ia uunaia atili lenei faamoemoega.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

O se tasi o vaega ua ausia lona faatino o le tofia o fomai. E pei ona silafia, ia lona ua galulue i totonu o falemai faaitumalo i Upolu nei faapea ma Savaii. Ma o se tasi lea o matatia ausia ua mafai ona faatinoina i lenei Paeaiga, ina ia fesoasoani ai i le faatinoga o le fetuunaiga o auunaga i totonu o falemai faaitumalo ma falemai laiti, i le tofia lea o alii ma tamaitai fomai e galulue tumau ai ina ia fesoasoani i le tauasa mamao mai o le atunuu i falemai tutotonu e vaai se fomai.

O se tasi o tulaga mo le faaleleia atili lava o le auunaga, o le faafoeina lea o fonu mo tomai faapitoa mo le soifua maloloina i le faagasologa o galuega, health professional councils e pei ona i ai le fonu a fomai, fonu a tausisoifua, fonu a tomai mo faletalavai, fonu a tomai faapitoa lagolago o le soifua maloloina, fonu a fomai nifo. Ae le gata i lea o le faafoeina o fonotaga mo le vaega lautele o le soifua maloloina, annual health sector forums. E le gata i lea o le fetuunaiga o le faatinoga o auunaga o le soifua maloloina e pei ona i ai le merge.

O le tulaga e aupito sili ona tu matila i lenei fuafuaga e pei ona faataunuu le merge, o le uluai taimi lenei ua galulue ai lava tama fanau a le atunuu e faatino le tuufaatasiga o le Matagaluega ma toe fetuunai ai faatinoga o ana auunaga lea sa galulue faatasi ai ma le Matagaluega o Tupe, Matagaluega o Faalapotopotoga a le Malo, Matagaluega o le Soifua Maloloina, Auunaga o le Soifua Maloloina, Komisi o Tagata Faigaluega o le Malo, faatasi ai ma le Ofisa o le Loia Sili. Aua o galuega faapea sa masani lava ona totogi konesale ma tagata faapitoa mai fafo ma faaalu ai le tele o tupe.

O le isi tulaga, o le atiaeina o tomai o le afaigaluega o le soifua maloloina. O se tasi lea o vaega autu ua ave i ai le faamuamua aua e iai le talitonuga, o le afaigaluega a le Soifua Maloloina, o le poutu lea i le

faatinoga o auaunaga moomia mo le soifua manuia ma le maloloina o nai o tatou tagata.

O se tasi o vaega lau Afioga i le Fofoga Fetalai ma le mamalu o le Maota ua taulai i ai le vaai a le Matagaluega, o le uunaia lea ma le faamalosia o le galulue faatasi ma ana paaga, aua e le mafai ona tino mai le manulauti o le soifua maloloina ina ia maua se Samoa maloloina pe a le galulue faatasi le vaega o le soifua maloloina ma ana paaga. E le gata i paaga fesoasoani mai fafo ae faapea foi ana paaga totino i totonu lava o le atunuu, e aofia ai Matagaluega ma Faalapotopotoga a le Malo, Faalapotopotoga Tumaoti o lo o galulue i le faatinoga o isi auaunaga o le soifua maloloina.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Ia faapea foi ma faalapotopotoga a Ekalesia, aemaise o totonu o nuu ma afioaga e pei ona fesoasoani malosai mai ai pea le Afioga i le Minisita ma le Matagaluega o Tina ma Tamaitai.

O se tasi o polokalame autu o galuega faasoifua maloloina o lo o faatauaina pea, o le PEN faa-Samoa i le va o le soifua maloloina ma le Faalapotopotoga o le Soifua Maloloina a le Lalolagi le WHO. O lenei polokalame ua tele lona fesoasoani i le atiaaina o tomai ma agavaa aemaise o tupulaga talavou o nuu ma afioaga na aoaoina i auaunaga faigofie, e pei o le fuaina o le suka ma le toto mauuluga, e fesoasoani ai i le utiuti o le afaigaluega e faatinoina suesuega sa faatautaia mo le mamalu o le atunuu e siaki ai po ua aafia i aafia o gasegase ogaoga e aafia ai totoga po o NCDs.

O se tasi o paaga a le Matagaluega e pei ona amata mai i le 2018, o se maliega lea na sainia ma le Malo o Saina, ua faamatuu mai ai nisi o latou foma faapitoa e fesoasoani i le faatinoga o auaunaga o le soifua maloloina. Ia, lau Afioga e le gata i lea, ae o lo o taumafai lava foi e faatino uma nei galuega i le taimi lava e tasi a o faagasolo i le taimi nei le ave o le faamuamua i le puipuiga lava o si o tatou atunuu mai le Koviti-19.

Lau Afioga i le Fofoga Fetalai ma le mamalu o le Palemene, ua tele galuega, polokalame aemaise o atinae tetele ua mafai ona faatinoina e le soifua maloloina i totonu o lenei Paeaiga aua le faatinoga o lana auaunaga, ma o lo o faaauauina pea le faatinoina. Ae le gata i lea, ae o lo o taumafai lava foi e faaauauina le atiaaina o tomai ma agavaa o le afaigaluega i vaega eseese uma. Aua e talitonu le manatu, e ui lava i luitau e pei ona faailoaina atu, e tele ma anoanoai luitau, ae o le a ou faataatia lea vaega, o lo o silasila le Atua i le galuega o lo o faia e le afaigaluega i le ao ma le po, e le o malolo.

Ia avea ai nei lenei itula, e avea ai lenei avanoa e avea ai lou tagata faatauavaa e fai ma sui o si a matou Matagaluega o le Soifua Maloloina ma le Vaega Lautele o le Soifua Maloloina e momoli atu ai le agaga faafetai i le tatou Malo e tusa ai ma le lagolagosua ma le fesoasoani i le faafoeina ma le faataunuuina o atinae o le soifua maloloina aua lava le manuia o si o tatou atunuu i lona tulaga aoatetele. E momoli ai foi le agaga faafetai i le faafogafoga mai a Samoa i la outou lagolago malosai mai i le tuualalo atu ma le avatuina o fautuaga, o lapataiga eseese i vaega tatou te galulue faatasi ai, lea o lo o auala mai ai le alofa o le Atua i si o tatou atunuu e oo mai i le taimi nei.

Lau Afioga, e ui ina tele, ae o le a faagata ai i se tuualalo ae...

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga Afoa Amituanai Faleulu Mauli (Palauli Sisifo): Lau Afioga i le Fofoga Fetalai, mo se avanoa faamolemole.

FOFOGA FETALAI: O la e ua faaiu le saunoaga a le Minisita. Ou te fai atu e le i taua lava se mea tau le soifua maloloina i lau saunoaga. O la e ua faaiu le saunoaga a le Minisita. Tulai mai le Minisita e faaiu mai le saunoaga.

Tofa Hon FAIMALOTOA IEMAIMA KIKA STOWER: Ia faafetai i lau Afioga. Ia si ou... ta talanoa i fafo i se isi taimi. Ae lau Afioga i le Fofoga Fetalai, se i fai sau tala i si ou itumalo. Ou te faatalofa ma ofo alofa atu i le paia o si ou itumalo pele. I le amata mai i paia o le aufaigaluega a le Atua o lo o galulue i si o tatou itumalo. I le susu o lau Susuga i le Toeaina o le Ekalesia Faapotopotoga Kerisiano i Samoa lau Susuga Tanielu ma le faletua ia Siataata, le paia o le Ituaiga Sa i a oulua afioga i le Au Ositaulaga, lau Afioga Patele Leaega faapea lau Afioga Patele Matini. Lau Susuga i le Faafeaiga Katoliko lau Susuga Anitelea ma le faletua ia Koleti, le susu o lau susuga i le Faafeagaiga Tausi Matagaluega lau Susuga Faavae ma le faletua, le Epikopo o le Ekalesia Mamona lau Susuga Simeti ma le faletua ia Norma, aemaise foi le faatalofa aloaia atu i a outou afioga i Tamaitai Sa o Aunafaapae o le talalelei ma le laumua o le aoga a le Sacred Heart.

E faatalofa atu foi i lau susuga i le faafeagaiga o le EFKS i si o matou nuu i Manase, lau Susuga Filipino ma le faletua ia Falemoa. Ua faamalo tapuai, faafetai tatalo, faafetai lagolago mai, aemaise o la outou tuualalo i taimi tatou te feiloai ai. E le gata o lo outou nonomanu i le ao ma le po mo se manuia o si o tatou itumalo, ae sa ou lagona ai le mafanafana ma le lototele ona o le pai mai o a outou talosaga. Alofa le Atua ina ia saga faafualoa lo outou soifua, faaauau ai lo outou valaauina, mo se manuia o lo tatou

itumalo, ia aemaise o le atunuu pele o Samoa. Faamanuia pea ia maua pea se agaga se tele, aua le Atua ma lona finagalo.

Le paia e o si ou itumalo pele Gagaifomauga Nu.1, le paia lava lea aua le Afifio o Sao e Fa ma Aiga Sa Umalau, i le Alaalatai o lau Fetalaiga i le Tulafale o le Alii o le Itu lau Tofa Lavea, o Oe o le Pule na muaimalae, Leatipouniu ma le Faasau, faapea le mamalu o le Nofo a ituaiga ia Safotu. Faatalofa ma ofo alofa atu i saoa ma tamaitai, ia faapea le malosi o si o tatou itumalo, tainane foi tupulaga lalovaoga i le tatou nuu tele i Safotu.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Faatalofa aloaia i le paia maualuga o si o tatou nuu i Manase, i le Afio o Taito ma ona Alo, ma Aiga Sa Umalau faapea lau Fetalaiga i le Tauasa. Faatalofa atu foi i faletua ma tausi o saoa ma tamaitai, i le aumaga ma tupulaga talavou, seia oo lava i nai fanau iti.

Le paia e o si ou itumalo, ou te momoli atu le faafetai tele mai i le taele o le agaga, i la outou puleto, la outou faaaloalo, aemaise o la outou faaeaea i sou vaivai ma sou faatauvaa. Sa outou faasei, faatiti ma faapale i la outou auauna, sa ou tiu ai ma seei i le nofoa o le ta itumalo. Sa ou folau ai lou sa ma lou faanaunautaiga, ia maua ni ia se tele aua la outou tapuaiga ma la outou tatalo.

Le paia e o si ou itumalo, ou te faamalulu atu, o le a se tu ma se aga ua le tautamalii i la outou silasila a o ou faatino le tautua o le ta itumalo, o le a foi se auaunaga a o se tautua le lava, e tusa ai ma outou finagalo ma lo outou tapuaiga, ou te tatalo atu ma ou ole atu, ia faamagalo ma faagalo, ona ua pau o se mea ua oo i ai le mafai, ona ua pupuu aao ma utiuti le faasoa a si o tatou Malo. Ae fai mai e fai taimi fai aso le Alii, ma e toe oso foi le la. O le tatalo a la outou auauna, ia to ni manu mai i le Atua, o ia e iai le sosia o tamaoaga uma, mo ni faamanuiaga se tele mo si o ta itumalo, faapea Samoa si o tatou atunuu pele.

Lou itumalo Gagaifomauga Nu.1, a o alo atu le faiga filifiliga a si o tatou atunuu, tatou filifili ia ma le Atua, aua o Ia e na te totofi Malo. O le a se taunuuga o fea e i ai lo outou finagalo, ou te augofie ma o lo o maua le malosi mai le Atua, e tautua oe lou itumalo pele, aua se manuia o nai o tatou tagata, aemaise o Samoa i le afua mai i mauga tetele, seia oo lava i nai fanau iti.

Ia lau Afioga i le Fofoga Fetalaiga, ia o lea foi ua faailo le Maota, aemaise o le faafofoga Samoa, i le malolo manumalo ai o lau Afioga i le Fofoga Fetalaiga, ia aemaise nisi o ao sinasina o le Palemene, ua afu la outou tautua i le Maota Fono o lo o fausia ai Tulafono ma lipoi ai upufai ma tonu fai faapea le tamaoaga o Samoa. Lau Afioga i le Fofoga Fetalaiga o le Maota, lau Afioga Leaupepe Toleafoa Faafisi, lau Afioga i le Minisita Tuitama Dr.

Leao Talalelei Tuitama, lau Afioga Aeau Peniamina Leavai, o le sa seei foi i le nofoa o le Fofoga Fetalai o le Palemene, faapea lau Afioga Faasootauloa Pati, sa seei foi i le Kapeneta. Ua faamalo le galulue, malo le toa, malo i lo outou lototetele, faafetai i le tautua atunuu. Ia faamanuia le Atua i la outou faigamalologa, saga faafualoa e le Atua lo outou soifua, ia aua nisi feau ma galuega o lo o faatali mai i aiga, nuu aemaise le tautuaina o le Ekalesia. O le tala moni lava, o le a misia uma outou.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Lau Afioga i le Minisita Lagolago lau Afioga Mulipola Laki, ia malo le galue malo le tautua, manuia lau faigamalologa mo lenei vaitaimi, ia ae toe oso pea le la. La outou saofaiga i Ofisa Sili o Matagaluega ma Faalapotopotoga Tumaoti a le Malo ma outou Lagolago ma aufaigaluega a Matagaluega taitasi, ua faamalo le galulue punouai. Malo le le faalogologo tiga. Ua faafetai le tautua atunuu. Ua na ona matou faia o tonu ma faaiuga e ala i a outou fautuaga, ae o outou o lo o faatinoina ma faataunuu a tatou galuega ma nai a outou aufaigaluega aua le tapuaiga a Samoa.

Lau Afioga i le Taitaifono o le Komiti o Faalavelave Faafuasei, faapea le Komiti Aoao, faafetai, faafetai, faafetai tele lava. Faafetai i la outou lagolago malosi, e le gata o fautuaga, ae o le faatinoina o galuega faigata i le ao ma le po, aua la outou lagolago malosi e fesoasoani i le puipuiga o le soifua mai i le faamai matautia o le Koviti-19. Puipui e le Atua lo outou soifua, faapea le aufaigaluega atoa, i galuega fita o lo o feagai ma outou i aso taitasi.

O si o matou Matagaluega o le Soifua Maloloina, i lau Afioga i le Ofisa Sili le Pulega ma le aufaigaluega atoa, malo le onosai, faafetai lo outou lavapapale. E ui lava ina tele luitau o feagai ma outou i le tele o taimi, ia aemaise foi o le tele o faitioga ma faasea, ae o lo o ave pea la outou faamuamua i le puipuiga o Samoa si o tatou atunuu pele. E le o taulia ai le tele o isi galuega ma le toagaogao o le tatou aufaigaluega i vaega eseese o le auaunaga, alofagia e le Atua puipui lo outou soifua ma so tatou ola vaivai, aemaise o nai o outou matua, aiga ma nai a outou fanau.

Ou te fia faaleo lou agaga faafetai tele i lau Minisita Lagolago, lau Afioga Tofa Lio Foleni, faamalo galue, faafetai le lagolago malosi mai i le tausoaia o le ta galuega. O le tele o taimi ou te galue atu i Upolu nei, a o lo o e galue malosi mai i Savaii, faailoa mai vaega eseese o lo o moomia. A ou manaomia foi oe i Apia e te malaga mai lava, faamanuia tele le Atua i lau Afioga, le faletua ma le aigaalii.

Lau Afioga i le Fofoga Fetalai, ae e le i faaiuina le folasaga o lenei sui usufono, ou te fia molimoli le agaga faafetai tele faatasi ai ma ou alofaaga i nai ou aiga uma o faafogafoga mai, e le gata i Samoa nei ae faapea foi atunuu eseese, o lo o alaala ma nopiai ai i atunuu i fafo. Faafetai le

lagolago, faafetai lo outou alofa, faafetai mo a outou tatalo ma lo outou tapuaiga.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

E faatalofa atu ma ou ofo alofa atu i aiga uma lava o uso ma tuagane aemaise o fanau pele, ia aemaise ai ou te faatalofa atu i taulaga tagata uma lava o lenei aiga, o lo o taase i nuu mamao o lo o galulue faapea foi latou o lo o galulue i Samoa nei i a outou afioga i ositaulaga, tamaitaisa aemaise si ou uso pele taupousa e tai valaau mai lava i po uma. Sister Sose, faafetai le tatalo malo le galue. Ia e faapea foi i Alii Fesoasoani ma o latou faletua, malo lava, faafetai tatalo, malo le tapuai, vaelua tutusa e le Atua so tatou manuia.

Ia i le mamalu o sui usufono uma o le tatou Palemene o lenei Paeaiga, faapea le tapuaiga a Samoa i le afua mai i mauga tetele seia paia mauga iti, ia manuia tele le alo atu i le faiga filifiliga a si o tatou atunuu e le o toe mamao, aemaise o le tatou tatalo faatasi pea i le Atua ia faaauau pea lona alofa ma lona agalelei mo Samoa, a o tatou i ai pea i nei taimi faigata, ona o le faamai o lo o nofo popole ai le lalolagi atoa, soifua ma ia manuia.

Na faaalua le agaga fiafia o le Palemene i le patipati o latou aao i le maea ai o le saunoaga talifuaitau a le Minisita mo le Soifua Maloloina.

FOFOGA FETALAI: Ia malo saunoa, ua faafofoga foi le itumalo, faafofoga le atunuu, ia aemaise foi le Palemene i le saunoaga matagofie a lau Afioga i le Minisita. Ia o le tatou galuega e faapena, e tatou te faafesoai i tulaga o lo o faapena ona taoto i ai le Fonotaga mulimuli o lenei Paeaiga.

Ia leaga o le tatou toe fono lenei o lenei Paeaiga, e manatu lava le Nofoa e talatala lava avanoa mo le Palemene i sui usufono ia avanoa e saunoa ai i o latou itumalo, ia e tatau foi ona faapena ona oo i ai saunoaga a Minisita. Ae o aso ia, o matou foi na omai ai, e ese lava saunoaga a Minisita ese le saunoaga a le Palemene. O saunoaga a le Palemene e tiutalaloa i le faafofoga mai a itumalo ma le latou faafetai i totonu lava o le lotoifale o le Malo. Ia ae o le saunoaga faa-Minisita, ia e faapena e le tau fautuaina e le matapia le manaia, ui i lea, leaga o le tatou Fono mulimuli lenei.

Ia tulai mai lau Afioga i le Minisita o Tupe Maua, e saunoa e tusa ai ma mea sa laga e sui usufono mamalu ia ma le faapupulaga foi o nisi o mea, o faapena ona taoto ai fuafuaga a le Matagaluega.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga Hon TIALAVEA FEA LENIU TIONISIO HUNT (Minisita mo Tupe Maua & Leoleo ma Falepuipui): Faafetai i lau Afioga i le Fofoga Fetalai, maua le avanoa e fai atu ai se faamatalaga i Matagaluega o lo o ma tauaveina ma le Afioga i le Minisita Lagolago. Ae le i fai atua se faamatalaga lau Afioga i le Fofoga Fetalai, e ese foi au i lou sui usufono ma lou itumalo i lenei vaitau. O lenei ua faaiuiu lenei 5 tausaga, ia ae ua vaelua le itumalo.

O lea o le a avea ia lenei avanoa e fai ai sau faafetai i lou itumalo o le Vaa o Fonoti, ia ona ou tali uma ai lea e faaauau le folasaga, e le umi foi lau Afioga. Avea ia lenei avanoa taua ou te faaleo ai lau faafetai tele, i le tapuaiga mamalu a le aufueloloa o le Talalelei, o lo o latou taia le aotaulavelave o le faanuupo, ae apoapo le aoasinasina i le soifua faaleagaga o si ou itumalo mo le Atua. Ia tupu tele le faamoemoe o lona Malo e faavavau. Ou te talitonu, o a outou tatalo, o lenei ua tau manuia ai lou tauaveina o le Nofoa o le tatou itumalo i lenei 5 tausaga aua upufai a Samoa. Ua tauavagalimaina foi se leo vaivai o la outou auauna, i tonufai o si o tatou atunuu e ala i le tofi Minisita, e pei ona filifilia ai au, la outou auauna i le Paeaiga lona XVI o le Palemene o le Malo o Samoa.

Faafetai tele i lau Susuga i le Taitai, Tama o le EFKS, lau Susuga Asotasi Mutime. Faafetai i le Afioga ia Patele Une, mo fautuaga sa tuuina mai, sa maua ai le lototele e finau pea e faatino tiute i le tofiga faa-Minisita. Faafetai i le paia o le aufaigaluega totofi a le Atua, i totonu o si o tatou itumalo. Faafetai i lo outou lagolago ia au nei, na manatu ea Asomua, o le a sii sona fale i le mauga? Ana le seanoa la outou faaeaea, ma le lagolago mai, o le upu moni e ae fua lava le faiva. Ua moni ai saafiafiaga a le fai Salamo o Tavita fai mai, ‘ o le mea e i ai Keriso, e i ai foi le alofa. O lau tatalo, ia utupupuina atu le meaalofa a le Agaga Paia, faatumu la outou utu, aua lo outou pale feagai, ma le folafolaina o le finagalo o le Atua, i totonu o si o tatou itumalo le Vaa o Fonoti. Faafetai, faafetai, faafetai tele. Ia faamanuia le Atua.

Ou te le faagaloina foi ia Atua, ou te le faagaloina Afia i si ona vao, i le tapuaiga mamalu a si ou itumalo i le Vaa o Fonoti. Le Paia i le Afio o Ulualofaiga ma Aiga e Lua ma le nofo a Usoalii. Afio le Gafa ma le Aloasina, maliu mai le Toafa, ma le Matua ia Talamaivao. Maliu mai e na taitai, ia Atua o le Fauono.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afio Gafa ma le Alosina ma Suafa, lau Fetalai i le Too o le Fua o Molioo ma lo outou aiga sa Molioo. Alalatai le ailaoa aemaise Malepeai o le aitu o le nuu. Ona o la outou faaaloalo i lou nei tagata faatauvaa, ua mafua ai ona ou tulai i le 10 tausaga e tauave le tofi o lo tatou itumalo aua upufai o le tatou atunuu o Samoa i lana Palemene. O upu a le atunuu, o faiva e tapuaia e manuia. Faafetai mo le tapuaiga, faafetai tele, mo le alofa faafetai le faaaloalo. Ua outou topule o lea ua ou sapaia faatuaoleele. Faafetai lagolago mai, faafetai i la outou faaeaea.

Ae ou te asu atu vai malu i puega, pe afai ua le tau lau o nisi o atinae i totonu o si o tatou itumalo. Ou te talitonu o ai lava o le a tulai mai i le faiga filifiliga o lumanai nei, o ia lena na te faauma nisi o atinae o totoe, aua le manuia o le itumalo i le lumanai.

Ou te faaaogaina lenei avanoa ou te faamavae aloaia atu ai mai le tofi faipule o le tatou itumalo. Ua inu malie faleselau o Lufasiaitu ae tofumalemo le aiga sa Tagaloalagi, e pei o le upu i lo ta itumalo. Ona o la outou faaaloalo e ala i le tofi faipule sa ou tauaveina i lenei 10 tausaga, faafetai, faafetai, faafetai.

Lau Afioga i le Fofoga Fetalai, o le a amata atu le tautalaga i Matagaluega na ou tauaveina. O le Matagaluega o Leoleo Falepuipui ma le Toefuataina, ma le Matagaluega o Tupe Maua, Tiute. Ae o le a amata atu i le Matagaluega o Leoleo. E muamua lava ona ou faatulou i lau faafofogaaga Samoa, i le afio a lau Afioga i Le Ao mamalu o le Malo o Samoa. Lau Afioga Tuimalealiifano Sualauvi II ma lau Masiofo. Afio lau Afioga i le Sui o le Fono o Sui Tofia, lau Afioga Le Mamea Tuiletufuga Ropati ma lou faletua. Afio lau Afioga i le Fofoga Fetalai o le Maota o le Fono sili a le Malo o Samoa, lau Afioga Toleafoa Faafisi faapea lau Afioga i le sui Fofoga Fetalai. Afio lau Afioga i le Palemia, lau susuga Tuilaepa Dr. Sailele Malielegaoui, faapea Minisita uma o le Kapeneta ae tainane le mamalu uma o sui usufono o le Palemene o le Malo o Samoa.

Lau Afioga i le Faamasino Sili, lau Afioga i le Peresetene o Fanua ma Suafa, le vaega o Faamasino o le Faamasinoga o Samoa, Ofisa Sili o Pulega o Matagaluega, Matagaluega tumaoti, aemaise le au faipisinisi tumaoti o Samoa uma. Le paia lava mai Saua seia paia Fili ma Puletuu, na tauilo ai Malo i le usuga a Tumua ma Pule Ituau ma Alataua, Aiga i le Tai ma le Vaa o Fonoti. O Tama ma o latou Aiga, Aiga ma o latou Tama, Aiga o Nofo ma Aiga o Papa ma Aiga o Taifaifa.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

E le faagaloina foi le tapuaiga a le motu i Sasae, ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. Tootoo o le Faleula ma upu i le Manuatele, ae manatua foi le Aiga sa Levi, i so o se Fatafaitaulaga i totonu o si o tatou atunuu, o lo o faanonomanu ma nofotatalo aua se lumanai manuia o Samoa.

O paia na ma mamalu o lenei taeao, o le a nuunuu atu faatini o tausala, aua e i ai lou manatu o Samoa ua maea ona tosi lautima faaula ua oo, e le toe autalatalaina i sou leo, aua o Samoa ua maea ona samasama sugalu vaisausauina ona paia ma mamalu.

E faamuamua se faamaisega i le afioaga ia Tagaifoloa Vaelaa ma lou alo. E tusa ai ma le toesea o le tama o le aiga, le Afioga ia Vaafusuaga Toleafoa Vaafusuaga Ken Poutoa. Ia faamaisa le Atua ia te oe ma lou alo, e talitonu le faamoemoe, e le taumate le oo atu o le Aposetolo o le Divine Mercy e faatasi ma lona Alii. Sa galue ma tautua ai i le ituaiga, amuia ia, o lo o maua mai e le Alii, o lo o faapea ona ia fai. Aemaise foi le uso ia Lealailepule e tusa ai ma le toesea o le tina o le aiga, talitonu ia faamafanafanaina foi le tama, ona o le valaau paia a le Atua i le tina.

Ae tatou te patipatia pea le agalelei o le Atua Silisili ese ina ua mafai ona taitai manuia mai lo tatou soifua ma se ola. O lenei ua tatou feiloai ai i le vaa o manu a e le o vaa o mala. Ua mafua ai lenei taeao fesilasilafai, ou te talitonu foi i lenei taeao, e le o po se lilo i totonu o lenei Maota Fono, aua o lea ua toe o se aga, ona tatou aulia loa lea o le Paeaiga Lona XVI lenei o le Palemene tutoatasi o Samoa. Ae o lo o faapea lava ona maua pea e i tatou le manuia mai le Atua Soifua, e faatino ai faiva ma tiute eseese na tofifi i ai i tatou mo le 5 tausaga o le a faamaeaina.

Ou te tulai atu ma le faaaloalo i lou tulaga o le Minista o le Matagaluega o Leoleo ma Falepuipui ma le Toefuataina, e faaleoina ma momoli le agaga faafetai ia Samoa aao, i tupu ma ee, le aufaigaluega a le Atua i so o se Fatafaitaulaga i totonu o nuu ma alalafaga. O le pulega a alii ma faipule, saofaiga a tina ma tamaitai, aemaise le malosia o nuu o lo o faafogafoga mai i so o se tafa o Samoa ma le lalolagi atoa. Faafetai, fafetai, faafetai tele mo le lagolagoina o galuega fai a le Matagaluega o Leoleo Falepuipui ma le Toefuataina i lenei Paeaiga. O le a faaiuiu lou tauaveina ou te talitonu, o le savaliga o le 5 tausaga ua mavae atu e le i faigofie. O se faigamalaga sa poia i mala ma faigata. Sa tele ni faafitauli na fetaii ma le Matagaluega, aepeita, sa le faavaivai ai le Matagaluega i le faatinoina o lana auunaga i le malosia ma le mafai e gata mai ai. O lenei ua tatou oaoa ai nei i Faleseu ae sapi i maa o malie.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ua lamalama faaiu la tatou savaliga, ae o lo o sologa lelei le faatinoina o tiute ma tofiga a i latou uma o lo o galulue i totonu o lenei Matagaluega, i le tautuaina o Samoa ma ona tagata.

Ae fia avea lenei avanoa taua, e faafeiloai ai le faafofoga mai a Samoa atoa aemaise sui usufono a le Palemene i lana Paeaiga Lona XVI. I galuega sa fita i tuga i ai le aufaigaluega o le Matagaluega o Leoleo, Falepuipui ma le Toefuataina i totonu o le 5 tausaga lenei o le a faamaeaina.

E pei ona silafia, o le masina o Mati i le tausaga na tea nei 2020, sa faapea ona toe tuufaatasia ai nei auunaga e 2, i lalo o le faamalumaluga a le Komesina o Leoleo. Na faapea ai ona ou tauaveina le tofiga Minisita ma le Minisita Lagolago, seia oo mai i lenei taeao. O lea la e fia amata atu le folasaga i le auunaga a le Falepuipui ma le Toefuataina.

O le aso 1 Iulai 2016, sa filifili ai au e tauaveina le tofi Minisita ma le tofa a Sooalo Mene o le Minisita Lagolago o le Matagaluega o Falepuipui ma le Ola Toefuataina. O le Matagaluega foi lenei o Falepuipui ma Toefuataina, e le i leva ona vavaeeseina mai i le Matagaluega o Leoleo i le tausaga 2014. I lalo o le Tulafono o Falepuipui ma Toefuataina 2013, o lo o faatulafonoina ai matafaioi tauave o lenei Matagaluega. I lalo o taiala a le Komesina o Falepuipui, sau se taimi ona ou oo lea e faamatala le Afioga ia Taitosaua ma nisi. O galuega faafalepuipui e le faigofie, ma e tele foi faigata ma luitau sa feagai ai. E le gata o au nei o le Minisita aemaise foi o le Komesina ma le aufaigaluega atoa. E amata mai lenei Paeaiga, o lo o galulue le falepuipui i Tafaigata, a o lenei ua siitia atu i Tanumalala. O le auunaga faafalepuipui, e 3 lava falepuipui i Samoa nei.

O Tanumalala ua faapea ona faanofosala ai le toatele o le mamalu o le atunuu, o lo o tuli o latou faasalaga. O lo o i ai foi ma le falepuipui i Oloamanu ma Vaiaata i Savaii.

Lau Afioga i le Fofoga Fetalai o le aso 1 Iulai 2016, po o le taimi o le 10:30 i le po, na ou oo atu ai le falepuipui i Tafaigata. O le aso lava lea na tofia ai au. Na ala ona ou alu i le taimi lea, ou te fia vaai po o le a le tulaga o i ai le falepuipui i le po. Ona e tuuina mai ia te a'u le taitaiga o le falepuipui ua 629 pagota o lo o i ai. O se vaaiga faamomoiloto lau Afioga. Na ou vaaia i lea po ua matua tumu lava le falepuipui, e le ofi. I le potu sa ou vaaia ma ou agai i ai, e talitonu o le tulaga na i ai, ua tatau ona fai se falepuipui fou. O le aso lava na sosoo ai na ou oo ai i le Afioga i le Palemia, ma talosaga pe mafai ona faataunuaina le fausiaina o le falepuipui i Tanumalala.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Sa amata mai e le Afioga ia Sala, sa Minisita o Leoleo ma Falepuipui a ou Minisita Lagolago, lea na amata ai ona fausia le falepuipui. O taiala faavae mo le faatinoina o tiute tauave o le Tulafono o Falepuipui ma Toefuataina 2013 (3) section 3, e fitoitonu lea i ni autu se 8 e faapea. Faamautinoa o lo o puleaina falepuipui e tusa ai ma tu ma aganuu a Samoa, ma itu tau amio pulea i nuu ma afioaga, i se faiga e faafaigofie ai ona toe faafoi atu i le olaga masani i totonu o nuu ma afioaga i Samoa. O se pagota ua tatala mai i le falepuipui.

2. Aloaia tulaga faataatitia faava-o-Malo, ma noataga faasino i le faafoeina o pagota.

3. Faaaoga tulaga atoatoa e ono mafai ai ona faatino aia tatau, ma noataga o le feagaiga a Malo Aufaatasi, e taofia ai faiga faailoga lanu, faailoga tagata uma e faasaga i tina ma tamaitai, CEDAW. Ma le feagaiga ma le Malo Aufaatasi aia tatau a le tamaititi, CRC.

4. Ia faatumauina le amio pulea ma le nofo lelei i se uiga le faaituau, ma ia le toe i ai le tulaga e taotaomia ai le pulea lelei o falepuipui ma pagota e tusa ai ma le aganuu a Samoa.

5. Faatino polokalame fesoasoani i le fausiaina o mafaufauga ma amioga a pagota ina ia tuutiitia le taofiofi i totonu o potu, ae tuu atu i ai galuega talafeagai mo le ola toefuataina.

6. Toe poupouina o olaga o pagota ua faamaonia solitulafono. Ma ia faamalosi lo latou tulaga amanaiaina, ma se agaga e tauaveina ai matafaioi tau le tagata lava ia. Ina ia mafai ona toe atiae a latou amio.

7. E tatau i le aufaigaluega a le falepuipui ona avea ma taitai e amio pulea. Ina ia mafai ona avea ma taitaiga lelei, aua ni suiga lelei mo pagota. Faamautinoaina le togafitigaina o pagota, ua aafia i le faamai pipisi. Pe o lo o mafatia i so o se gasegase matuia, po o so o se tulaga faaletonu i le tino. O i o lo o faavae mai ai nisi o suiga sa faatinoina mai i le tausaga 2016, e pei ona tatou i ai i lenei vaitau. E pei lava ona faailoa atu i le taimi ua sola, e amata mai i le Paeaiga XVI, e le i leva ona tuueseeseina lenei auaunaga, mai i le Matagaluega o Leoleo. E talitonu le naunautaiga mo lenei tuueseeseina, ia mafai ona faatino i tiute fai o le Matagaluega o Leoleo, ae o le Matagaluega o Falepuipui ma le Toefuataina, i se tulaga maualuga ma lelei. O lea sa faasee mai loa lenei Matagaluega Fou, ou te tauaveina i le 2016.

26 FEPUARI 2021

**Tulafono Tau Faaofi o le Faatatauina o Tupe Faaopopo (Nu.1)
2020/2021 – felafolafoaiga faaauau i luga o le faitauga faalua**

O le tausaga e 2016, o le 2 ai lea o tausaga talu ona tuueseeseina Leoleo ma Falepuipui, o nisi nei o matatia sa faapea ona ausiaina. Matatia na taliaina ai e le Kapeneta e ala i lana FK i le 15/08, le fausiaina o le Falepuipui i Tanumalala, na faamatuuina mai ia le 555 eka, o fanua o le Malo mo lenei faamoemoe. Faataatitia Tulafono Faatonutonu, mo le taialaina o pagota e Aso Sa i tua, Weekend Release Regulation. Tulai mai i le taimi lea lau Afioga i le Fofoga Fetalai, masalo po o le 70 pasene o pagota e 600+ pagota e o i tua i le aso. O lea na toe faatulaga ai le Tulafono Faatonutonu lea.

Faamautu le Taiala o Galuega Corporate Plans 2016 e oo mai i le 2020. Faamautu se tusi Operation Manual Procedures. Sainia se maliega i le va o le Matagaluega o Falepuipui ma Toefuataina ma le Malo o Niu Sila, mo le faafesoai o tomai, mo le puleaina o Falepuipui. Fausiaina lea o le Falepuipui i Tanumalala, siitia polokalame toe fuataina mo pagota. I le tausaga 2016 o lo o faamauina ai tulaga nei, aofaiga o le afaigaluega e 88, 30 tamaitai, 50 alii. Aofaiga o pagota e taofia e 629. Aofaiga o polokalame mo le toe fuataina e 31.

FOFOGA FETALAI: Malo, ou te le fia faalavelaveina le saunoaga a lau Afioga i le Minisita, ae na ona ou piiama i lau saunoaga, ona o lea ua o tataou taunuu i le tatou taimi malolo i le aoauli nei. E tatou toe amata ai lea i le 6:00 i le afiafi.

Ia ma lou faaaloalo, o le a faataatiaese galuega a le Fono Aoaofaifaitulafono seia aulia le itula e 6:00 i le afiafi nanei, ona tatou toe amata ai lea.

Ia ma lou faaaloalo faafetai.

Na faataatiaese Taulumaga a le Fono Aoaofaifaitulafono i le itula e 11:58 i le taeao ma toe faaauau i le itula e 6:10 i le afiafi.

Na toe faaauau felafolafoaiga ma Tali a le Malo i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

SUI FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaifaitulafono.

Avea ia lenei avanoa e toe faafeiloai ma faatalofa atu i le paia maualuga o le Maota, i le afio o lau Afioga i le Palemia, le Aiga Kapeneta ae faapea foi a outou Afioga i Minisita Lagolago. Ia, aemaise foi lea Itu o le Malu i Taitaifono o Komiti Tumau Faa-Palemene ma sui usufono mamalu uma filifilia aua lenei Fonotaga. Malo le onosai. E manatu ua maua foi se faasiliga malosi i faiga malologa sa tatou alo i ai i lenei aoauli.

E faataatiaese Taulumaga a le Fono Aoa o talifuaitau le Afioga i le Minisita o Tupe Maua ma le Matagaluega o Leoleo ma Falepuipui. Ma ou te tapa ma le faaloalo lau Afioga i le Minisita, tulai mai e faaauau lau saunoaga.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai mo le avanoa o le a toe amata ai le folasaga a le Matagaluega o Falepuipui ma Toefuataina. O le tausaga lea e 2016 sa 628 pagota sa i ai. O le tausaga foi lea na ma oo atu ai ma le Minisita Lagolago ma vaai le Afioga i le Faamasino Sili po o le a sana fesoasoani i le tulaga pagatia ua oo i ai le falepuipui i Tafaigata ona o le toatele naua o le faitauaofai o pagota. Mai le 2016 sa ma o atu ai ma talosagaina, e oo mai i le amataga o le 2018 po o le faaiuga o le 2017 ua 324 pagota i uta.

E 304 pagota na aveesea i le tulaga lea ua taofiofi le avatu i le au taofia aemaise foi le palola ua faaoga lelei le palola aua le faamagaloina atu i tua o pagota ua tataua ona o i tua i le palola, ua afa le faitauaofai. A o le malie foi o le ma o atu ma le Afioga ia Sooalo, le taimi lea o la e ma te toalua. Sa ma o ma le ma popole po o le a se saunoaga a le Faamasino Sili ia maua. Ae ma o i totonu ae fai mai le Toeaina, “Sole, ua 24 tausaga o ou Faamasino Sili faatoa nofo atu lea o se Minisita ma se Minisita Lagolago i lona Ofisa.” Ma te omai lava i lena aso ua ma fiafia ua mautinoa ua maua le mea sa ma o atu i ai o le faaitiitia o pagota. O le fua la lea e 304 na aveese i le 2017. I le 2018, faatino se lipoti mo iloiloga o polokalame aemaise o aooga manaomia training needs analysis report. E faamauina ai i lenei iloiloga vaega o lo o manaomia ona siitia ai le tomai mo pagota. Faagasolo pea le fausia o le falepuipui i Tanumalala. Siitia le aofai o le afaigaluega e 128, faaitiitia pagota i le 324. Polokalame Toefuataina 35.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Tausaga 2019 tatala aloaia le galuega o le falepuipui i Tanumalala ia Iuni, siitia atu pagota mai Tafaigata i Tanumalala. Amatalia galuega mo le falepuipui i Vaiaata. Amatalia galuega mo le faamamaina o le taulaga e pagota mai Olomanu. Siitia le aofaiga o le afaigaluega e 138. Aofaiga o

pagota e 278, polokalame e 48. I le 2020 maea le galuega o le fausiaina o le ofisa o le auunaga lautele i Tanumalala – Administration block completed. Aofaiga o le aufaigaluega e 145, aofaiga o pagota e 278. O le falepuipui i Tanumalala ua siitia ai le tulaga o le lotoifale, ua sili atu i le tulaga sa i ai le falepuipui i Tafaigata. E le gata i lea, ua siomia e le pa sima e faafaigata ai ona toe agai i tua pagota seivagana ai polokalame mo le toefuataina. O lo o faaauauina pea le faatinoina.

O vaega uma nei ua fausiaina i Tanumalala, sela, ofisa o galuega (warden Office), o le tower, pa e siomia ai le falepuipui, sela mo i latou e le usitaia galuega po o amio le pulea i totonu o le falepuipui, ofisa mo auunaga lautele, galuega tau paipa, suavai, o le auala, afi faaleoleo, tanevai, pa e vaeluaina ai le falepuipui mo pagota alii ma tamaitai, o lo o faagasolo. Apitaga mo le aufaigaluega, falepuipui i Vaiaata. O le aofaiga atoa o tupe faaalu mo galuega faatino mo le siitia o le auunaga mo falepuipui aemaise o le siitia o apitaga e faaaogaina e i latou o lo o nofosala i le falepuipui e \$20,717,775. O lea tupe na aumai uma i lalo o le paketi a le Malo, e le i i ai se fesoasoani na maua mai fafo. Faafetai i le Afioga i le Minisita o Tupe ma le Ofisa o Tupe e tusa o lea fesoasoani i le falepuipui. E pei lava ona faailoa atu e le gata i le faaleleia o fale mo pagota faafalepuipuia, ae ua mautinoa le malupuipuia o le mamalu o le atunuu atoa.

E pei foi ona faailoa atu i le Tulafono o Falepuipui 2013, o lo o laualuga ai le taua o le faaaogaina lea o tu ma aganuu faa-Samoa mo tatou lava tagata o lo o nofosala ma tuli o latou faasalaga i so o se falepuipui i totonu o Samoa. Ua faamautuina foi le tele o galuega toefuataina, ua finagalo le Malo e tuuina atu e faatino e pagota, e pei ona i ai le faamamaina o le taulaga i Apia, aemaise o Mapuifagalele o lo o tausia ai tama ma tina matutua. O lenei galuega sa talosagaina e tamaitai sa ona o le taugata o le togiina o le moaina o le vao lea na faaoga ai pagota.

O le polokalame faafaatoaga, polokalame suisui, bakery ma le faafugaina o ao. Fausiaina o le falepuipui i Vaiaata i Savaii ma le Ofisa o le Ao o le Malo i Vailele e pei ona i ai le tomai o nisi o alii o lo o tuli o latou faasalaga. Polokalame a Ekalesia eseese, faamalositino mo le soifua maloloina.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Polokalame mo le aganuu Samoa i aso Gafua taitasi, fomai faapitoa mo pagota mamai o lo o faatinoina i Aso Lulu o aso taitasi. Polokalame mo pagota e 60 agai i luga le matutua, matimati programme. O nei polokalame uma o lo o laualuga ai le taua o tu ma aganuu a Samoa. O le naunautaiga ia uunai i latou o lo o tuli o latou faasalaga, e maua se tomai aua le maea ai o le tuliga o faasalaga ae faafaigofie ai ona toe foi atu i aiga. E ui lava i nei

galuega uma, peitai, sa i ai lava le faamatala, aemaise le le atoatoa o le faatinoina o galuega.

I le masina o Mati 2020 i le fonotaga a le Palemene sa faapea ona toe tuuina atu ai le puleaina o le falepuipui ma le toefuataina i lalo o le faamalumaluga a le Komesina o Leoleo e pei ona i ai i le taimi nei. O lenei galuega tuufaatasi sa tofia ai au ma le Tofa Lenatai o le Minisita Lagolago o lenei Matagaluega.

Auaunaga tau leoleo. E ao pea ona faailoa galuega sa gapatia ai le afaigaluega a le Matagaluega o Leoleo mai le 2016 seia paia mai le 2020. O le galuega faa-leoleo o lo o limataitaiina e le Tulafono o Galuega Tau Leoleo 2009 ma le Tulafono Faatonutonu o Galuega Tau Leoleo 2010. O le sini autu o galuega tau leoleo o lo o fitoitonu lea i vaega nei. 1. Faatumauina o Tulafono ma poloaiga i totonu o Samoa atoa. 2. Tausiga o le filemu i totonu o Samoa atoa. 3. Puipuiga o le ola ma meatotino i totonu o Samoa. Le taofia ma mataituina ma le suesueina o soligatulafono i totonu o le atunuu. Faamallosia faalauaitetele o le Tulafono i totonu o Samoa ma so o se isi lava Tulafono e faaee atu ai galuega tauave, malosiaga ma matafaioi i totonu o galuega tau leoleo, o sui uma po o nisi o ona sui. Tausiga o le filemu i le va faaitulagi po o le faava-o-Malo, international peace keeping missions.

O lenei Matagaluega e lona 3 i ai Matagaluega tetele a le Malo. I totonu lava o le auaunaga faa-leoleo, e tele ni vaega o lo o mafai ona tuuina atu auaunaga eseese mo le mamalu o le atunuu. O nei vaega e i ai Ofisa nei, Ofisa o le Komesina, Pulega Lagolago, Vaega e mataituina amioga pulea, professional standards unit, loia faufautua, suetusi faalotoifale, auaunaga lautele i Upolu ma auaunaga lautele i Savaii. Vaega o le faili, puleaina o taifau, vaega o faiga paaga, vaega suesue faapitoa, vaega o sauaga i totonu o aiga, vaega o suesuega faasaienisi, vaega o faamaumauga, vaega o agavaa tau leoleo faapitoa, vaega o leoleo o le gataifale.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Vaega o fesootaiga, vaega o taavale afi, vaega o auupega malolosi, vaega o tupe, vaega o aseta, vaega o faamatalaga faatekonolosi, vaega e puleina le faafaigaluegaina mai o tagata faigaluega, vaega o aoaoga, vaega o faiga faavae ma fuafuaga mamao. O galuega tetele sa faatino, e le gata i galuega faatino masani a le Matagaluega ua maea ona fuafuaina i tausaga taitasi, e le gata i le tali atu i faafitauli o le mamalu o le atunuu, suesueina o soligatulafono ma le tuuina atu o mataupu tau soligatulafono i le faamasinoga, a o le puipuiga ma le faatumauina o le saogalemu ma le

mamalu o le atunuu i vaitaimi pisi po o taligamalo a si o tatou atunuu. Feagai pea ma Matagaluega i taimi uma e pei ona i ai galuega e masani ona faatino.

Ma o nei galuega e aofia le 24 itula o galulue, faamautuina o le Tutoatasi i tausaga taitasi, Teuila, galuega mo aso fiafia o le kerisimasi ma le tausaga fou. E le gata la i nei galuega o lo o faatino i tausaga taitasi, ae o lo o faamauina foi nisi o galuega tetele sa feagai ma le Matagaluega o lo o faaaogaina ai le aufaigaluega i le tele o taimi e pei ona i ai. 2016, malupuipua o le faiga palota a le atunuu i lena tausaga. Fonotaga, green climate funding. 2017, taaloga lakapi faava-o-Malo. Sauniga faapitoa mo le faatautaina o le Ao o le Malo o Samoa, Afioga Tuimalealiifano Vaaletoa Sualauvi II, 21 Iulai 2017. Fonotaga a Taitai o le Malo o le Pasefika, asiasi mai i Samoa le Palemia o Niu Sila, taaloga lakapi faava-o-Malo Queensland Red ma le Auckland Blue. Asiasi mai i Samoa le Kovana o Ausetalia.

I le 2018 o galuega faatino i le taimi o le afa o Gita. Asiasi mai i Samoa le Palemia o Niu Sila Jacinta Arden. Mataupu na tulai mai i le polokaina o le auala i Luatuanuu. Falelauasiga o le Sui Ao, Honourable Tuiloma Pule Lameko. Mataupu na tulai mai i le maketi i Salelologa ma Salelavalu. Taaloga lakapi faava-o-Malo Manu Samoa ma Siamani. I le 2019, taaloga lona 16 a le Pasefika. Asiasi mai i Samoa le Perenise Norway. Asiasi mai i Samoa le Peresetene o le Ekalesia o le Au Paia o Aso e Gata ai. Fonotaga a Faamasino Sili o le Pasefika, Taaloga Lakapi faava-o-Malo, Fonotaga a Minisita o Faigafaiva a Asia, Karipeane ma le Pasefika. Fonotaga a Minisita o le Pacific Region Energy & Transport. 2019 i le masina o Iuni sa toe auina atu ai le Nafanua i Ausetalia i le maea ai o le 30 tausaga o auauna mo Samoa i le vaega o le gataifale.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

O le masina o Oketopa i le tausaga lava lea sa taliu mai ai le auvaa ma le Nafanua 2 mo le faaauauina o galuega mo le puipuiga o le gataifale o le Pasefika mai le faaaogaina faasolitulafono mo fagotaga, aemaise le feaveaina o fualaau faasaina ma isi lava vaega trans-nationa crime. Amatalia le polokalame faapitoa e faaaogaina ai se vaalele mo le mataituina o gataifale o atunuu o le Pasefika mai le fagotaina faasolitulafono e nisi, area surveillance programme...

Tofa Olo Fiti Afoa Vaai (Salega Sasae): Lau Afioga i le Fofoga Fetalai...

SUI FOFOGA FETALAI: Malie lau Afioga i le Minisita, se i tuu atu le avanoa, e i ai se mea e fia saunoa ai le sui usufono mamalu?

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, e tasi lava le sui usufono na fesiligia le Matagaluega lenei, na o le Afioga ia Laauli. E leai ma se isi. Ou te le iloa la po o le a le mea lea o le a ou tali atu ai.

SUI FOFOGA FETALAI: Malie lau Afioga i le Minisita se i tulai mai Olo.

Tofa Olo Fiti Afoa Vaai: Masalo e le i maua e le Afioga i le Minisita sa ou talanoa i le security o le atunuu, ou te iloa o lana matafaioi lea.

Ae ua ou tulai atu ma le faaaloalo ona o lea o le a see ese le Afioga i le Minisita ma suesuega foi nei a le Matagaluega. E le o se mea tele si tamai mea lava. Ae lau Afioga, o lea ua maua tino maliliu i le maota gasegase, masalo o le 14 agai i le 18. Ma o le faamatalaga lea e i ai o lo o talia suesuega a alii leoleo i mataupu ia. Na ona ou fesili atu lava, se i faauma atu lava lau Afioga...

SUI FOFOGA FETALAI: O lea ua ou maua le faauilavea. E le fesootai le mea lea ua oo i ai lau saunoaga ma le national security o le atunuu.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Tofa Olo Fiti Afoa Vaai: Lau Afioga, o lea e tuuaia o leoleo e tuai ai i a latou suesuega i mataupu ia i tino maliliu. Ae na pau lau fautuaga, ona o le tele o mataupu ia e i ai, ua uma faaiuga a le Faamasinoga, ia, a o lo o i ai lava tino maliliu o aiga i uta. Se i aumai e ave e teu pe a faapea... ae po o le a se faiga a le Matagaluega o Leoleo i le mataupu lea.

O le isi la vaega, e masani na o le 72 itula e tuu ai ni tino maliu i o, a o lea foi ua taua e le Afioga i le Minisita le Nafanua, ua toe lelei la le tatou Nafanua lea na faaletonu? Ia o le lua lena o au fesili. Ma le faaaloalo.

SUI FOFOGA FETALAI: Faafetai. Tulai mai lau Afioga i le Minisita.

Afioga Hon TIALAVEA FEA LENIU TIONISIO HUNT: Ia, o le faaaloalo o le a tali i ai lau Afioga ae le i lauga ai. O tino maliliu o lo o i le falemai e le o se matafaioi lena...

SUI FOFOGA FETALAI: Lau Afioga e lelei ona talanoa pea i le Nafanua. O le tulaga i le mea lea e taua ai tino maliliu, ou te talitonu e le tatau ona tali i ai lau Afioga leaga e te le i fesiligia i le taimi muamua. O le mea la lea, sa fesiligia le national security e uiga i le vaa o le Nafanua. Na pau lea o le faauilavea e tatau ona tali lau Afioga i le Minisita, o le isi vaega, ia e leai.

Tofa Olo Fiti Afoa Vaai: Lau Afioga, e taua le mataupu lea i uta i le falemai i tino maliliu ona o le security o le soifua maloloina o le atunuu.

SUI FOFOGA FETALAI: Malie oe Olo, se i alaala mai i lalo, alaala mai i lalo.

Tofa Olo Fiti Afoa Vaai: Sole, o le a tuu ae faapefea?

SUI FOFOGA FETALAI: O le faauilavea o le mea sa taua i lau lauga autu. E le i taea le mea lea. O le mea lea o lea e tulai mai ma tele ai fua ma toso ai fua le galuega, ona o le maua o manatu fou i finagalo ma le folasaga a le Minisita. E le i i ai ma se vaega. Masalo sa e manatua lau tala na avatu ia te oe, o le a le mea ua puupuu ai faapea lau lauga. E leai ma se mea sa taua ai le mea lea i lau lauga autu. O le mea la lea, malie le sui usufono mamalu, leai e le talia le mea lea e te saunoa i ai.

Ia, tulai mai le Afioga i le Taitai o le atunuu.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e le o se mataupu foi a le Matagaluega o Leoleo. Ua atili ai lava ona sese. O le mataupu lea o le mataupu a le Faamasinoga. Aua e le mafai ona gaoioi leoleo seiloga e tatala mai e le Faamasinoga, o le Faamasino e ana le poloaiga.

Lau Afioga, ua atili ai lava ona sese le sui usufono e tulemoe tulemoe tu sese i luga.

SUI FOFOGA FETALAI: Tulai mai lau Afioga i le Minisita.

Afioga Hon TIALAVEA FEA LENIU TIONISIO HUNT: Ia, faafetai i lau Afioga i le Fofoga Fetalai. O le Nafanua o la e i ai le faaletonu i le

taimi nei, e laitiiti, o la e ua aumai le part mai Ausetalia i le taimi nei, masalo pe tea le vaiaso lea ua toe fealuai le vaa lea, e le tele se part ua gau. O vaa ia, o le vaa o Toga o la e toso i le taimi nei i o i Ausetalia, defect. Pau lava o le defect o le tausaga o le vaa, a o la e cover i le warranty, e taunuu mai i le vaiaso lea ona toe fealuai lea.

Amatalia le polokalame faapitoa e faaaogaina ai se vaalele mo le mataituina o gataifale o atunuu o le Pasefika ma le fagotaina faasolitulafono e nisi. Ma o Samoa o se tasi o atunuu e lua o le Pasefika o lo o faamautu ai le isi vaalele mo lenai polokalame. O lenai polokalame o lo o faatupeina e le Malo o Ausetalia.

Faatumauina mai e le Vaega o Taavale Afi mai le Pulega 2020 o Felauaiga i luga o le Laueleele i lalo o le Matagaluega a Leoleo. 2020, tuufaatasia o Matagaluega o le Falepuipui ma le Matagaluega o Leoleo. Faamatuina mai o matafaioi mo le laiseneina o taavale ma le tuuina atu o laisene avetaavale mai le Pulega o le Laueleele (LTA). Aofaiga o le aufaigaluega. I le 2015 e 665 le aufaigaluega o lo o i ai ae tau mai i le 2020, e 703 le aufaigaluega o lo o i ai i le taimi lenai. Lona uiga lau Afioga, e 5 tausaga ae na o le 38 le aufaigaluega faaopoopo. O se tulaga e matua le lava lava le aufaigaluega lau Afioga. E ala ona laitiiti le extra lea ona o le toatele o tagata faigaluega e o ma toe faamavae ma o atu, lea e i ai le 5 tausaga e 38, 703 ae 665 sa i ai le aufaigaluega mai le 2016.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Tupe maua i auaunaga tuuina atu – revenue collection lau Afioga. Ua matauina foi i le Matagaluega o Leoleo le siitia pea o tupe maua mai auaunaga e tuuina atu. 2016/2017 e \$353,160 le tupe na fuafua, aofaiga o tupe na maua e \$524,145. E \$170,985 le tupe faasili. 2017/2018 - \$353,160 le tupe na fuafua. Tupe na aoina e \$427,528, E \$74,368 le tupe faasili. 2018/2019 e \$353,160 le tupe na fuafua, o le tupe na aoina e \$472,053,000. E \$118,823 tupe faasili.

Tausaga 2019/2020 e \$622,705 le tupe na fuafuaina e ao, ae \$1,008,310 le tupe na aoina. E \$385,605 le tupe na faasili. O le tausaga faaletupe o lo o i ai nei, tausaga faaletupe 2021. I le 6 masina muamua o le tausaga lenai, o le tupe na fuafuaina mo le tausaga atoa lea faatoa uma nei ia Iuni 30, 2021, e \$15,059,086. E oo mai i le faaiuga o le tausaga i masina e 6, o le tupe na mafai ona aoina, e \$7,795,293.77. O lenai \$7 miliona ua aoina i totonu o le 6 masina e amata mai i le masina o Iulai seia aulia Tesema i le tausaga na tea atu nei.

Faamaumauga o soligatulafono. Mataupu e fitoitonu i suesuega. 2017 e 3,448. Fesoasoani faa-leoleo e 5,664, o le aofaiga e 9,012. 2018, mataupu e faatino i ai suesuega e 4,739, fesoasoani faa-leoleo e 9,212. Aofaiga e 13,951. Tausaga 2019 mataupu e faatino ai suesuega e \$527... fesoasoani faaleoleo e 9,337, e 14,615. Tausaga 2020, suesuega, \$5,549, fesoasoani faaleoleo e 12,698. O mataupu nei o lo o logoina atu ai le Ofisa o Leoleo, e i ai le mea lea e tupu foi i le tele o aiga, ua tele ina alu atu lava le tamaititi pisa, vili le Ofisa o Leoleo. Le mamalu e o le atunuu, o sela a leoleo, e le o ni sela e faamomoe ai ni onana, o sela e taloka ai tagata faatupu faalavelave ma fasi tagata. A onana o outou alo ae telefoni atu le Ofisa o Leoleo. Faamolemole, faatoatoa lelei outou alo ma tou fanau, e le o ni leoleo faamomoe onana o leoleo e malupuipua le atunuu. O le mea lena e ala ai ona tele ai isi faalavelave sa le tatau ona faaoo atu i le Ofisa o Leoleo. E pei ona faailoa atu, o lo o siitia pea le fuainumera o mataupu o lo o faapea ona tali atu ai le Matagaluega i faafitauli o le mamalu o le atunuu. Ma o nei faamaumauga e mafai ai e le Matagaluega ona tuufaatasia nisi o fuafuaga e taumafai ai e faatino ni galuega faipaaga ma Matagaluega o le Malo, pisinisi tumaoti ma paaga mai fafo ina ia faaitiitia faafitauli e afua ai nei soligatulafono, aemaise faafitauli ua aafia ai le lotoifale i le va o tagata o si o tatou atunuu.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

E matauina foi le faaauau pea o le siitia o taumafaiga a le Matagaluega ina ia lava tapena le aufaigaluega atoa mo le tuuina atu o le auunaga tau leoleo mo Samoa ma ona tagata e pei foi ona i ai nisi o vaega ua siitia nei. Siitia le aoaoina o le aufaigaluega i mataupu eseese tau le tulafono. Suesueina o soligatulafono aemaise o tomai eseese. Siitia le tomai o faiaoga aemaise le iloilo ma taliaina e le Ofisa o Faailoga Taualua – Samoa Qualifications Authority o aoaoga o lo o aoaoina ai le aufaigaluega. Faaagaina o metotia faaonaponei, quorums local position system GPS CCTV.

Faamautuina se ofisa tutotonu mo le iloilo ma faamatalaga o soligatulafono faava-o-Malo, Pacific Trans National Crime Coordination Unit. Aoaoina i nisi o metotia tau leoleo e tali atu ai i taimi o vevesi ma raid foi ia i tua. Siitia le aofaiga o le Pulega e lagolago i le Komesina e faatinoina matafaioi aua le matauina o galuega fai a le Matagaluega aoao.

Ofisa o Leoleo i Upolu ma Savaii ina ia faafaigofie e le mamalu o le atunuu ona faafesootai auunaga a le Matagaluega. Ua afua ai ona faatuina nisi Ofisa o Leoleo nuu i tua i Upolu faatasi ai ma Savaii. O nei ofisa e ese

mai le Ofisa Autu o Leoleo i Apia ma e aofia ai Upolu, Ofisa o Leoleo i Tuanaimato i Faleata, Ofisa o Leoleo i Afega, Ofisa o Leoleo i Faleolo, Ofisa o Leoleo i Lotofaga, Ofisa o Leoleo i Poutasi, Ofisa o Leoleo i Lalomanu, Ofisa o Taavale Afi i Fagalii ma Vaitele.

O Savaii, o le Ofisa o Leoleo i Tuasivi, Ofisa o Leoleo i Fagamalo, Ofisa o Leoleo i Asau, Ofisa o Leoleo i Vaitoomuli, Ofisa o Taavale Afi i Salelologa. O le taimi foi lenei ua uma ona tender out le faamamaina o le nofoaga e 4 eka i Salelologa. O lea o le a sii mai ai le Ofisa i Tuasivi e faatu i Salelologa i le mea o lo o i ai le taulaga. O lea galuega e tataua ona amatalia i le tausaga nei le tanuina o le 4 eka lea, ma le fausiaina o le Ofisa o le Matagaluega o Leoleo.

O nisi o galuega fai faapaaga a le Matagaluega o lo o faaauauina ma le Malo o Ausetalia. E aafia ai le poloketi, Samoa Australian Police Partnership, faatasi ma le poloketi mo le Gataifale. O lo o auina mai ai ni sui mai Ausetalia, Australia Defence Force. E le gata i le galulue ai o sui mai Ausetalia i totonu o Samoa nei i le Ofisa autu i Apia mo le galueaina faufautua, ae ua mafai ai foi ona faafaigofie le faamatuuina mai o nisi o fesoasoani, e ala i meafaigaluega mo le faatinoina o galuega tau leoleo. E faamauina ai foi le tele o nei fesoasoani e pei ona i ai le faameaalofaina mai o mea fai faili, mo le siitia o le auunaga o le vaega o le faili.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

O le faameaalofaina mai o ni taavale, pasi, pasika, le isi pasika lea na soa e le isi toeaina aua tapenaga a Matagaluega mo Taaloga a le Pasefika. O le Malo o Saina, o le Kolisi o aoaoga faale-leoleo, Police Academy. Sa fuafuaina e amatalia galuega i le masina o Mati i le tausaga na tea nei, aepeitai o le aafiaga o le lalolagi i le faamai o le Koviti-19, ua afua ai ona tuu atu i tua i se taimi latalata mai. O lenei poloketi tele o le a mafai ai e alo ma fanau a Samoa e fia tautua i le atunuu e ala i le galuega faa-leoleo ma le falepuipui, ona nonofo ma aoaoina ai i totonu o lenei Kolisi. O lenei Kolisi o le a fausia lea i Tafaigata i le mea sa i ai le falepuipui tuai, i le lagolago mai a le Malo o Saina.

Ua faamauina foi e le Matagaluega ia le faaauauina pea o nisi o fesoasoani a lenei Malo, e ala lea i le faameaalofaina mai o mea fai faili mo le siitia o le auunaga o le vaega o faili. O Amerika, i le masina o Novema ma Tesema o le tausaga na tea nei, na faatino ai foi ni aoaoga taua, o le taua ia o le aoaoga lea. Mo le siitia o le tomai, o i latou o galulue i le vaega e tali atu ai i ni faafitauli tuga, ma tuuina mai ai foi ma ni meafaigaluega mo le faaauupegaina o le aufaigaluega. O lenei fesoasoani taua, e mai le Malo o Amerika, ma o lo o faamoemoe e faaauauina pea i le lumanai.

O Niu Sila. Mo le silafia e le Palemene mamalu, o lo o faaauuina foi galuega fai faapaaga ma le Malo o Niu Sila i le vaega faa-Faufautua, e pei ona i ai se tasi o galuega tele sa faatinoina e le Ofisa o Leoleo a Niu Sila, o le toe iloilo ina lea o le faavaa o le Matagaluega o Leoleo, Organisational Structure sa faatinoina i le tausaga e 2019. O leni faavaa ua fesoasoani tele i le faafaigofieina o galuega o le toe toe tuu faatasiina lea o le auaunaga faaleoleo ma le auaunaga faafalepuipui. O isi paaga, o lo o faaauu foi galuega fai faapaaga a le Matagaluega ma nisi o pisinisi tumaoti i Samoa nei, aemaise ai nisi mai atunuu i fafo, e patino lea e taumafai e faaitiitia soligitulafono e tulai mai i totonu o si o tatou atunuu.

Faaiuga. E fia faaiu atu leni folasaga i le Komesina ma le Pulega o le Matagaluega o Leoleo ma Falepuipui ma le Toefuataina e pei ona i ai nei. E talitonu e tele ni galuega lelei ua mafai ona faataunuuina. Ae i ai foi le manatu, e tele foi nisi galuega o lo o fuafuaina aua le agai i luma o le auaunaga. E pei lava ona i ai nisi poloketi tetele o lo o taumafai i ai le Matagaluega, mo le faamaeaina, e pei o le faamaeaina o le falepuipui i Vaiaata. O le fausiaina ma le faaleleia o auaunaga tau taavale afi i Fagalii. Tosoina o se laina faapitoa mo le siitia o fesootaiga i le falepuipui i Tanumalala, fibre object.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauu i luga o le faitauga faalua**

O le faaleleia o auala i Aleisa e agai atu ai i le falepuipui. Faatuina o le Ofisa Autu o Leoleo i Salelologa, faapipiina o masini totogi mo park i Apia i luma o le fale o le Malo. O le poloketi mo le teumaluina o faamaumauga a le Matagaluega, archive and storage project. O faailoilo mo Tanumalala, multipurpose hall mo pagota.

E le gata i nei poloketi tetele ae o le faatumauina pea o le auaunaga a le Matagaluega e tuuina atu i le mamalu o le atunuu. E ala lea i le suesueina o mataupu tau solitulafono. Siitia le vave ona tali atu i mataupu mo se fesoasoani. Siitia faamaumauga mo galuega fai, siitia polokalame mo le toefuataina o alii ma tamaitai pagota. Faaitiitia i latou e toe foi atu i le falepuipui, reduce the offending. Faamausali le faatino o auaunaga i le faamaoni e aunoa ma se faaituau, se faailoga lanu e tusa ai ma le tautoga.

O leni ua lamalama faaiu le tatou savaliga, e leai lava se galuega e fai e aunoa ma se faafitauli. Ae o a lava luitau, aemaise ai foi se auaunaga ua le faamalieina ai se finagalo. E talitonu, e aoga lava mea e tutupu e fai ma lesonea i le siitia o auaunaga e tuuina atu ia Samoa.

I le faafofogaaga mai a Samoa, aemaise sui usufono mamalu o le Palemene, e fia faaiu se folasaga i galuega sa faatino a le Matagaluega a Leoleo ma Falepuipui ma le Toefuataina e faapea. Ou te fia faafetaia le Komesina muamua o le Falepuipui ma le Toefuataina, le afioga ia Taito Saua Winterstein o le sa tauaveina tiute o le Komesina o Falepuipui, mai le

tausaga 2014 seia aulia le amataga o le 2020. E le gata i lea, o nisi o le pulega ua faapea ona faamaea a latou galuega ma agai atu mo nisi foi tofi. E aofia ai ia Ulugia Sauafea Niuia Aumua, faapea Levaopolo Rosa Siaoosi Sooalo - Komesina lagolago. O i latou sa asaina le gasu o le taeao, e pei o le upu, seia oo ina siitia atu le auaunaga a le Falepuipui i Tanumalala. Faamalo le onosai, faafetai tali mai i manaoga o le Malo, e ala atu ia te au ma le Minisita Lagolago. Ia faamanuia le Atua i nisi foi tofiga ua valaauina ai.

E le faagaloina le agaga faapitoa i le Komesina o Leoleo Falepuipui ma le Toefuataina, lau Afioga Fuiavailili Egon Keil, o le o lo o tu i le foe mo le taitaiga o lenei Matagaluega. E le faigofie le galuega, ae ou te talitonu o lau taitaiga aemaise le uunaia o le aufaigaluega atoa, ina ia siitia la tatou Matagaluega, i se tulaga maualuga ua afua ai le tele o nei suiga lelei. Faamalo faafetai le lotu toa. E talitonu e te le fefe e fai le amiotonu, e oo lava i o ta aiga e te talokaina mai i totonu o sela.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Faafetai foi mo le lagolagoina o au nei, ma le Minisita Lagolago i tiute ma faiva, e fitoitonu i lenei Matagaluega. Faamalo ma faafetai i Pule Lagolago mo le lagolagoina o le Komesina i le tauaveina o ona tiute, aemaise le uunaia o le aufaigaluega ina ia faatino tiute i le mafai e gata ai. Faafetai i le aufaigaluega atoa i le auaunaga faaleoleo, auauanga faafalepuipui, aemaise foi le auaunaga o taavale afi. Malo fai o le faiva, ua outou faia mea lelei, e le o se viiga o se tasi, a o le viiga e toe foi i le Atua e ona le malosi uma lava.

Ou te faafetaia faapitoa le paia ma le mamalu o Samoa, i latou o lo o tuli o latou faasalaga i le toese i Tanumalala, Olomanu ma Vaiaata. E le galo outou i talosaga, leaga o tatou uma o Samoa. O tatou e faavae i le Atua mea uma, o le Atua foi e magalo ai o tatou sese ma aleu. O le toto paia o lo tatou Faaola le faamagaloga sili lea. O le a lava sau maa na togi, e le gata i le atinaeina o galuega tau faatoaga mo le tausaiaina o e o lo o nofo sala, aemaise poloketi a le Malo ua fuafuaina mo polokalame, ina ia toe fuataina ai le soifua mai faafitauli o le olaga nei. Ia avea le nofo sala ai i le toese e fai ma avanoa e toe liliu ai se tofa, aua le atinaeina o aiga, ma fanau mo so latou lumanai manuia, aemaise le lumanai manuia o Samoa atoa. E i ai le manatu e leai se faiva e le asa ma le maumau. E leai foi se tautai e atoa liu i lona sa. Afai ua i ai se agaga ua le tautamalii i lau faafofogaaga Samoa, e matua atu lava le tuu ia te oe. Alofagia e le Atua le Komesina ma le Pulega o le Matagaluega o Leoleo Falepuipui ma le Toefuataina. Alofagia e le Atua le aufaigaluega e galulue i le po ma le ao i le puipuga o le

saogalemu, aemaise o le taimi e onana ai tagata i le aualatele. E matou te o matou te momoe, a o lena tou te galulue. Faamanuia le Atua.

Lau Afioga i le Fofoga Fetalai, ia, o le a amata atu se faamatalaga i la matou mafutaga ma le Matagaluega o Tiute ma Tupe Maua mai le 2016 seia oo mai i lena tausaga mulimuli.

SUI FOFOGA FETALAI: Ia malie lau Afioga i le Minisita, se i vasai foi ma fai se manava, ae tuu atu le avanoa i le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, a o le i see ese le Minisita ma Matagaluega o Leoleo, masalo o le vailiu tonu lea ou te faaopoopo atu i vaega ia sa ia taua, ina ia manino lelei le soosooga o le saunoaga a le Afioga i le Minisita ma mataupu ia ua agiga i le ea faapea e le taunuu uma mea ia, ma e tataua ona faasao.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O lea ua saunoa manino le Afioga i le Minisita i le Kolisi o Leoleo. O le Kolisi lea o Leoleo ua leva ona faatalanoaina, le Police Academy. Sa fetuutuunai le manatu o le Malo i se mea e faatu ai, ae ua leva ona faatalanoa ma le Malo o Saina, e fausia foi i le tupe faameaalofa ona o le tulaga lea, e tataua lava ona i ai se Kolisi. Ua fetuunai, fetuunai muniao, ona taunuu ai lea o le tonu, o le a fau i Tafaigata. O lea foi la na tusia ata, ma matou o vaai tonu lava le mea e tu ai. Ua sauni uma galuega o le a faatino ae tupu loa le mai lea o le Koviti-19. O lea la sa i ai le faamoemoe o le masina o Mati i le tausaga nei e amata ai ona o fuafuaga nei, sa fuafua mai i tua atu.

E manaia tele lava ata o faletetele o le Kolisi, a o tua atu e i ai le malae tele lava lena e fai ai latou koleniga faamalositino. Aua o le isi vaega tele lea o latou o le a aoga faa-leoleo ia fit, ia malosi le tino. O tua atu la o lo o i ai le malae tele lava, ua uma ona fua, faataamilo ma pa lelei. A outou malaga atu i Tafaigata i le mea tonu lava lea sa alu atu ai le auala i luma, ua uma ona pa. Ua uma foi ona sua faataamilo e fau ai le Kolisi lea. Ae talu ai la ona ua tulai mai le Koviti-19, o lea la masalo ua le o toe mamao nei, ona taunuu mai lea o tui. O tala atu o tui na e ono toe fetuunai ai faigamalaga.

O le taua o itu lea lau Afioga i le Fofoga Fetalai, o lea foi sa ou taua manino i le taeao na tatala ai faleaoga o aoga tulagalua i Tafaigata. E i ai ma le faamoemoe o lena foi o lo o lava le eleele e faatu ai le isi Kolisi i ina ina ia aoga uma ai lava fanau, le toatele ua nofoia Tafaigata e agai mai i Faleula uta, ma nofoaga tulalata.

O se mea matagofie i le taeao le savalivali ane o fanau a le toatele o tagata o lo o nonofo ai i le aoga lea. O lea foi la ua faatulaga ai ma le falepuipui tuai tele lava, e toe faaleleia atoa le falepuipui lena, ma faatu ai isi faleaoga faapitoa mo mataupu tau trade. Sa oo la i ai lau tautalaga i le taeao na tatala ai. Ou te tu mai la i uta ma ou faasagasaga mai i tai, ma ou tilotilo mai, e iloa lelei le sami, ae agiagi atu le matagi. Ma sa faatumulia i tagata sa auai, ma o le toatele o fanau i ina la ua aoga ai. Ua savalivali, ua le o toe tau sue ni taavale e o mamao mai ai i tai. O le itu matautia tele lena o le faaiuga na fai e aveese Tafaigata, aveese le falepuipui ma i ina ae ave loa i Tanumalala.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Lau Afioga i le Fofoga Fetalai ma le mamalu o le Maota nei, ua ou le iloa po o ua faafia ona faasalalau mai, faasalalau mai, faasalalau mai, e i latou lava ia e faia talaiga sese, e le oo, e le oo, e le oo. O lea la ua toe faafogafoga, ia taofi ai ia faasalalauga tau faasese, faasalalauga e faatupu ai le masalosalo. O le mea lava ia e amiotonu, e amiotonu. Aemaise o la e o atu tagata ma tilotilo i ai, ua faamama. Ia talosia ia ia vave tatala femalagaiga ona faatino lea o lea galuega tele.

Lau Afioga i le Fofoga Fetalai, a o le itu taua o le faaiuga o lena itu ogaoga o le faaiuga lena, o le aveese o le falepuipui ma i, aisea? Ona o le vaai mamao a le Malo o i i le alu atu lea i tai, e tau i tai Vaitele e tau i uta. O le a avea ma vaega o le taulaga i le lumanai. Ma e talu ai o le toatele o tagata o lo o nofoia i ina ma fanau laititi, o le ala lena lau Afioga na tupu ae ai se manatu i le Kapeneta aemaise le Minisita, fai le atinae lea, aveese le falepuipui e ave i o i Tanumalala. Aisea? E le o se mea e talafeagai le tu o se falepuipui i i i totonu o atuga fale ua putu ua avea ma faoaaai, mulimuli ane ua avea ma vaega o le taulaga tele i Apia. Ma e le o se mea lea e talafeagai le i ai o se falepuipui i le ogatotonu o le mea e toatele ai tagata. A sosola mai pagota i tua, e tele afaina o aiga e tu lalata atu i ai. O le vaai mamao lena a le tatou Malo i le itu o le puipuiga. A o le aveese atu la lea i o, o se iuga e maoae le taua, aisea? E leaga e taugata, sa tausaili se fesoasoani mai fafo, aepeitai, e pei e i ai le agaga musua o paaga ona o mea faapea. O mea e tatau lava ona fai e le Malo ia, a o le lototele ma le finau o le Minisita ua mafai ai ona faatino lea fuafuaga, i le lototele ma le finafinau. E ui lava ina aumai i totonu o le Palemene lena ma osofaia, faitioina, osofaia, faitioina. E oo lava i totonu o le Kapeneta, sa i ai foi le agaga faapena i le tulaga lea, o le fefaaaliai saoloto o finagalo o Minisita o

le Kapeneta e le taotaomia. E pei lava ona ou taua, a oo loa ina talanoa mataupu i totonu o le Kapeneta, e tatala le talanoaga, e tatala, e aumai lea manatu ma lea manatu. A o le faaiuga o le mea e fulisia i ai le Kapeneta o le mea lena e fai. E soloia ai le manatu lea sa faaalua, e se tasi sa i ai i totonu o le Kapeneta, ua leai se aoga o le Kapeneta. Ou te ofo, ou te matua ofo, i se tagata sa saofai i totonu ma tilotilo i faiga faavae a le Kapeneta. Ae sau i fafo o le Kapeneta, fai faamatalaga faapea, a o lea e saofafai le Kapeneta. I le talanoaga o le mataupu lena, ou te le manatua pe faafia ona osofaia, o se luitau lea. O se talanoaga e matala, e tatala ae avatu finagalo e au ese ai, o se luitau lea mo le Minisita e ala ai le mafaufau.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Lau Afioga i le Fofoga Fetalai, o le a la mea ua tupu? O lea ua ave nei i o le falepuipui i Tanumalala, o le a la le tulaga lea na tupu mai ai? I le falepuipui e fou e tele aemaise o le tulaga ua i ai. O le a le mea lea na tupu mai ai? O le isi la lea mea, o le puipuga ua mautinoa ai, e sao le tofa ma le faataga, i le faatulagaga o le falepuipui i le mamao i uta. Ua avea nei ma luitau taua tele, o le matua toa o le pagota i le taimi lena ae toe sola. Aisea? E liolio e le anoano o faatoaga, ma o faatoaga nei, o faatoaga nei e matua matautia se pagota ae oo atu i ai. Masalo e mulimuli oo atu leoleo, ae ono aafia se pagota e ono oo i ai ni faalavelave i le pagota e fia agai ane i faatoaga nei. Aisea? E leo lelei faatoaga nei. O faatoaga nei o faatoaga a tagata e fai lafu manu, a o gatai mai, o lo o i ai nuu ia e tutu ai. O nuu e pulea lelei e alii ma faipule. A lea na tupu le mea talu ai, na matua saili ma pue e taulelea o le nuu i tai, a o gauta atu e matua gaoa. O lea na iu lava ina sola sola le toa-fa, na iu lava ina o ane i le fale o le fesoasoani i Lefaga tootutuli ai luma i le fia aai. O le ogaeleele i lou taofi, e matua malu lelei ma taua mo leoleo. E faigofie foi ona lea e leoleo i le televavave o taavale. E leo uma lava magaala uma, e alu atu lava i Aleisa, e tau lava i o i le auala sao ma maga auala e tau i o i le auala faalava i Leulumoega. O le matua faigata aemaise le solaaga toatele lea na alu, e matua faigata i ni pagota ona toe sosola. Ua matua talafeagai lelei le tulaga ua i ai.

Lau Afioga i le Fofoga Fetalai, e i ai le itu taua i le fuafuaga lea o le siitia mai o le Kolisi o Leoleo mai o i Tuasivi. E tatau lava ona tu i le mea o i ai le taulaga fou i Salelologa. I se taimi ona faapena foi lea ona sii mai le falemai, ma e tatau lava ona tu i totonu i le mea o i ai le taulaga. Aisea? E talafeagai lelei mo femalagaiga mai sasae ma sisifo. E o mai uma lava i i le taulaga i Salelologa, e faigofie mo tagata i Salafai. Na i lo le mea lea e tupu nei, a o atu tagata mai le isi itu lea, o atu afe i Salelologa, toe pue ai le pasi e o i o i Tuasivi. E pei lava o Apia, ae afai e tu le falemai i o i

Toamua, o le a la le mea e tupu i tagata e o mai sasae, e o mai Aleipata. Lona uiga e o mai i le taulaga i Apia toe pue le taavale i o i le la itu e alu ai i le falemai. O le tulaga na filifilia i aso la, ae le o toe fetau i aso nei, e matua le fetau i aso nei i le sologa lelei o le mea ua i ai le femalagaiga o tagata i Salafai.

Lau Afioga i le Fofoga Fetalai, e le mama le vaai mamao na fuafua ai mea ia, ma faatu ai foi ma le taulaga i Salelologa. E le itiiti seleni na fau ai le taulaga lea, ma le vaaiga mamao, o le mea e tatau ona faatu aloaia ai se taulaga mo Salelologa. O le faitotoa o le ulufale ma le ulufafo o tatou tagata mai Salafai.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Lau Afioga i le Fofoga Fetalai, o le tulaga lena na ou tulai atu ai se i fai sina malologa a le Minisita ae ou faaopoopo atu, leaga o tua atu o fuafuag anei o lo o i ai faiga faavae. Faiga faavae a le vaai mamao ina ia faafaigofie mo tatou tagata ina ia puipuia ai le soifua o tatou tagata i le agai atu i le lumanai. O tua atu o nei mea ua fau, o lo o i ai faiga faavae, faiga faavae maopoopo ma fuafua mamao, fuafua lelei mo le agai atu i le lumanai. Lau Afioga i le Fofoga Fetalai, o sina au faaopoopo atu lena i mataupu a o le i see ese le Minisita mai le Matagaluega o Leoleo.

SUI FOFOGA FETALAI: Ia, ua faamalo saunoa i lau Afioga i le Taitai o le Malo. O lea e matau atu o lo o tulai mai le sui usufono mamalu mai le itumalo o Palauli le Falefa. Ia se i tuu atu le avanoa.

Afioga Hon Faumuina Tiatia Faaolatane Liuga (Palauli le Falefa): Faafetai i lau Afioga i le Fofoga Fetalai. O le mataupu sa ou laga o le faatupulaia o galuega mo fanau a Samoa i le lumanai. E tasi lea vaega o lea foi na saunoa i ai le Afioga i le Palemia, o le aoga faa-leoleo – Police Academy. E ala ona taua i lou sui usufono le vaega lea, o le a siitia ai le tomai faa-leoleo ma isi tomai eseese. Ma e ala foi ona taua ia te au le vaega lea lau Afioga, ona e maua ai foi avanoa e faatupulaia ai a tatou leoleo e o atu mo peace keeping mission, aua tasi lea vaega e faaopoopo atili i tulaga o tupe maua a le tatou atunuu i tupe faaagaaga fafo.

Ma o le vaega lea ou te faafetai ai i le Afioga i le Minisita, Minisita Lagolago, Komesina o Leoleo ma le Matagaluega. Ma le faaalalo lava. Faafetai.

SUI FOFOGA FETALAI: Faafetai. Ia, se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetala'i, ou te faamalo i le itu lea ua aumai e le sui usufono mo Palauli le Falefa lea e ave ai tatou misiona i fafo. Ma e le i faigofie, faatoa o tatou i le tausaga e 2000 ina ua uma ma feiloaiga ma le Failautusi Aoao o le Malo Afaatasi.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ua uma ona ou tulai atu i le 1999 e fai lau tautalaga i totonu o Malo Afaatasi, a ua uma foi ona fuafua le ma feiloaiga ona ou alu ane lea ma feiloai, ona fai lea o lau talosaga lea. Ua ou vaai ua tele latou galuega o le filemu, ma e 3 au mataupu sa ou ave i le Failautusi Aoao. O le mataupu muamua, o lou faafetai aloaia i le latou galuega o le filemu.

O le mataupu lona lua, o lou taua i ai o le a sii le tatou sao i totonu o le Malo Afaatasi, e atagia ai le lagolago a le Malo i gaioiga faale-Malo Afaatasi mo le filemu. O le a sii i luga i le 5% le tele o le tatou sao. Sa ou fesili i le Susuga ia Aiono sa ma o o le Failautusi o le Va i Fafo pe fia se sao o Samoa o i ai, ae tau mai e 8,000. O le ala lena na ou lototele ai. O le a sii i le 50 mai le 8,000 i le 12,000. Fiafia lava le Failautusi Aoao, le alii Aferika lea sa i ai. Ia ona fai mai loa lea, o le a la le mea lona tolu? O le mea lona tolu, i le tulaga lava o le tuutuu mai o le Malo o Samoa e lagolago mai i galuega a le Malo Afaatasi. O lea ou te matau e i ai fitafita ia e omai a isi Malo. O matou, e leai ni fitafita ae i ai matou leoleo, pe mafai ona tuutuu mai o matou tauau e omai leoleo. Ona fai mai loa lea o si toaina, ua lelei, o le a fai. Masalo o le tausaga na sosoo ai, faasalalau ai loa lea o le a alu le tatou vaega muamua, ae o le a o i i East Timor, Timor i Sasae, le taimi lena o lea e vevesi Timor i Sasae ae o le a fai le latou Tutoatasi, o lo o vevesi la ma Indonesia o lea e pulea.

O lea la na faasalalau ai loa pe toa-luasefulu ea tatou leoleo. Ona faasalalau loa lea. Ou te manatua le isi faipule o le Itu Agai, tu ae lava i ina ma fai mai, talofa i fanau a Samoa o le a ave e fasioti i fafo. O lona uiga o lea o le a totogi ai nogatupe a Samoa, aitalafu. O ituaiga manatu foi nei vaivai. E i ai le mea na tupu, ua oo ina palaaai ai isi leoleo e o. Ia, a o le 20 la lea na o, foi mai loa le vaega lena, ia vaavaai atu leoleo ia na toe o ese, faatau a latou taavale afi, fai o latou fale, faatau o latou fanua. Toe faasalalau atu loa le isi vaega e moomia se isi foi toa-luasefulu, ua oo i le 100+ talosaga. A o fea na alu atu ai le ituaiga faafefe lena? Alu atu iinei i le Palemene. Le ituaiga faafefe lea e fai e le vaega lea.

Lau Afioga i le Fofoga Fetalai, o le a la le mea lea ua i ai nei? O lea la ua maua si tatou avanoa tatou te o ai i fafo. O lea foi la na ou sainia nei le isi pepa e faafoi mai ai isi tatou tagata la e i Aferika, a o lea ua lavea foi i le tulaga foi lele o le Koviti. Ae o lea lava e i galuega faa-leoleo. Lau Afioga i le Fofoga Fetalai, pei o le tulaga lea, le mea lava lea o le malosi o le taufaasese, a o galuega nei, o lea e manuia ai aiga.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

E faaiu atu ai lau faamatalaga i le mea lava lea o le taufaasese, e i ai le malae taalo mo fanau laiti, toeititi lava uma, fausia foi e le isi itumalo i le soo faapitoa ma Saina, fai fua. E i ai ma le fale tele lea e i Malifa pe a faapea tou te malaga atu, le alu agai uta lea e tu i le itu tauagavale. Le fale tele lava lena, e fai fua foi, e teu ai a tatou measina, o lea ua lavea uma lava i le mea lea, le afaigaluega, lavea uma lava i i le tulaga lea i le Koviti. O i ina la, le fale lena, ma le malae taalo lea e i tua ma uta i le tatou kolisi, o mea uma na na o le sau sau sau, ua le mafai ona fausia, ua uma tupe a Saina ua leai ni tupe a Saina o totoe.

Lau Afioga i le Fofoga Fetalai, se leaga le tagata e oa i lea mea lenei o le pepelo, oa i le mea lea o le pepelo. Uma ane lea mea, faaleaga mai le tala i lea mea, a o le taua lena o le tatou Fonotaga lenei, e alu atu ai faamatalaga sao. Na o iinei lava e alu atu ai faamatalaga sao. O folafolaga i tua atu o le Palemene lenei, o mea e le faamaonia.

Lau Afioga i le Fofoga Fetalai, ia o si toe faaopoopo atu lena.

SUI FOFOGA FETALAI: Se i tuu atu le avanoa o lea e tulai mai le Afioga i le Tuiatua Faanofonofa aua tasi foi lea vaega sa taua i lana saunoaga. Saunoa.

Afioga Tafua Maluelue Tafua (Aleipata Itupa i Lalo): Faafetai lava i lau Afioga i le Fofoga Fetalai. Faafetai foi i lau Afioga i le Minisita o Leoleo, malo le tauatia malo foi le taumafai. E tele tele galuega lelei sa faatino e lau Afioga. Ae toe faaopoopo i le saunoaga a le Palemia lea sa taua ai tatou leoleo ia. Tasi lea atinae tele anoanoai le tele o seleni e maua mai ai a le atunuu. Pe faa-fa ea ona ou malaga i Niu Ioka i malaga a le Palemia, matou feiloai ai lea ma se tasi o alii leoleo sa galue iinei faa-security ea le tama. Ae sau i lou itumalo si tama. Ou te le iloa la, na matou tafafao i le isi po ae fai mai si tama o ia e sau mai Aleipata. Ae sa security iinei sue atu ai lea i le suega alu atu lava au i o i Malo Afaatasi, ae ou fesili atu po o fea e nofo ai ae fai mai e sau i Sudan, e sau mai lena ogamea o le lalolagi. E sau la si tama e leoleo, aua foi a fai fonofono tetele ia a le Malo e fai

i Niu Ioka, e i ai uma atunuu toetiiti lava 200 a le lalolagi, E omai uma la tagata nei peace keeping officers nei e omai e leoleoina le fonu a Malo Afaatasi e fai.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ae ua saunoa foi le Palemia, aua mo le silafia, ia e ese foi lea... e laitiiti le fale lenei, masalo pe faa-faina le tele o le fale lenei. E auauai lava la Taitai, o Peresetene, o Palemia o atunuu taitasi, ia ae maeu foi lea atinae tele a le atunuu, e le gata ina maua mai ai o tatou fesoasoani pei ona saunoa le Palemia, ae tele foi tatou tupe e maua ai.

Ae pei o lou tulai atu lau Afioga i le Fofoga Fetalai, o le taua ma le lelei o le tatou fuafuaga lea na ou lauga ai. Na lavea i lau lauga le tatou aoga lea e le i leva nei, le police academy. Ou te manatua foi la na ou lauga ai i le tausaga ua tuanai, ae sa maualuga le manatu, e tuualalo i lau Afioga i le Minisita, e manaia pe a fai le tatou police academy lea, ae kava uma ai le vaega lea e fia leoleo, e fia fuimu, o leoleo foi ia e malaga foi i fafo i le security o le lalolagi. Ae le gata i lea, ae faapea foi ma security officers ia e feofeoi i le atunuu, le aualii ia e security i inei. O le manaia o lena, o le a siisii ai le standard o le puipuiga o le mamalu o le atunuu. E le gata i lea, ae mauagofie uma foi a latou galuega, aua a iu mai le faa-leoleo, o lea ua mafai le avanoa e ofi atu ai i le fuimu, maua le avanoa e ofi atu ai i nisi galuega faa-leoleo i totonu o le atunuu ia atoa ai ma fafo i le lalolagi.

A o le isi vaega lau Afioga i le Fofoga Fetalai, o le tulaga foi o le tatou Matagaluega o Leoleo, ou te faaopoopo atu lou agaga faafetai i lau Afioga i le Minisita, ua uma ona saunoa atu ai le Palemia, e le sili ifo la sau upu. Ae se i fai foi se tala a le matou itu. O le agaga faafetai, aua o tatou, e leai se mea e mafaia e le Matagaluega pe afai e le fesoasoani tu ma aganuu, o aga pulea, agatausaafia, ia o le naunautaiga lava ina ia tausi le filemu.

Ae i ai lava si mea na saunoa ai lau Afioga, na e augani mai ai, faamolemole o le ofisa o leoleo e le o se ofisa a onana loa le tupulaga ona vili atu lea e omai. I lou mafaufau, e pei lava o se, tulou, o se pelu e maai itu e lua, ona o le mafuaaga lenei, afai e vili mai se tina e toa-fa le fanau matutua ua 20+ ua le mafai ona taofiofi se tasi o tama i le ona ma ua le taupulea lana amio, e feoloolo lava i nuu i tua e faigofie ona faafilemu i le pulega a alii ma faipule, a o Apia nei, ou te talosaga atu e manaia lava pe a o pea i ai le tatou Matagaluega e faafilemu le taulealea lea. O le isi foi lea vaega a tatou o le puipuia o le filemu. O le puipuia la o le filemu a alu atu ua le mafai e le tina ma le fanau, o le tama matua lea e ulavale, e lelei lava le aumai e faamoe i le sela, faamoe pea i le sela e le gata o le puipuia ai o

se manua e oo ia ia, ae puipuia ai foi si tina ma le fanau. Na o se faaitaiga. Ia o se tuualalo lea i lau Afioga. Ae aua le fiu gofie le tatou Matagaluega, e leai e aoga foi.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

A o le isi la itu lau Afioga, afai foi e le faia se mea, ua faitio foi tagata, a fai foi le mea, ua faitio foi tagata. So, o le uiga lea o lau tala o le pelu e maai ona itu e lua. A fai le mea ua faitio foi isi, a le faia se mea, ua faitio isi. Ia o le faaaliga lea ma le faaaloalo, ae na ona tuualalo atu i le vaega lea. Ma le faaaloalo lava.

SUI FOFOGA FETALAI: Faafetai. Le sui usufono o Faleata e te fia... Ia, saunoa.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, o si vaega laitiiti lava lea sa taua i lau lauga lea sa ou faatali pe oo i ai le saunoga a le Afioga i le Minisita. Muamua, e momoli foi le faafetai a lenei itumalo i galuega lelei ua faatino, aemaise lava i le vaega lea ua toe tuufaatasia ai le Ola Toefuataina ma Leoleo. E taua tele le vaega lea, aua o le mea lea sa i ai, a sola loa le pagota, e toe o lava nai leoleo e toe sue mai. A o le mea lea ua i ai nei, ia, o le fesootaiga vavalalata lea. Ae faafetai lava. O le mea lea sa ou taua, o le mea lea ua faatupulaia, o le luitau lea ua i ai nei mo le Ofisa o Leoleo, o soligatulafono fou, mea sa le i masani ai tatou, mea ia o cyber crime, criminal activity, o le faaaogaina o upega tafailagi, ia ma mea o le faatupulaia o drugs, heavy drugs mea ia lea ua tatou vaavaai i ai.

O le mea la lea sa avatu ai le fautuaga i le Afioga i le Minisita, e taua tele le upgrade po o le aoaoina o nai leoleo. O si vaega tonu lava lea ona e le mafai ona toe alofia le vaega lea. Sa ou talanoa i si afioga i le sui mamalu lea e sau i tatou Fono o Salai, e i ai le mea lea na tupu i le 2 vaiaso talu ai, ou te le iloa po ua silafia e lau Afioga i le Sui Fofoga Fetalai, sa avaseseina tatou ma se tasi foi o sui usufono i luga o alaleo i fafo, faaalu i Amerika i leitio i le mea na fai... ae le i faia, e le i tupu. Ia ua alu atu la faasalalau e tagata nei ma tau o le mea mautinoa mea nei, o mea manino mea nei o lea ua lipoti mai i Samoa ma faaalu i luga o leitio, pue mai le ata o... a o le mea la e lelei ai, ua maua le tagata na faia i inei. O lea la sa ou talanoa i si Minisita ma si Taitai Leoleo sa i i e saili mai, saili mai. O lea la ua maua le mea e nofo ai se i aumai e aoai. Ae lelei foi la lea se i faafofoga mai le toatele o tagata nei e faia nei mea.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

A o le vaega tonu lea e tau avatu ai lou manatu e taua tele le vaega lea mo le Ofisa o Leoleo, e le gata o le vaega lea o se team, an se IT Team po o se swatch team po o se vaega foi lea e o e sue mea o drugs ma mea faapea, e agai i ai. Ae faafetai o lea o le a fai le tatou aoga lea o le a fuafua mo nei vaega uma. Ae toe momoli atu ai le faafetai i lau Afioga i le Minisita ma lau Matagaluega. Faafetai lava.

SUI FOFOGA FETALAI: E tele loa tala e talatala i le Matagaluega o Leoleo, e le uma le fia faalogologo i ai. E i ai foi le faaopoopoga a le Nofoa i le tulaga o le aoga lea, leaga sa ou i ai i le amataga o le fatufatuga o le faamoemoe ma faiga faavae ia lea e saunoa i ai le Taitai o le Malo. O le faamoemoe i le silasila mamao, ia fai ma centre Samoa i le Matagaluega o Leoleo i inei, e agai mai ai leoleo e i ai Niue, o Tokelau, o Vanuatu. O mea uma ia sa kava ai i totonu, e omai e ao atu i inei. E tasi lea mea tele lava sa aafia i totonu o le tala, lea ou te fiafia ou te fiafia ou te faalogologo i ai i le Police Academy lea e talanoa i ai, o se mea aupito sili ona lelei.

O le mea lea, malo faafetai i lau Afioga i le Minisita, o lea ua faalogologo atu, ia amata ia. Ua ta fia vaai lava i ai, ioe. Ae ou te tapa lau Afioga e faaauau lau saunoaga, nai mea laiti lava ia, a o lea ua maea ona momoli lau faafetai ia Fuiavailili Econ Keil ma lana staff. Ae o nai mea laiti lava ia na taua ona faasee ai lea i le Ofisa o le Tiute.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai. Faafetai foi i nai uso na faaulavea ma faufautua mai.

I le aumaiga o le faamatalaga lea i le vaega lea e faatupu le vevesi i aiga pe a ogaga e le augata le Matagaluega e aumai, ae aumai loa e le Matagaluega molia loa. Ona malama lea o le taeao toe sau le tina toe tagi i luma o le Komesina, faamolemole pe mafai ona aveese le moliaga. E molia leaga ua pisapisao i le fale, e le mafai ona le molia e leoleo. O le uiga lena o le faamatalaga e telefoni mai i le po e avatu ae malama le taeao fai atu ua molia, ae toe tagi masusu le tina. Ia ae molia loa e leoleo e le mafai ona toe aveesea.

O le vaega lea i fualaau faasaina, ou te talitonu e le faigofie le sueina, ae o lo o taumafai pea le Matagaluega e sue. E pei foi o le tuufaatasiga i fualaau faasaina na maua mai i le tausaga ua mavae, ia o le galulue faatasi o le Matagaluega o Tiute ma le Ofisa o Leoleo.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le cyber crime lea, ou te iloaina a uma nei le police academy lea e fai atonu o le a i ai ma se unit faapea e suesue ai ae faamoemoe foi i le Matagaluega o Fesoootaiga ma ala kolosi solo i le vanimonimo e fesoasoani mai i le suega. Ae o lo o taumafai foi i ai le tatou Matagaluega. O le amatalia o le police academy, o lo o faatali se taimi e aumai ai le aufaigaluega o lo o i Saina. Sa ou oo i le Amepasa i le aso talaatu ananafi, masalo se i uma le palota ona taumafai lea e aumai, ona e tele naunau galuega o lo o faatali i ai, ae ia galulue Malo e lua i se faiga e mafai ai ona aumai tagata ia.

O le galuega o le falepuipui i Vaiaata, ia o le lui o le a tuu atu i le Komesina ma le afioga ia Sagaga, tatala le galuega lea i le aso 19 o Mati o le masina fou, tatala. O le mea e lelei i Upolu, e lelei foi i Savaii. O lenei galuega ua ta malepelepe ai. Ae faafetai i le alofa o le Atua ua uma, ua uma. Ia, o a foi ni faamatalaga sa fai ia te au ma tuuaia solo mo le fausiaina o lea falepuipui, ia e ui lava e le o au o se Savaii, ae ona o au o le Minisita o Upolu ma Savaii. E le mafai foi ona ou faia se falepuipui matagofie i Upolu nei a o lo o faaletonu le mea o lo o tofafa ai le mamalu o le atunuu o lo o nofosala i Savaii. Ma o le falepuipui lea o lo o maua mai ai le fofoga taumafa, fesoasoani tele mai i Tanumalala. Fesoasoani mai i le paketi a le Matagaluega o Tupe e avatu aua le fofoga taumafa.

Faafetai atu i le Komesina, aemaise o lea e i i le Susuga ia Sagaga o lo o vaايا lea faatoaga tele a le falepuipui e 417 eka o lo o tele ai le talo ma le fai a na mafai ona matou avea i fafo ua ave, ae ona e faamuamua le fofoga taumafa o le falepuipui. Ia, le tatou falepuipui, o le a tapena atu le Malo i le aso 19 i le aso Faraile e tatala ai le tatou falepuipui ma e le toe suia.

Ia, o le a amata atu se faamatalaga i le matou mafutaga ma le Matagaluega o Tiute ma Tupe Maua.

SUI FOFOGA FETALAI: Se i tuu atu le avanoa i lau Afioga i le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E tasi lava lau Afioga le mataupu lea, e i ai lava le itu taua ona o le mataupu e le i leva ona saili mai ai foi se fautuaga ia te au, ona ua tau atagia mai nisi foi o le atunuu ua avatu ni moliaga faasaga i alii ma faipule e tusa ai foi o ni upu masoa e lafo i totonu o le Fono.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Sa matou fefaasoaai ai, ia, ma o se mataupu taua tele ona i le tulaga lea o le malamalama foi o leoleo, malamalama lelei le Ofisa Sili o Pulega o Leoleo i mea nei o tu ma aga faale-atunuu. A oo loa ina fonoa malae po o maota foi o se nuu i tulaga lava po o le a lava le fonu po o le fonu tauati, po o le fonu foi a pulenuu, e i ai lava mataupu ogaoga e tulai mai aemaise o se atalii ua faaua, ona tuu mai loa lea ia i latou e togisala ae ave ma le aoaiga. O le aoaiga la lea, ia po o le taulealea po o se isi foi matai, ia o tulaga lava masani, o le malosi o le pulega e ave i le gagana e oo lava i ona ooooga. A oo loa ina maualuga le mea ua oo i ai mea nei o saunoaga ma fetalaiga e aoai ai se matai, se matai ua faaua tele po o se taulealea, i le tagata la e fou atu i totonu faatoa matai, e matua maalili lava i upu, ona o i lea e tui ai le malosi o le nuu i le faatonuga e ave.

O atunuu la e i fafo e pei o Amerika, o le sala pito ogaoga o le ave o oe e faaeletise i totonu o le potu e faauma ai lou ola. O isi atunuu, e faaoga le... se i tulou lava, e faaoga le maea e sisi ai, capital punishment. O tatou, na ou... lea ou te tau manatu po o le 2004 lea na ou avea ai le pepa i le Kapeneta e faamuta le capital punishment i Samoa, e ogatasi ai tatou ma le tulaga ua agai i ai le lalolagi. E le o le auala lea e taofia ai le fasioti tagata. E i ai isi auala, ma ua leva ona i ai pea le sala lea i totonu o le tatou tusi Tulafono, ae o le tulaga masani o faaiuga, e sala oti. Ia ae leai se sala oti o faataunuu i Samoa, ona liliu lea i le soloatoa. E ala ona ou fai atua le mea lea, i le sala lea faale-Malo. O le sala faa-Roma i aso o Roma i le tagata ua oo i ai le sala oti, e sisi i luga o le satauro. Mo tagata ia e le o ni tagata Roma, o le sala pito sili lea ona mataga i taimi o pulega a Roma, o le sala pito sili lea ona mataga, o le faatautau o le tagata i le satauro lea na faatautau ai lo tatou Alii. Ae a oo loa ina sala le Roma, faaoga le pelu.

O le ala lenei na ala ai ona faasatauro lo tatou Alii, faasatauro foi Peteru, ae faaoga le pelu ia Paulo, ona o le sitiseni Roma. O la e i ai nei lava i Roma le pou e tai pei o le... masalo pe 3 futu maualuga, o la e tu lava le pou lenei o la e preservc, na faalagolago ai lona ao, ae faaoga loa le pelu e vavae ai le ao. O sala ia eseese. O le pelu foi e faaoga e tagata Arapi. Ae a oo mai loa i faasalaga faa-Samoa, o le upu. O le malosi o le upu, e matua tetemu ai le isi tagata nofosala. O i ina lea na fanau mai ai le muagagana lea, a oo loa ina malosi le agi mai o le lauga a le togisala, ona e iloa loa lea ua lata mai le malu. Leaga o faiga na o faaiuga a le atunuu lenei, e matua maoae lava upu e lafo ia te oe, a o tua atu o le faaiuga, ua e magalo, ia po o le tulaga ua pau lau sala.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O uiga lava ia o tatou, e faaaoga lava la le upu, e pei o le pelu e taumaai itu e lua. O lea la, a alu la le tagata e le masani ai, e matua tetemu i upu pe a oo loa ina agai mai ia te ia, mafaufau loa, o le a molia i le Tulafono. O le mataupu la lena o lea sa matou talanoa ai, o le tulaga lena e tatau ona faaeteete i ai, leaga o tu ma aganuu a Samoa, o la e lava e i ai le tulafono e faaeteete i ai. A alu la le matai e le masani i mea ia, o le mea lena e agai i ai. O le ala lena sa feiloai ai, e le tatau ona alu atu fua le Tulafono lea faaleoleo e tagofia ai fua tulaga ia o tu ma aganuu a Samoa, o i ina lea e ala ai ona maua le toafilemu i totonu o nuu, taofiofi ai le moemoenoa ma le laufaleaina, a o le malosi e pei o le pelu e faataumaai itu e lua, o le upu. O le upu e faasaosao ai se tagata faaua i totonu o le nuu.

Lau Afioga i le Fofoga Fetalai, o se mataupu taua tele lea ua laga, ona o uiga ia e taua tele mo i latou faatoa matai ma o atu saofafai i totonu o fono ae faalogo atu ua sau le mea lea, oso loa le manatu i le fofoga faa-fafo, ae galo ai ia te ia, o tu ia ma aganuu a Samoa e ala ai ona malosi le pulega mamalu a alii ma faipule.

SUI FOFOGA FETALAI: Malo saunoa i lau Afioga i le Taitai o le Malo. Ua faafofoga le atunuu. O le mea lea, e le toe tele foi se tala a le Nofoa i ai i le taua o lau saunoaga, o lea ua maua ato le faataua o le tu ma le aganuu, aua le nofo filemu e fesoasoani i le Matagaluega ma le latou anava tausii.

E tapa lau Afioga i le Minisita e tulai mai e faaauau lau saunoaga.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai. Ia, o le Matagaluega leni o Tupe Maua, atonu o se tasi leni o Matagaluega taua i le galueaina o le tamaoiga o le tatou atunuu, aemaise galuega fai. O upu a le Tusi Paia, a maea se galuega lelei sa faatino, ona faapea ifo lea “Le Alii e, o matou lava o auauna le aoga.” E faapena se lagona e fia momoli atu ai se faamatalaga i galuega lelei sa faatino ma ausia e leni Matagaluega, aemaise foi luitau e tele sa feagai ai, a o folau le matou faigamalaga i totonu o le 5 tausaga o le a faaiuu. Ma e lagona ai lava le mafanafana, le faatauva aemaise o le agaga faafetai i le Atua Silisili ese ona o Lona alofa taumulimuli ma lana puipuiga ua aulia mai ai leni itula, ma mafai ai ona faatino tiute ma matafaioi a leni Matagaluega ma lo tatou Malo, aemaise tagatanuu uma o Samoa.

26 FEPUARI 2021

**Tulafono Tau Faaofi o le Faatatauina o Tupe Faaopopo (Nu.1)
2020/2021 – felafolafoaiga faaauau i luga o le faitauga faalua**

E 3 matafaioi autu a le Matagaluega, e pei ona outou silafia. 1. O le aoina o tupe maua a le Malo mai lafoga eseese ma tiute o oloa auina mai i totonu o Samoa. E faapea foi ma laisene pisinisi, laisene tiute ma laisene e gaosia ai ava malosi. 2. O le galueaiina o le kiliaina o oloa o tagata malaga mai totonu o Samoa. 3. O le puipuia o tatou tuaoi faava-o-Malo mai le auina mai i totonu o Samoa o oloa, auupega ma fualaau faasaina faasolitulafono. O nei tiute ma matafaioi, o lo o afifi malu ai i totonu o sini autu ma vaaiga taulai, vision a le Matagaluega. E pei ona tusia i totonu o ana fuafuaga autasi 2017-2022, Corporate plans. O fuafuaga alualu mamao ma taiala o auaunaga. O lo o faataua i totonu o nei fuafuaga alualu mamao le vaaiga taulai a le Matagaluega o lo o galulue faatasi ma se Samoa saogalemu ma manuia. Ma lana manulauti, missions, ia gafataulimaina le atinae o Samoa e ala i le lelei atoatoa o le aoina o tupe maua. Siitia o le usitaia o Tulafono ma se tuaoi faava-o-Malo malosi lona puipuiga.

O le faanaunautaiga o le Matagaluega mo le lumanai, future respiration. O lo o faapea mai, ia mafai ona faataunuaina e ana paaga a latou matafaioi o Tulafono i le loto fuatia ifo, voluntary compliance. Ma e faafaigofie le fesoasoani a le Matagaluega. Ia faatupulaia le silafia o tagatanuu uma, o le tologiina o lafoga ma tiute, o lo latou sao tele lea mo le atunuu atoa. Ua talitonuina e le Malo le tulaga lelei atoatoa o le faafoeina lelei o fefaatauaiga i totonu o le atunuu. E faapea ma le puleaina lelei ma le malupuipuia o faamaumauga ma faamatalaga tau lafoga ma tiute. Ia silafia e nuu ma afioaga le taua o le malupuipuia lelei o o latou tuaoi faava-o-Malo i o latou soifuaga i aso uma. Ia talitonu nuu ma afioaga e i ai aiaiga talafeagai ma faale-Tulafono e tulituliloaina ai i latou o e le tausisia le Tulafono. Ia talitonu nuu ma afioaga, o le afaigaluega a le Matagaluega e lava le tomai, silafia, faamaoni ma le agaga fesoasoani i le faatinoina o o latou tiute. Ma ia aloaia faava-o-Malo auala talafeagai faale-Tulafono o lo o faafoeina ai fefaatauaiga ma le faamalosia o puipuiga o tuaoi faava-o-Malo.

Ina ia ausia uma nei vaaiga taulai ma lana manulauti, e 5 taiala tumaoti ua faataatitia e le Matagaluega aua matafaioi...

SUI FOFOGA FETALAI: Ua ou faalavefau ae ua faatutula ma faasee le sa o lau Afioaga i le Minisita o Tupe Maua ma le Matagaluega o Leoleo ma Falepuipui, ona o lea ua tatou taunuu tonu mai i le taimi o le tatou malologa masani.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O lea ou te faasilasila atu ai ma le faaalalo, o le a faataatiaese Galuega a le Maota, mo lana malologa masani.

Na faataatiaese Taualumaga a le Fono Aoaofa Faitulafono mo lana malologa i le itula e 7:46 i le po, ma toe amatalia i le itula e 8:37 i le po.

Na toe faaauau felafolafoaiga ma Tali a le Malo i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu 1) 2020/2021.

SUI FOFOGA FETALAI: Ou te faasilasila atu ua toe amatalia nei Taualumaga a le Fono Aoaofa Faitulafono.

E i ai le manatu o lea ua matu i fau le tautege ua maea foi le taumafataga a le paia o le Palemene. Ua maua foi se faasiligamalosia e faaauau ai le tatou galuega i leni afiafi. Ia malo le usufono, malo foi le tauatai.

E faataatiaese Galuega a le Maota o saunoa le Afioga i le Minisita o le Matagaluega o Tupe Maua, Matagaluega o Leoleo ma Falepuipui ma le ola Toefuataina.

O le mea lea ou te tapa ma le faaaloalo lau Afioga e tulai mai e faaauau lau saunoaga.

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai. O taiala tumaoti nei a le Matagaluega e 5. Ia lelei le auaunaga ma paaga faapea ma le faafoeina o le tausisia o Tulafono. Toe fuataina le aoina o tupe maua i faiga faaonaponei. Lelei le faafoeina o fefaatauaiga ma le puipuiga o tuaoi faava-o-Malo. Faafoeina lelei o suesuega faaauau ma le faamalosi o Tulafono. Faalelei le punaoa faigaluega faatasi ai ma agavaa, ina ia siitia le tomai faapitoa ma tomai faatitai o le afaigaluega. O le faavaa lena o taitaiga lelei, good governance framework. O lo o limataitaina ai le Matagaluega i le faatinoina o ona tiute ma matafaioi. E faatasi ai ma le agatausili, values mo auaunaga lelei ma le faamaoni. Le faaituau, atoatoa, manino, faaaloalo, fetalai ma le faatuatuaina.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

O nisi la nei o galuega ma matatia sa mafai ona faatinoina i totonu o le 5 tausaga o la matou mafutaga. O le tausaga faale-tupe Iulai 2015 - Iuni 2016. E \$483 miliona le tupe maua na fuafua mo le tausaga faale-tupe ae na aoina e le Matagaluega le \$485.1 miliona. Ma faamauina ai se tupe

maua faasili e \$21.1 miliona pe 100.1% na aoina. E 65% na aoina e le Ofisa o le Tiute, 34% na aoina e le Ofisa o Lafoga. Ae 1% na aoina mai tupe maua e le o ni tiute po o lafoga, non tax revenues. E pei ona silafia e amata leni Paeaiga ia Aperila i le 2016 ina ua maea le faiga palota, ma o le afa mulimuli foi lea o le tausaga faale-tupe 2015/2016. O le tausaga muamua foi lea mai ia Ianuari 2016 faatoa amata ai le Ofisa sili o Pulega, ma sa i ai le manatu popole e ono le ausia fuafuaga mamao o galuega faatino, aemaise fuafuaga tatau o tupe maua e aoina ona e fou uma matou i o matou tofiga.

Ae peitai sa i ai le fesoasoani o le Agaga Paia o le Atua faapea ana faamanuiaga, na uunaia malosi ma tapasa filemu ai la matou faigamalaga i lea tausaga faale-tupe muamua. E le i i ai ni Tulafono Tau Faaofi a le Matagaluega i lea afa mulimuli o le tausaga faale-tupe, aua toe 3 masina maea le tausaga faale-tupe i le aso 30 o Iuni 2016. Ae na o le galulue punouai e faaauau galuega ma fua faatatau ua maea ona faataatitia ma pasia mo le tausaga faale-tupe. E fia faailoa ma le agaga faafetai le faaiuga lelei ma le maoae o lea tausaga faale-tupe, ona faatoa toe ausia ma ova le tupe maua na aoina e le Matagaluega talu le 4 i le 5 tausaga na tuanai. Ae le i ausia tupe maua na fuafuaina e aoina, aepeitai sa faamauina le agai pea i luga o le aofaiga ato o tupe maua e aoina i tausaga taitasi. E le o se faatamala o le Matagaluega ma le Pulega sa i ai, ae sa tele naua poloketi ma fuafuaga mamao sa tapenaina ma faataatitia mo le faaleleia o galuega faatino mo le lumanai ina ia faapea ona agai ai i luga ma luma le usitaia o Tulafono e tagata totogi lafoga, aemaise lo latou malamalama i aiaiga o le Tulafono ma lo latou sao. E faatasi ma le auaunaga fesoasoani soosoo tauau a le Matagaluega ia agai i luma le lelei, manino, le faaituau, faaaloalo ae faasilisili le faamaoni mo tagata uma.

O le tausaga faaletupe 2016/2017, e \$491.7 miliona le tupe maua na fuafua mo le tausaga faaletupe ae na aoina e le Matagaluega le \$501.3 miliona, ma maua ai se tupe maua faasili, e \$91.6 miliona, pe 101% na aoina. E 65% na aoina e le Ofisa o Tiute, 34% na aoina e le Ofisa o Lafoga, ae 1% na aoina mai isi auaunaga a le Matagaluega.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Na faamauina i lea tausaga se siitiaga maualuga o tupe maua na aoina pe tusa ma le \$51.5 miliona, pe a faatusa i tupe maua na aoina e le Matagaluega i lea tausaga faaletupe 2015/2016. E faapena foi pe a faatusa i tausaga e 5 ua tuanai atu. O le viiga lava e faafoi i lo tatou Atua, ona o lana fesoasoani ua ausia ai leni galuega. Aemaise le agaga faafetai i le tali mai o le mamalu o tagata totogi lafoga, aua ua agai i luga le tulaga o le usitaia o

aiaiga o Tulafono, improve levels of compliance. Ua mafai ona totogi mai lafoga i totonu o taimi faatapulaa. Sao faamatalaga tau lafoga ma tiute sa tuuina mai i le Matagaluega, aemaise le agai mai e resitala mo lafoga ma tiute i lo latou loto malamalama. Aua ua agai i luma lo latou silafia ma le malamalama i aiaiga o le Tulafono. E lelei ma manino le auaunaga a le Matagaluega ua tuuina atu, aemaise ua nofo manino lo latou sao taua mo le atiaeina o le tatou atunuu, e ala i le totogiina o lafoga ma tiute. Malo lava faafetai.

O le Tulafono ma suiga o Tulafono na pasia. Na ausia foi nei galuega lelei i le tausaga, ona o Tulafono o lo o limataitaina ai lenei Matagaluega i lea tausaga faaletupe. O nisi nei o suiga i ana Tulafono na pasia e le Palemene i totonu o le 2016 i le 2017. Na pasia e le Palemene i le 2017 ni suiga tetele mo le Tulafono o Lafoga 2012, e aveesea ai lafoga tuusaunua mai tupe maua a faafeagaiga tausinu o so o se Ekalesia, faapea ma tupe maua a Le Ao o le Malo o Samoa, Head of State. E faatasi ai ma le toe fetuunaiga i lalo o lafoga o tupe maua, income tax rate a tagata faigaluega employees ma tagata fai pisinisi taitoatasi, sole traders. O le lafoga lenei a faafeagaiga, e momoli le faafetai i le tele o faafeagaiga o totogi a latou lafoga i Ekalesia uma lava i Samoa. E leai se Ekalesia e le o totogia lafoga, e i ai isi e le i totogia. Faafetai.

O le agaga o le Tulafono ma le faatulagaina o le lafoga lea ina ia tofua sao tagata e maua a latou tupe, i le tamaoaiga o Samoa. Aua le vaai mai a tatou paaga i fafo, e le o faalagolago atu le tatou atunuu i tupe foi a latou tagata faigaluega, lafoga a latou tagata, o lo o foai mai mo tatou. A o lea ua tatou taumafai ina ia fai sao uma le atunuu i le fausiaina o le tatou tamaoaiga e ala i alatetele, falemai, faleaoga, vai, moli eletise, mai e sii atu i Niu Sila, falemai faamama toto, ma le tele o galuega uma. O tupe nei o lo o faaaogaina. Ua sii le aofaiga o tupe maua e leai se lafoga, mai le \$12,000 i le \$15,000. Ua sii le aofaiga o tupe maua e faa-lafoga i le 20% tupe maua e pau i le va o le \$15,000 ma le \$25,000 o le 20% o lafoga totogi. Ua sii le aofaiga o tupe maua faalafoga i le 27%, tupe maua e ova atu i le \$25,000 i le 27%.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Sa faapea foi ona pasia le Tulafono e fesoasoani ai i tagata faipisinisi e faatau atu i fafo atu o Samoa a latou oloa, po o exports. E maua ai le faamama avega e 50% export tax credit i luga o sana lafoga o tupe maua e totogi i le faaiuga o le tausaga pe afai e mautinoa ma faamaonia mai i faamaumauga, ua toe foi mai i totonu o Samoa le 100% o tupe maua, mo oloa sa ia faatauina atu i atunuu i fafo. O se fesoasoani faale-Tulafono lea mo exporters, ina ia toe auina mai i Samoa a latou tupe maua, ae aua le teuina i fafo.

Na pasia foi le siitaga o le excise tax o le sikaleti ma ava malolosi faaopoopo le isi 3% faapea le 5% ma le 20% i luga o taumafa e tele ai gao ma le masina faapea taumafa ma mainu e tele ai suka. Na afua leni iloiloga ona o se sailiiliga a le Matagaluega o le Soifua Maloloina i meataumafa ma vaiinu e aafia ai le soifua maloloina o le atunuu, aemaise lava i faamai e le pipisi. E moni e afaina ai tupe maua ae mo le lelei o le atunuu lautele na pasia ai nei suiga. O se taumafaiga e faaitiitia ai le taumafaina o nei oloa, pe a tuu i luga le lafoga o oloa gaosi, ma agai ai i luga lona taugata, ina ia faaitiitia i latou e taumafaina, ma faaitiitia ai le afaina o tatou tagata i gasegase mai faamai le pipisi, suka, toto maualuga ma le kanesa. Alu ai i lalo le tupe faaalu a le Malo mai togafitiga o mai le pipisi, aemaise le auina atu fafo o tatou gasegase, e mafua mai i le taumafaina o taumafa gaoa, oona, suamalie, faapea sikaleti ma le ava malosi.

E le gata i vaega nei, ae na faatino foi le iloiloga, ma faapauina ai le tau o tiute, ma lafoga mo meataumafa e tatau ona uunaia, mo le fofoga taumafa o le atunuu, e pei o fualaaui aina mata, ma fualaaui faisua. Sa pasia foi le siitia le tau o laisene pisinisi mo kamupani ma tausī mavaega mai le \$500 i le %800. O pisinisi taitoatasi ma faapaaga mai le \$220 i le \$352 aua ua leva tausaga mai le 1998, e le i toe iloiloaina le tau o nei laisene. Sa pasia suiga i le vaega o le Tulafono o Tupe Maua mo tupe faasili faavae, capital gains tax. E tuuese le 3 tausaga faatapulaa, ae tatala ma vaevae i le 12 masina le 27% i luga o tupe maua faasili, ma tua atu o le 12 masina e 10% i luga o tupe maua faasili mai sau aseta e faatau ese atu.

O nei suiga uma sa tele tapenaga ma faalauiloa sa faatino mai i le amataga o le tausaga faaletupe, pe o le 6 masina mulimuli o le 2016 ma le amataga o le 2017, seia oo ina tuuina mai ma faatalanoaina i Tulafono Tau Faaofi, seia oo ina pasia ia Iuni 2017, ma tuuina mai loa e tapena ai le Matagaluega mo le faatinoina i le tausaga faaletupe fou 2017/2018.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

I le aso 2 Setema 2016, na faalauiloa ai le afaigaluega aemaise o ana paaga le amatalia o lana polokalame mo le faaleleia o le usitaia o aiaiga o le Tulafono, compliance improvement plan mo le 2 tausaga. O le aso 1 Iulai 2016 i le 30 Iuni 2018 ae na faamaea i le aso 31 Tesema 2018.

O leni fuafuaga alualu mamao sa fausia mai i luitau risks, ogaoga ma le taua, mautinoa mai suesuega ma finaglo faaalua o tagata totogi lafoga ma tiute, o lo o lepetia ma afaina ai le usitaia o aiaiga o Tulafono, mo le tuuina mai o pepa lafoga, tiute ma totogiina mai lafoga, tiute i taimi ua faatulagaina i le Tulafono. E tele le sao o leni polokalame i galuega faatino a le Matagaluega, aua e utiuti meafaigaluega ma tagata faigaluega a

lo tatou Malo. E utiuti seleni ma taimi e faatino ai mea uma tatou te mananao e fai. A o le polokalame leni ua mafai ai ona ave le faamuamua ma le faataua i luitau nei, ina ia faaititia ma aveeseina, ina ia faaleleia ma faafaigofie, auala e usitaia ai e tatou paaga aiaiga o Tulafono. E manino le faatinoina o auunaga a le Matagaluega. Ina ia vave, sao, ma lelei le aoina o tupe maua i taimi ua faatulagaina, vave kilia tagata malaga ma oloa e auina mai i Samoa, ina ia vave fefaatauaiga mo tagata lautele. Aemaise le puipuiga mo le saogalemu o tatou tuaoi faava-o-Malo mai tagata, oloa, laau, o fualaau faasaina ma solitulafono.

Ou te talitonu, o le polokalame leni ua outou molimauina ai le tele o suiga o galuega fatino a le Matagaluega, aemaise le agai i luga o tupe maua sa aoina i totonu o le 5 tausaga o la matou mafutaga. O Samoa sa mua i malae i totonu o le Pasefika e fausia ma faatino leni polokalame, ma sa tuu faatasia e le konesale, tax consultant, ma le IMF, aemaise foi o le fesoasoani a le Ofisa o Lafoga a Niu Sila. Ia Oketopa i le 2016 na avea ai Samoa ma se tasi o sui faavae o le feagaiga faava-o-Malo o le Revised Kyoto Convention. O se matatia taua leni ua ausia e le Ofisa o Tiute ona tala faasolopito. Ona o leni feagaiga o se faavaa, blueprint taua mo galuega faatino a le Ofisa o Tiute, ua avea ai ma sui o le Faalapotopotoga o Tiute o le Lalolagi, World Custom Organisation. Ua mafai ona ausia e Samoa lea tulaga taua, ina ua maea ona iloilo ma faamaonia tapenaga o faamaumauga ua lelei ma atoatoa taiala o faiga faavae aemaise auala e faatino ai galuega, standard procedures. Ina ia manino ma tutusa le faatinoina o galuega e le Ofisa o Tiute i taimi uma aemaise foi le nofo malamalama o ana paaga, i nei auala o le Ofisa o Tiute.

Ia Me 2017, na saina ai e le Matagaluega e tauala i le Ofisa o Tiute le polokalame o aoaoga, capacity building mo le 5 tausaga ma le Ofisa o Tiute a Niu Sila, ma e maea lona faatinoina ia Iuni o le 2022.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O leni polokalame e fesoasoani ai le Ofisa o Tiute a Niu Sila e tapue le iloa ma le tomai o le aufaigaluega. Ma ia saunia lelei mo galuega faatino ma tali atu i nisi o luitau ma suiga o fefaatauaiga a le lalolagi. O se tasi vaega taua o leni fesoasoani, o le mafai ai lea e Samoa ona faamalieina tuutuuga, po o nisi o feagaiga faava-o-Malo. E pei ona i ai le feagaiga o le Trade Facilitation Agreements, a le Faalapotopotoga o Fefaatauaiga a le Lalolagi. E le gata i lea, o le faaauau ai pea o galuega iloilo ma faaleleia ai le faatinoga o galuega, ina ia ausia le tulaga moomia i le feagaiga faava-o-Malo a le Revise Kyoto Convention, a le Faalapotopotoga o Tiute a le lalolagi.

E le gata i leni polokalame mo aoaoga, sa faapena ona faimeaalofa mai foi le Ofisa o Tiute a Niu Sila, i ni mea faigaluega laiti, tools faapitoa e

fesoasoani e faatino ai galuega a lo tatou Ofisa, e pei o le First Defendant. E le fesiligia le aoga o nei mea faigaluega ma aoaoga, aua e siitia ai le silafia ma le iloa o le aufaigaluega o auala e mataituina ma taofia ai le faaulufaleina mai i Samoa, o vaega nei e aafia ai le lamatia ai o le soifua o tatou tagatanuu.

Sa faamauina i galuega a le vaega o tiute ni faamomoli e 4 na mauaina ai ni oloa ma fualaau faasaina i le tausaga faale-tupe lenei 2016/2017. O nei oloa faasaina e aafia ai mea faigaluega e faaaogaina i fualaau faasaina, e le gata i lea, o ni fualaau faasaina o aisa, i le malaevaalele i Fagalii.

Ia Iulai 2017 ia Iuni 2018, e \$521.6 miliona le tupe maua na fuafua mo le tausaga faale-tupe e ao ona aoina e le Matagaluega. E na o le \$507.6 miliona, na tulai mai se pau o tupe maua e \$14 miliona, e 97 % na aoina. E \$329.4 miliona na aoina e le Ofisa o Tiute, ae \$178.2 miliona na aoina mai le Ofisa o Lafoga. E ui e le i ausia e le Matagaluega le aofai atoa o tupe maua na fuafuaina, ae sa lagona lava le agaga faafetai i le Alii, ona e sili atu lea tupe maua nai lo le tausaga ua tuana'i 2016/2017 mai isi tausaga i tua atu. Ma o se pine faamau, o lo o agai lava i luga le taumafaiga a le Pulega ma le aufaigaluega e faatino i se mafai ma se malosi e aoina a tatou tupe maua, a o le Viiga lava e mo lo tatou Alii.

E ui foi i luitau e tele ona o suiga o Tulafono, aemaise o le faatuaituai ona faatino aulape, ma manaoga o nei suiga, sa pasia i le tausaga 2016/2017, na mafua ai ona tuu i luga fuafuaga Faatatau o Tupe Maua, mo le Tausaga Faale-tupe.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Ae o le agaga faafetai e momoli atu pea i a matou paaga faipisinisi ma tagata totogi lafoga uma mo la outou sao taua ma le maua luga sa faapea ona tuuina mai i lenei tausaga, e ala i a outou lafoga ma tiute sa aoina e le Matagaluega aua le atinaeina o le tatou Malo, ma le soifua laulelei faapea le fiafia o tatou tagatanuu uma. Faamalo le limalima i mea silisili ona lelei. Faafetai mo lau lagolago. Faamalo le tautai.

Tulafono ma suiga o Tulafono na pasia, na faamuta i le Aso 30 o Iuni 2018 le Tulafono mo Investment Tax Credit, e uunaia ai le fausia o ni faletalimalo lelei ma le manaia, Five Stars mo turisi. Na amatalia lenei Tulafono mai le 2003 mo le 5 tausaga, 2007 toe faaopoopo le isi 5 tausaga, 2008 toe faaopoopo le isi 5 tausaga mulimuli. 2013 i le 2017, ma faamaea ai loa i le aso 30 o Iuni, 2018.

Ua manatu le Malo ua ausia le faamoemoe o lenei Tulafono, e uunaia ai le fausia o faletalimalo lelei ma mananaia. E pei o le Taumeasina Hotel,

Aggie Greys Hotel i Mulifanua, Sheraton Hotel, Tanoa Hotel, Lava Hotel, Return to Paradise ma isi, aua a tatou turisi, aemaise le maua ai foi o galuega a o tatou tagata.

O le Tulafono nei mo Investment Tax Credit, mai i le 2003 na amata ai mai i le 2018 le Aso 30 o Iuni, e \$113.2 miliona, le tupe sa le mafai ona maua mai e le Ofisa o Lafoga. E oo mai foi i le taimi lea, Aso 30 o Iuni 2018, ua \$80 miliona ua faaaogaina, ma o lo o totoe ai nei le \$33.2, e tatau ona faauma e le i oo atu i le 2023 i le aso mulimuli o Iuni. A oo atu i ai e le i faaaogaina, ua toe totogi mai tupe nei e ala i lafoga. O se tupe tele, ae a lelei foi ona maua galuega, a tagata faigaluega ma totogi atu lafoga, atonu o le agaga lea na fai ai le faamamaavega a le Malo, mo hotels, turisi. E tele le fesoasoani a le Malo lea ua ave i le turisi, ae o lea ua faagata i le 2018.

I taumafaiga a le Matagaluega ina ia uunaia pea le mamalu le manulauti a le Malo i le faaaogaina o le malosiaga faafouina mo le eletise, renewable energy, o le ala lea na iloilo ma faapau ai le lafoga o le excise tax mai i le 20% i le 5%, mo taavale e faaaogaina ai le eletise, electric cars, atoa ai ma taavale e 2 malosiaga hybrids e fetuutuunai i ai le faaaogaina o le suauu ma le eletise. O le faamamaavega leni na fai ae le i taunuu mai ni taavale ae lea ua atoa le tausaga o faatino. E talitonu e toeitiiti a taunuu mai. I leni foi vaitau i le tatou atunuu, ua matua tele le taavale, ova le taavale, ae ou te talitonu i le mafuaaga na maua mai ai ni pikiapu taugofie, taavale taugofie pikiapu, mo le faiga o faatoaga.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Ae o le taimi leni, e na o SUVs, SUVs, SUVs, ia se i vaavaai le Matagaluega po o le a se isi faiga e mafai ai ona fetuunai, ina ia mafai ona faatino le mafuaaga na ala ai ona aumai taavale nei.

E le gata i le iloilo o taavale, ae faapea foi ona toe iloilo ma siitia ai le tau o lafoga, ma excise i tapaa ma ava malosi. O le naunautaiga lava, ina ia fesoasoani leni galuega i galuega a le Matagaluega o le Soifua Maloloina. Sa toe iloilo le lafoga mo tupe faasili i le maea faailoa ai o nisi o feteenaiga i lona faatautaiga ma le isi Tulafono e fesootai, poloaiga o tiute faailoga tusi o lo o faatautaia e le Matagaluega o Tupe. O lea e manaomia le faailoga tusi leni mo fanua resitala, e aumai i lalo o le Matagaluega o Tiute, ina ia mafai ai ona maua e le Matagaluega o Tiute fanua uma lava ia e faatau i Samoa, ina ia mafai ona faaoga Tax Credit, oi le Capital Gain, ona e matou le iloa ni fanua faatau, ona e resitala e le MNRE, ia e fai le stamp duty i le Ofisa o Tupe, ia ae tu tu matou lea e ona le Tulafono. O lea la ua uma ona ou talosaga i Minisita faapea o le a aumai, ina ia mafai ai ona matou maua le faatauga fanua lea e fai i nei.

Ia Setema i le 2017, na talimalo le Matagaluega e ala i le Ofisa o Lafoga i fonotaga a Faauluuluga o Pulega a Ofisa o Lafoga o le Pasefika, Pacific Island Tax Administration Association, PITA po o PITAA. E toa-16 atunuu o le Pasefika o lo o avea ma sui o lenei Faalapotopotoga ma e tusa ma le toa-50 latou na malaga mai i Samoa e auai i lenei fonotaga e aofia ai paaga a le PITAA.

Faamauina le siitia o mataupu faale-solitulafono, non compliance na mafai ona mauaina e le au suesue, audit investigators a le Matagaluega, aemaise le vaega tuufaatasi a Tiute ma Leoleo, mo taifau sosogi, K9 Joints Operation, ma tuuina atu i ai ni faasalaga e tusa ma le 30 mataupu sa mauaina mai i auaunaga faatuaai sa faaaogaina ai le K9 ma tuuina atu foi i le Matagaluega o Leoleo mo le faaaauina o la tatou suesuega ma moliaga i lalo o la tatou Tulafono. E matua manaomia lava ni taifau faamolemole lau Afioga i le Minisita o Tupe e manaomia se 2.

E 2 ni suesuega tuufaatasi Joint Audit Investigation, a le Tiute ma Lafoga sa faatino i lea tausaga Faaletupe, ma maua ai tupe faaopoopo e ova ma le \$2 miliona, ma ua faapea ona totogiina mai. E afua nei galuega ona o le mataalia o le aufaigaluega, ua mafai ai ona faaaogaina nisi o metotia ma tomai sa aotauina ai le tele o aoaoga ma polokalame fesoasoani, atoa ai ma le siitia ai o tomai faapitoa, ua mafai ona maua e le aufaigaluega.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaaauu i luga o le faitauga faalua

I le mataituina o a tatou tuaoi faale-Malo, e 5 ni uta ma faamomoli na taofia e le Matagaluega, ona sa maua ai ni mea faigaluega e faaaogaina mo fualaa faasaina, ma o le 2 o ia faamomoli, na mafai ona maua ai fualaa faasaina, o le mariuana ma le aisa.

Tausaga Faaletupe 2018/2019, e \$530.2 miliona le tupe na fuafua mo le Tausaga Faaletupe ae na aoina e le Matagaluega le \$551.6 miliona ma faamauina ai se tupe maua faasili, e \$21.4 miliona pe 104.3% na aoina. E 63.6% na aoina e le Ofisa o Tiute ae 35.5 na aoina e le Ofisa o Lafoga ma le 0.9% na aoina mai tupe maua ma laisene o isi auaunaga.

O le aofaiga atoa o le siitia o tupe maua, ma tupe faasili sa aoina, pe a faatusatusa atu i tupe maua fuafuaina e aoina mo lea tausaga ma lea tausaga ua mavae, e pei ona taua o se manatu i lalo o le Matagaluega le molimau ola ma pine faamau i suiga tetele, sa faia ma le toe timataina o le vaaiga tulaia e tusa ma suiga faaonaponei ma auala eseese, o lo o siitia ma faaleleia atili ai le usitaia o le Tulafono, e a tatou paaga totogi lafoga, e ala i le faatinoina o latou pitolaau. E faila ma totogi mai lafoga, ma tiute i taimi ua faatulafonoina mo le totogiina mai o lafoga ma tiute.

Tulafono ma suiga o Tulafono na pasia. O le masina o Iuni 2019 na pasia ai e le Palemene le suiga o Tulafono o Lafoga tau Tiute mo le faaaogaina o metotia faatutusa faakomipiuta 2017, Harmonised System, e sui ai le metotia faatutusa 2012 mo le Tusi Kalifa o oloa. O lenei metotia e faaoga e sui uma, o faalapotopotoga o le Ofisa o tiute o le lalolagi, e aofia ai Samoa. E tai 5 tausaga ma update lenei metotia, ona o suiga i le faagasologa o fefaatauaiga a le lalolagi, faatasi ai ma le faailoaina mai o nisi oloa fou i fefaatauaiga i le lalolagi, ina ia faapea ona faaopoopo laina fou mo oloa fou, fetuunai isi laina ma sui faamatalaga o isi laina ina ia faamanino atili.

Sa faamaonia ma pasia teuteuga o Tulafono o Lafoga i luga o oloa gaosi 2019, e toe tuuina ai i lalo excise tax i luga o ava malosi spirit. Teuteuga o Tulafono mo Laisene Pisinisi 2018 ina ia atagia ai le totonu fuapauina o laisene pisinisi. Teuteuga o le Tulafono Faatonutonu mo ata tifaga 2018 faatasi ma le Tulafono Faapitoa mo le Kamupani o le Landing Eliminate e fitoitonu mo le ata televise faasolo o le South African Survivor.

Poloaiga mai le Ofisa o Tiute e faaleaogaina ai le 300% tiute, ma lafoga sa tuuina atu i luga o oloa o siusiu pipi, e auina mai i totonu o Samoa ma tuu i le 20% tiute, 10% o le excise tax ma le 15% VAGST o lo o i ai i le taimi nei.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Talu ona pasia i le masina o Iuni 2017 o le Tausaga Faaletupe o le 2016/2017 faatoa faamamaluina mai i le Aso 1 Ianuari 2018, suiga o le Tulafono o Lafoga o Tupe Maua, ua faaee ai lafoga i luga o tupe maua a faafeagaiga, Le Ao o Le Malo faatasi ma le tuuina i lalo o tau o lafoga o tupe maua.

I le tausaga faaletupe foi lea na pasia ai e le Kapeneta, se Teuteuga i le poloaiga o Tiute ma oloa faasaina e suia ai tausaga faatapulaa o taavale e auina mai i Samoa mai i le 8 tausaga i le 10 tausaga le matutua. E le gata i lea, ae na faamaonia ai foi le faaaogaina o le filifiliga tatau Faa-Minisita, e mafai ona faaulufale mai o taavale mo tatou tagatanuu sa galulue ma nonofo mau faavaitaimi i atunuu mamao, atoa ai foi ma le talatalaina o avanoa e mafai ai ona faaulufale mai a latou taavale afi e foeli tauagavale mo ituaiga laiti, mo le faaaogaina e tagata taitoatasi.

O le Tulafono lea e faaoga e o tatou aiga o lo o faigaluega i atunuu mamao, aemaise o i latou o lo o i tatou aiga i Niu Sila, Ausetalia ma fea lava o i ai, e mafai ona aumai ia latou taavale sa faaaogaina i tua atu o le 10 tausaga, ae ia mautinoa sa latou umia ia taavale i totonu o le 2 tausaga faatoa mafai ona aumai i totonu.

O Iulai i le 2019, na talia ai e le Kapeneta le talosaga, ina ia suia le igoa o le Matagaluega mai i le Matagaluega mo Tupe Maua, i le Matagaluega o Tiute ma Tupe Maua, ina ia atagia ai le atoaga o galuega ma matafaioi, o lo o faatino e le Matagaluega. I le faaopoopoina i ai o le igoa tiute i totonu o le igoa o le Matagaluega, e faigofie ai ona malamalama a tatou paaga faava-o-Malo i fafo i le tuufaatasia o nei auaunaga e 2, ma agai mai ai galuega, ma aoaoga fesoasoani, mo le Matagaluega.

Mo le tapueina o le tomai o Taitai o le Matagaluega, sa faatinoina i lea tausaga le aoaoga mo Taitai tau atiae mo le lumanai ma sa faatupeina e le Malo o Niu Sila lenei Polokalame e taua o le Pacific Leadership Program, ma sa mafai ona aotauina ai e le gata i le Taitai o le Ofisa o Tiute ae faapea foi isi Matagaluega, ma e toa-15 alii ma tamaitai mai le Matagaluega o Leoleo, Matagaluega o le Palemia ma le Kapeneta, Matagaluega o Faatoaga, Ofisa o Toelau, ma le Matagaluega o Tiute ma Tupe Maua, sa aotauina ma faaiuina ma le manuia, maua Tusi Pasi mai i lenei aoaoga.

Ina ia uunaia pea le galulue faatasi o le Matagaluega atoa ai ma Pisinisi Tutoatasi, na sainia se feagaiga MOU, a le Matagaluega ma le Faalapotopotoga o Pisinisi Tumaoti, Samoa Chamber of Commerce Industry i lenei tausaga faaletupe.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

E auga lava lenei feagaiga i le fefaasoai o faamatalaga atoa ai ma le naunautaiga, ina ia mafai ona fesoasoani Matagaluega, ia uunaia pisinisi uma ua resitalaina i lenei Faalapotopotoga, ia usitaia Tulafono ma faiga faavae, ma ia faigofie le talanoaina ma le faamalamalamaina o le suiga o nei Tulafono ma faiga faavae mo le silafia e pisinisi uma.

O le Tausaga Faaletupe Iulai 2019/2020. O tupe maua na aoina e \$527.7 miliona le tupe maua na fuafua, mo le tausaga faaletupe. Ae na aoina e le Matagaluega le \$551.3 miliona ma faamauina ai se tupe maua faasili e \$23.6 miliona, pe 104.5% na aoina. E 65.4 na aoina e le Ofisa o Tiute, 34.2 na aoina mai i le Ofisa o Lafoga, ma le 0.14% na aoina mai i tupe maua mai lasiene ma isi auaunaga. A faatusatusa i le tausaga faaletupe ua tuanai, e 1% ua pau ai tupe maua na aoina i le maea ai o Iuni 2019. O le aofaiga o tupe na fuafua e tataua ona aoina ma pasiaina e le Palemene e \$539.7 miliona. Ae talu ai ona o le aafiaga o le tamaoiaiga i le faamai o le misela ia Oketopa, Tesema 2019 sosoo ai ma vavao o le Poloiaiga mo Faalavelave Faafuasei, o le aafiaga o le Koviti-19 i le amataga o le 2020, na mafua ai ona toe fetuunai, ma tuuina ai i lalo fua Faatatau o Tupe Maua, e aoina e le Matagaluega i le \$527.7 miliona.

Ae ui i nei luitau ma faafitauli, sa maoae le taumafaiga a le Matagaluega, na ia aoina ai le 104.5% o Tupe Maua na fuafuaina e aoina i totonu o lenei

Tausaga Faaletupe. O lenei tupe maua faasili na ausia ona o le naunautaiga ma le galulue malosi o le aufaigaluega faatasi ma le agai i luga o le usitaia o manaoga o Tulafono i a tatou paaga faipisinisi, e ui i aafiaga ogaoga o le Koviti.

Tulafono i suiga o Tulafono na pasia, pasia le Teuteuga o le Tulafono mo le faafoega o lafoga, e mafai ai e le Minisita ona tapa faamaumauga talafeagai mo lafoga ma tiute tuua mo le faatinoina o ona tiute. Tulafono Toe Teuteu mo Tiute 2019 na faamalosi ai le atinaeina o Pisinisi Tumaoti ina ia siitia le gafatia o le gaosia o oloa faaleleia. Tulafono Toe Teuteu o Tiute, Atinae tau Turisi, ma o lo o gaosi i le 2010. O lenei Teuteuga o le taumafai lea e faapafala le tiute o agavaa mo lenei fesoasoani, aua le atinaeina o Faatoaga ma Faigafaiva. Tulafono toe Faatonutonu 2019, o lenei Tueteuga sa faatinoina, ina ia ona faaofi le Vaega 22A, o le Tulafono Faatonutonu o Tiute 2014, e tusa ai ma le maliega na sainia e Samoa ma le PACER PLUS.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Poloaiga o Tiute Rules of Origin for PACER PLUS 2019. O lenei suiga ina ia mafai ona faaofi le vaega 3 o le Poloaiga o tiute na faavae aloaia mo le maliega o le PACER PLUS. O le Tulafono lenei PACER PLUS, i faamaumauga a le IMF analysis sa faia e le IMF, e \$35 miliona le tupe maua pe a 25 tausaga o faagaioi le... a uma le 25 tausaga o le tupe lena e le maua i le 25 tausaga. O se tupe te i faapea ai e... ae a faatusatusa i le tupe lea o lo o maua mai i le scheme foi lea o lo o o ai ia o tatou tagata faigaluega, e \$210 miliona o lo o maua mai ai i le tausaga. A faatupe le gst pe a omai nei e fai ai faatau e \$31 miliona e le o paleni lava le...

Poloaiga teuteu e faasaina ai oloa o lo o auina mai pisupo ma apa eleni, numera tasi 2020. O nei suiga na toe iloilo le aofaiga o apa pisupo ma apa eleni i totonu o le atigipusa. Na matua itagia ai lava matou e faioloa. Poloaiga teuteu e faasaina ai oloa e aumai i totonu, pisupo ma apa eleni numera 2 2020. O lenei poloaiga e tapu ai le faaulufale mai o pisupo, e 4 3lb i le pusa, seiavagana ai pusa ua na o le 2 apa o i ai. Faatasi ai ma le pusa apaia e 12, seiavagana pusa e na o le 8 po o le 6 apa ia o i ai.

O nei teuteuga, o le tali atu lea a le Malo, e tauala i le Matagaluega ina ia faia se faamama avega, mo aiga i faalavelave ona o le siitia pea o le tau o le soifuaga i apa nei. O le agaga o le Malo, ina ia faigofie ma taugofie oloa nei, e moomia pea e o tatou tagatanuu aua le gafa ai ma faalavelave.

O le masina o Aokuso 2019 na amatalia aloaia ai e le Matagaluega ona faaoga le lomiga 2017 o le Tusi Kalifa ma i le lomiga o le 2012 lea na

pasia ia Iuni 2019. E tele ni suiga o lenei lomiga HS 2017. E le gata i le faavasegaina o oloa, ae faapea foi le iloiloaina auiliili a le Matagaluega, i le tau o tiute ma lafoga mo oloa e auina mai i fafo. Na toe sui uma le Kalifa i le tausaga lea.

O le Tausaga Faaletupe lenei na faamauina ai le faatupeina e le Faaletupe o Atinae o Asia Asian Development Bank le faatauina o se masini faaata ma pusaoloa tetele, containers x-ray mo le Matagaluega. Na amatalia le faatalanoaga ma le ADB e tauala i uafu ma taulaga, faatasi ma le Matagaluega o Tupe mo lenei faamoemoe. Talu mai le faaiuga o le 2016, na amatalia loa le faagasologa o lenei galuega, ma o lo o fuafua e faamaeaina i se taimi o le tausaga lenei i le 2021. O lenei masini o le a faaoga fesoasoani tele i le Ofisa o Tiute mo le siakiina o pusa oloa e auina mai i totonu o Samoa ina ia vave ona faatino siaki e le masini faaata ma saili ai po o nana mai ai ni oloa o auupega po o fualaau faasaina solitulafono, aua o le taimi nei o lo o faatinoina lenei galuega e siaki ma suesue e le afaigaluega i aso uma.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ma e le gata ina umi le taimi e faatino ai, ae tele le avanoa e misi ma le maua ai e le afaigaluega ni oloa o auupega po o fualaau faasaina e nana mai i totonu o pusa oloa, aua ua popoto tagata faatupu faalavelave e solitulafono e faatino nei faiga. O le tatalo, ia vave ona taunuu mai lenei masini i se taimi o le tausaga nei.

Ia Oketopa 2019, na sainia ai le Konekarate ma le Kamupani IT mai Serbia, Data Technology International, e fausia ai le polokalame ua taua nei o le TIMS, itagia ia o le mea lea. Tax Invoice Monitoring System...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

SUI FOFOGA FETALAI: Ia, ua e tago loa i le upu lena, maua ai foi ma le malologa, ae tulai mai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ou te vaai atu ua tau sela le Minisita, ua asamo ua tataua ona tulai atu se isi o matou se i koma. Ae e i ai le itu lea ou te manatu e tataua ona faataua. O le paoa lea o le Ofisa o Tiute i lalo o le Tulafono, lea na faaoga e lo tatou Malo, ina ia amata ai loa ona avatu le faamamaavega, i lo tatou atunuu ua fail le leadership e le gata o Ekalesia, ae faapea foi totonu o nuu e faamamaavega. O lea la na faapau ifo ai tau o pusaapa i le 48 sa \$100 i le taimi lena i le pusa eleni.

Tuu mai i lalo i le 24, tuu mai i lalo i le 12, lea ua i ai pusaapa e tai 6, sao, lea la ua i ai pusaapa tai 6, ia ma tuu i lalo ma pisupo.

O le malosi la lea faaletulafono, o lea la sa faaaoga. O le taua o mea ia lau Afioga i le Fofoga Fetalai, lea faatoa auiliili mai, e na o le pau lava lea o vaegatupe e saili ai seleni e fai ai le Malo lenei, lafoga ma tiute. Lafoga ma tiute, pau lava lea. O lea e faalagolago i ai lo tatou Malo. Ae o le taua o le mea lea, lea na toeitiiti tau ai le atunuu i le 1981. Ua savavali ai ua tetee le aufaigaluega a le Malo, ua leva e le toe siia o latou totogi. Ae o le fofu na fai i le taimi lenei, o le fofu na fai, o le Samoa e fia ai loa sosolo mai loa i le manava, sau i tulivae, o le fofu lenei.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Ae o le a faamalosi le auupega lea, ia sosolo mai i manava o tagata fia aai ma tatalo mai i le Malo, ma o le iuga lenei, foi e fai la outou galuega. E le ioeina e le Malo faapea e sii totogi. Ae mafua i se a? Mafua i le faaletonu e musu le Malo i lenei taimi e tuu i luga lafoga. E na o le pau lava le mea e faatupe ai, ia gaioiga a le Malo ae ua fefe le Malo ona ua lata mai Faiga Palota.

Na iu ai ina laa le Malo i le isi faiga, Malo lea e i tua atu o le HRPP, faatetea uma lava le aufaigaluega o e sa savavali e afe ma afe tagata sa faatetea. Ia lea na ave ai loa le mataupu i le Faamasinoga, sau loa ma le iuga i le Faamasinoga, illegal, unconstitutional. E le talafeagai ma le Faavae le mea ua fai, toe fafoi tagata e faigaluega. Ona faatu ai loa lea o le Komiti e toe vaai i lafoga e tuu loa i luga lafoga e sue mai ai le tupe e totogi ai tagata nei. E ala ona taua le mea lea, leaga o le mea lea na ala ai ona sao mai le HRPP i totonu. Ua fiu tagata. Na pau lava la le mea, vaai loa po o le a le fofu o le a fofu ai le gasegase lea ua faafeagai ma le atunuu. o le itu la lea taua mo le mea lea o Faigamalo, pau lava lea o le mea e toomaga i ai le Malo, lafoga, lafoga. O se isi la tagata e sau faapea mai, tipi lafoga, ua lote afi, lote afi. Leaga o i tonu lea e faalagolago i ai le ola o le Malo, le ola o Matagaluega eseese ma le ola o le atunuu la e faatali mai tua. Faatali mai i le a? Faatali mai i fesoasoani e tataua ona avatu e le Malo.

E 7 tausaga na sosoo ai, ae toe tupu loa isi faalavelave. Aisea? Ua liliu atu le Malo, le HRPP lea e toe tilotilo e fetuunai, o le VAGST, lafoga. O le taua o le mea lea, na pau ai le isi vaega faaupufai i Ausetalia, le talia. O le latou mau na ave, e omai loa i totonu o le Malo faatu loa, fai loa le VAGST. O mea ia e faalagolago i ai Malo, o le lafoga. Ma o lafoga, e leai se atunuu e faalavelave, leaga o le mea lea e ola ai le Malo, e le

faalavelave. E leai foi se faalapotopotoga e usu ni latou fonon e faatautee i lafoga. A faatautee o lea e faalagolago i ai le Malo? Lau Afioga i le Fofoga Fetalai, lea la na fai ai i le tausaga e 1987 e le Malo Soofaatasi le VAGST. 1987 o se Tulafono lelei tele. 1988 toe tulai mai le HRPP, manatu loa le HRPP, o le a faalatele atu loa le Tulafono lea o le VAGST, ua le na o faletalimalo, ae o le a faasosolo loa i isi oloa ma tautua. O lea la na aumai ai loa le Tulafono e toe teuteu, o le a faasosolo atu loa le lafoga lea o le VAGST ina ia aofia ai le lautele o oloa. Muamua atu i le isi faigamalo, sa na o faletalimalo. O lea la o le a faalatele atu loa i oloa ma tautua.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Na aumai le Tulafono lena iinei i le 1993. E i ai le mea na tupu, o lea ua aumai le Tulafono mo lafoga ae oso loa ma le masina o Setema i le 1993, oso loa ma le lega. Faaaoga loa e le Itu Agai le lega, ua afaina le lega e tua i ai le atunuu, toe oso mai ma le VAGST lea ua pasi. Lea la na oso ai loa savali tetee nei. E 2 savali tetee. Muamua, o le savali tetee a le Ekalesia Katoliko, na ala ona fai le savali tetee lena sa laei papae, o le taumafaiga a le Taitai o le Ekalesia Katoliko e seu ese le tulaga mai le ono aafia o le atunuu i ni uiga paaa e ono tau ai le atunuu. Lea sa faaigoa ai e le Taitai o le Ekalesia Katoliko, o le savali o le filemu. Ma e na logo atu foi le Taitai o le Malo, aua e te popole, o le savali lea e tau taofiofi ai ni faalavelave e tutupu mai. E uma le savali tetee lea, ae sau loa ma le savali tetee, ua alu savali i aiga, aiga o Samoa, Tumua ma Puleono i Salafai, ua alu savali i ai e omai. O le matua matautia, o le treason le mea lena, o le foumalo. O le foumalo. Lea la ua omai ua taenai uma mai e le Itu Agai le savali tetee tele lea, a o ai ia e saofafai i totonu o le Palemene? Aiga, faapea foi ma Tumua ma Puleono i Salafai i lalo o le Faavae, o sui ia o Aiga ma Tumua ma Puleono i Salafai, a o lea ua o le Itu Agai usui Aiga ma Tumua ma Puleono e omai e tetee mai. O le treason le mea lea, o le foumalo. Peitai ane, o nei mea uma, sa olo pea le fua e le Taitai o le Malo ma matou.

Ina ua tupu le savali lea a Tumua ma Puleono i le 1994, na alu atu ai le savali tetee tele lava, faatu mea o fale ie i luma o le fale o le Malo ma fai ai faiga siva ma upu maoae, upu maoae e faalumaina ai le Malo. Na matou fonon i luga, valaau le faafaletui e le matou Taitai, se i aumai so outou finagalo, ua agai nei manatu, valaau loa tatou itumalo se i omai loa e tali le mea lea. O le taua le mea. Ua alu alu lauga, ia alu atu loa ma isi lauga, lau Afioga i le Tootooalii, tatou onosai, ua tofotofoina le Malo. E fai loa le mea lea, tau loa ma le atunuu. Aua a omai itumalo, o faipule o lo o tu ai le Malo, e le omai na o lima, e omai ma auupega. Ona faapea loa lea o le

taofi, tatou tuu i le Atua, fai e le Atua le iuga, ma aumai loa ma upu ia o le Tusi Paia, afai tatou te au ma le Atua, o ai se faasagatau mai. E fai upu nei, a o fafo, na o upu leaga, upu leaga pese nei, lauga ai ma le Taitai o le Itu Agai ma faasino i fale, o ai na te aia nei fale, o ai na te aia nei vaalele? O upu na lea sa ou faalogo i ai i nai masina talu ai ua toe sau.

Lau Afioga i le Fofoga Fetalai, o le iuga lena, tausii le filemu. Matou te taape mai, a ua laki matou te le iloa e i ai le nuu o le isi faipule, e ono lelei pasi, ua tumu i le aumaga ma le auupega. A na sao mai pasi na, e otiga tagata le tatou atunuu lea e tetee. Lau Afioga i le Fofoga Fetalai, o le vave o le gaioiga a leoleo na taofi ai.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Lau Afioga i le Fofoga Fetalai, e taua tele le mataupu lena. A oo loa ina pasia e le Palemene lenei ana Tulafono i atunuu uma o le lalolagi, e leai lava se leo e laga. Aisea? E malamalama uma, o i i lafoga, o le ola lea o le atunuu. O i i lafoga e mafai ai ona faatino galuega lelei mo faleaoga, falemai, mea o lo o manao i ai le atunuu. O le mea lena e tofotofa se tagata ae n ate lotea le mea lea, aemaise o le o faasooso mai o tatou tagata. E tupu loa le faalavelave, o ai e agai i ai, o ai e agai i ai?

Lau Afioga i le Fofoga Fetalai, ua ou manatu e toe agai i i leaga o i ina na amata mai ai loa solo tetee. Solo tetee i le 1994, solotetee i le 1995, 1996, 1997, 1998. E 5 tausaga o fai lava nei solo tetee. Na pau lava le mea o le olo o le fua ma tuu i le Atua. O le a le iuga? E le i iu lelei e sa faufau. O le upu taua mo tatou uma, o le tagata na te lotea le mea lea, ua tago i afi. Lau Afioga i le Fofoga Fetalai, ua tago i afi. O le usui o ni tagata e tetee i ni Tulafono ua fai e le... ua pasia e sui usufono mamalu o le Palemene. Sui o ai? Aiga ma latou Tama faapea Tumua ma Puleono i Salafai. O le atunuu lea ua i inei. A o le o nisi usui le tetee, a omai ua tuu i lalo lafoga, ua tago i afi.

Lau Afioga i le Fofoga Fetalai, o le taua lena o le saunoaga lea, toe faamanatu mai ia i tatou, a tatou agai i luma, tepa i tua po o fea le mea e agai i ai le atunuu lenei, leaga o mea na tutupu, e ono toe tutupu foi, ma e tataua ona vave laa i ai le Malo ia taofia ni faalavelave e tutupu mai.

Lau Afioga i le Fofoga Fetalai, ia, ua lava lea fesoasoani atu, ua maua le malologa. Ia toe faaauau.

SUI FOFOGA FETALAI: Ua faamalo saunoa i lau Afioga i le Palemia o le Taitai o le Malo, a o le Taitai foi o le Maota. Malie le sui usufono o lea o le a agai le Maota e fai le faafetai i le saunoaga matagofie a o faafofoga le atunuu. E i ai se mataupu taua e fia saunoa ai le sui usufono mamalu?

Afioga Salausa John Ah Ching: Sa lavea i lau lauga le mataupu lea ua oo i ai le Afioga i le Minisita ona o manaoga o le itumalo. Faafetai mo le avanoa.

SUI FOFOGA FETALAI: E fai lava e oe lou avanoa. O lea lava ou te tau mafaufau, leaga o le tatou Tulafono Tumau e aumai le talosaga, mafaufau le Fofoga Fetalai pe talafeagai i tulaga aloaia ona faatoa toe tu lea e amata.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga Salausa John Ah Ching: Ia, e talosaga atu i lau Afioga.

SUI FOFOGA FETALAI: A o lea o le a fai lava lau pule, alo i ou faiva ia manuia. E ese le faigata o le mea o le avafatafata, o le tu ma le aganuu.

Afioga Salausa John Ah Ching: Faafetai tele le faaaloalo i lau Afioga. Faafetai foi se i fai se malologa a le Afioga i le Minisita. Ae sa ou faalogologo lava ma le totoa i le faalauina o tupe maua ma e o le taimi atoa, sa alu lou mafaufau i lau lauga i manaoga o lou itumalo i auala. Ma o lenei foi itumalo pei lava ona ou taua, pau lava lea o manaoga o le itumalo lenei o Faleata Nu.1, na o auala, auala. O auala galue faavaifale, e tau leai ni auala galue e o i ni faatoaga, a o auala galue faavaifale e omai ai e faigaluega i Apia nei. Ma o i la i le tupe maua lea, e faamoemoe i ai le faiga o auala nei. Aua pau lava le tupe lea e alu i auala ia e fai le main road e alu e tau i o i Faleolo, o le tupe lea e aumai le World Bank. A o auala galue e o i faatoaga, auala galue o Faleata Nu.1 faavaifale, e sau mai i i le tupe lea. O le mea la lea, o le agaga faafetai lena ia te au i lou faalogologo atu e siisii pea i luga tupe maua, aua o i i lafoga ma tupe maua e faamoemoe i ai le atinae o itumalo ma manaoga o le itumalo. Ia pau lea faafetai mo le avanoa.

SUI FOFOGA FETALAI: Faafetai i le sui usufono mai Faleata Nu.1. E saolele lava le saunoaga, leaga o lea ou te manatua sa tatou i ai i le tatalaga o lou auala i le agai mai Lepea e agai i tai i Vaitoloa, sa e taua o le auala galue. Ia, e sao lelei lava, pei e faapena le nonofo ai, e le o vaifale, a o le agai mai i totonu i le felatai o mea e afifio ai le mamalu o lou itumalo. Ae faafetai.

Afioga Salausa John Ah Ching: Se faamolemole lau Afioga, o auala galue ia faavaifale pei ona ou taua i lau lauga, o le itumalo lenei o Faleata Nu.1 o lo o alaala ai le mamalu o le Palemene, e alaala ai le mamalu o

CEOs, e alaala ai le afaigaluega a le Malo ma afaigaluega uma lava i totonu o Apia nei. O le workforce lea e i ai i i. O galuega faavaifale la ia, o matou auala galue la na e omai ai e faigaluega. O le mea lena e taua ai tupe maua ia. E pau lava le mea lea e faatalitali ai le Afioga ai le Minisita o Tupe, o le vaevaeina o le pai, po o le vaevaeina o le paketi o le atinae, ina ia fuafua i le toatele o le itumalo. E pau lea faafetai lava mo le avanoa.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

SUI FOFOGA FETALAI: O lea ua manino auofala, ona o lea e soisoi le Maota po o a le uiga o le saunoaga a lau Afioga i le sui usufono mamalu, ae faafetai. O le a tuu atu le avanoa i lau Afioga i le sui usufono o Palauli le Falefa.

Afioga Hon Faumuina Tiatia Faaolatane Liuga: Faafetai i lau Afioga i le Fofoga Fetalai, e leai o lea ua manino lava ma malamalama lelei le saunoaga a le Palemia i tatou tupe maua i lafoga a lo tatou atunuu. O tatou paaga i fafo, o tupe foi ia e aumai e fesoasoani i a tatou polokalama o atinae o tupe o latou foi lafoga o la e fai. O lea la e vaavaai mai i mea ia tatou te faia, po o tatou faia pe leai. E leaga o tupe foi nei e aumai i le World Bank ADB ma isi a tatou paaga, o tupe o lafoga o la e totogi e o latou tagata a nuu. E aumai la i luga o tuutuuga e fua i a tatou foi faiga faavae e saili tupe e atiae ai Samoa. E ala ona ou malamalama i le vaega lea lau Afioga i le Fofoga Fetalai, leaga o au ua leva ona ou faigaluega i Faalapotopotoga faava-o-Malo ou te malamalama ai i lea vaega.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai e fia maua se avanoa.

SUI FOFOGA FETALAI: Malie le sui usufono o lo o tulai mai. O se faauilavea po o se lauga...

Afioga Sulamanaia Fetaiai Tauiliili Tuivasa: O se mea e fia faamalamalama...

SUI FOFOGA FETALAI: E faapena ona tulai mai ma saunoa mai.

Afioga Sulamanaia Fetaiai Tauiliili Tuivasa: E masalo e le i faauilavea le sui usufono leni i le saunoaga matagofie a le Minisita. E tasi leni sui usufono e lagolago tele i le saunoaga a le Minisita leni ona e alofa i le Matagaluega ma le mea sa auauna ai. A o le saunoaga a le Taitai i leni po, o lea e fia malamalama lou sui usufono i le manaia o le saunoga a

le Taitai lea faatoa faamaui atu. Fai mai e 6 pasi na omai i totonu. O lea la e fia malamalama lou sui usufono, po o fea le itumalo e omai ai pasi ia, lea na omai se i tutuli ese le atunuu i inei. E pau lava lena o le faamalamalama a le sui usufono lenei.

26 FEPUARI 2021

Tulafono Tau Faaofi o le Faatatauina o Tupe Faaopoopo (Nu.1) 2020/2021 – felafolafoaiga faaauau i luga o le faitauga faalua

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, atonu ua... e oo atu leoleo ua uma ona faopasi tagata o le a o mai. Ona o atu loa lea fai feiloaiga ma toe taofi ai, ae tau ia ina ou faapea atu, o le tasi o le itumalo i le itu i sasae o Upolu, ia ua lava ia lena.

SUI FOFOGA FETALAI: E manatu ua faamalieina le sui usufono mamalu. O la lava e te silafia ae faataga fesili lava. Ia, o le a le afaina lea.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, leaga ou te manao e fia faalogologo Samoa, o fanau nei ma eleele nei o le Vaimauga e pule ai. A o le tu soo o Faleata fai mai o ona eleele. O le mea la lena o lea na ou fia manao ai, se i saunoa mai lava le Taitai, po o fea le itumalo lea e o mai ai tagata e ona le eleele lenei. Ma lou faaaloalo lava.

SUI FOFOGA FETALAI: O lea ua saunoa le Taitai o le Malo i tulaga o le fesili a le sui usufono mamalu. Ma ua faamalieina ai foi le Nofoa. O le mea la lea e leaga ai le lotea fua o Faleata.

Tofa Lealailepule Rimoni Aiafi: Lau Afioga i le Fofoga Fetalai, leai, o e sa o mai si itumalo e fia tietie pasi. O la foi na sauni matou, matou te o mai foi matou matou te tietie pasi. Faafetai lava.

SUI FOFOGA FETALAI: Faafetai. E manatu e le toe sili se matou faamatalaga, i le saunoaga matagofie, a o se malelega foi mai le Taitai o le Malo, ua logo lava i tino matagi e lelei. O lea ua faafofoga le atunuu i tulaga taua mo le soifua lautele ina ia soifua manuia le atunuu, i ona tulaga uma.

O le mea la lea, e le toe oo sa matou tala, o lea ua manino lava tulaga uma i le saunoaga a le Afioga i le Taitai o le Malo. I le agaga o le saunoaga a le Minisita o Tiute ma Tupe Maua.

Ou te tapa lau Afioga i le Minisita, e le o toe umi foi se saunoaga, ae faaauau le saunoaga.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga Hon TIALAVEA FEA LENIU TIONISIO HUNT: Faafetai i lau Afioga i le Fofoga Fetalai, masalo pe toe itula lea e totoo. Ou te faaopoopo atu i tausaga nei e 5, o tupe lava na maua mai i le VAGST e \$205 miliona i le 15/16, \$210 miliona 16/17, \$220 miliona le 17/18, \$230 miliona 18/19, \$239 miliona tupe lena e maua mai i le VAGST i lafoga tiute ma le VAGST o lafoga i le Ofisa o Tiute.

O le IT lenei Data Technology International, e fausia ai le polokalame ua taua o le TIMS, Tax Invoice Monitoring System. O le polokalame lenei, talu lava ona ou tauaveina mai i le 2016, o taimi uma matou te fonu ai ma le Chamber of Commerce o le latou faitio lava e aumai. E le o tutusa lafoga o totogi e pisinisi. E i ai pisinisi e totogi lafoga, e i ai pisinisi e le totogi lafoga. Lau Afioga i le Fofoga Fetalai, e mamao le mea na sue mai ai le polokalame lenei. E pau lenei o le polokalame e mafai ona tutusa uma ai pisinisi i le aoina mai lafoga, i le taimi e fai ai lau faatau, e okometi le sau o le aofai o le faatau i luga o le Ofisa o Lafoga. Ma na ala ai ona fai, ona o le faitioga na aumai, e le o tutusa le aoina o lafoga a pisinisi. E i ai pisinisi e le totogia lafoga. Ina ua taliaina e le Kapeneta le talosaga a le Matagaluega, ma o se polokalame e mafai ai ona mataituina ai tupe maua ma lafoga a pisinisi uma o lesitalaina i le Matagaluega. E le o se lafoga po o se tiute fou ua totogi, ae ua na o se polokalame e mafai ai ona maua e le Matagaluega. Ia faamaumauga vave, manino ma le moni i taimi lava e faatino ai le fefaatauaiga. ma faapena ai ona faatino le latou galuega. E siaki ma sutesue pepa lafoga e tuuina atu e le au faipisinisi i aso po o masina taitasi. Ma faasolo ai galuega faale-Tulafono pe a fai e maua ni eseese tele ma ogaoga. Sa faatino mai i le faaiuga o Oketopa seia oo i le faaiuga o Ianuari 2020, se faataitaiga o lenei polokalame, trials period. I se tasi o kamupani sa ofoina mai lana fesoasoani, i le Matagaluega e faaoga le latou kamupani e fai ai faataitaiga.

Ma e fia faaleo ai se faafetai faapitoa i lenei kamupani, o le CCK Samoa Limited. Mo lana vaai mamao, lana fesoasoani taua, aemaise le talitonuina o le fuafuaga mamao a le Matagaluega mo lenei polokalame. E le gata ina fesoasoani e faalaugatasia ma tutusa lafoga totogi e tagata faipisinisi uma. Ia Fepuari i le 2020, na pasia ai loa le Tulafono mo le faafoega o lafoga, metotia faaeletoroni 2020, ma tatala aloaia ai loa le TIMS i le aso 4 Mati 2020 ma tapena ai le fausia o ni auala, ma faamatalaga tau lafoga i luga o le Tulafono Faatonutonu.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ua amata nei ona faagasolo le lesitalaina o vaega e 5, ua vaevaeina i ai tagata faipisinisi, lesitala mo lafoga. O faavasegaina e auauai le faagasologa o lenei polokame, ona o le naunautaiga ia faaaogaina uma e tagata fai pisinisi. O lenei polokalame e tusa ma aiaiga o le Tulafono. Sa faatino i totonu o masina mulimuli o lenei tausaga faaletupe aoaoga ma semina, mo i latou ua atofaina mo le vaega muamua aua le amataina o le TIMS i le aso muamua o Iulai 2020. Ae peitai, ona o le toatele sa talanoa mai mo se isi taimi faaopoopo mo tapenaga, ona ua leaga le tele o pisinisi ona o le aafiaga o le Koviti-19. O lea na toe suia ai loa taimi amata, o vaega taitasi ma tuuina loa i le aso 1 Ianuari 2021, e amata aloaia ai le polokalame. O le taimi lenei ua amata.

I totonu o le 6 masina mulimuli o lenei tausaga faaletupe, sa faaaoga lea taimi e faatino ai aoaoga, a le afaigaluega aua le suesuega i nisi o faalavelave, o le a faapena ona iloa ma aliali mai. Sa mafai ona tuuina atu se teuteuga i le tau o tiute mo taavale alu i le eletise, ina ia tuusaunoa mai tiute ma lafoga mo tausaga e 2. O le taimi la lenei, o lea ua toe aveese le 5% sa i ai, a o lea ua duty free uma ia electric cars. Ina ia tuusaunoa tiute ma lafoga mo tausaga e 2, ina ia uunaia pisinisi ma le mamalu o le atunuu, e auina mai i le atunuu ituaiga taavale nei. Ina ia faaitiitia ai le aafia o le siosiomaga. I le faaaogaina pea o le taavale afi e faaaoga ai le suauu ma penisini.

O le masina o Fepuari o le tausaga 2020, na taulimaina ai e le Matagaluega mea faigaluega, e tauala mai i se fesoasoani a le Ofisa o le Tiute i Niu Sila. O nei mea faigaluega e taua tele mo le mataituina o fualaau ma oloa faasaina, e ono faaulufale mai i Samoa. Na sainia e le Matagaluega faatasi ai ma le Matagaluega o Leoleo se feagaiga ma le Pacific Canine Unit, e tusa ai ma le atinaeina o tatou taifau sosogi. E faapea ai foi ma le tomai o le afaigaluega o lo o tauaveina nei galuega. O lo o i ai foi fuafuaga i nei maliega, e faaopoopo ai mea faigaluega o taifau sosogi mo galuega faatino. E pau lava le taimi o le tuai mai, ona e manaomia i le taimi lenei, ia taifau na manaomia i le tausaga ua tea, a o nei ua 2021. I le saina ai o Samoa i feagaiga Revise Kyoto Convention, ma le Tracey Casing Agreement. O se tasi o atinae ma amatalia i le masina o Ianuari 2020 le polokalame ua faaigoaina o le Authorize Economic Operators. O lenei polokalame o se vaega taua lea, e amanaia ai kamupani ma pisinisi, e maualuga le tulaga ausia o le usitaia o Tulafono ma faiga faavae a le Matagaluega.

26 FEPUARI 2021

Lafo mo le Faaauauina ma le Suia o Itula o Fonotaga

Ua 5 kamupani tetele ua maea ona faaofi i lenei polokalame, ma ua faasolo nei i nisi o kamupani tetele, ua faapena lava ona amanaia pisinisi uma i Samoa. Mo galuega o le tomatauina ma le atinaeina o le tomai o le afaigaluega. E toa-tolu ni alii ma tamaitai ofisa sa faauuina i se polokalame a le Ofisa o Tiute o Niu Sila, ma ua avea nei ma faiaoga mo aoga amata a le Ofisa o Tiute a le Matagaluega.

SUI FOFOGA FETALAI: Ua ou faalavefau a o folaulau le sa tele, i lau Afioga i le Minisita o Tiute ma Tupe Maua. Malo le saunoa, leaga o lea ua tatou taunuu i le tatou taimi e manava ai galuega a le Palemene i lenei afiafi. Ae tatou te le i malolo, ou te tapa lau Afioga i le Taitai o le Maota mo se lafo, aua Tulafono o le tatou galuega.

LAFO MO LE FAAAUAUINA MA LE SUIA O ITULA O FONOTAGA

Susuga Hon TUILAEPA AUUEA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ona o le naunau lava e vave faamaea le tali atu a le Minisita o le Kapeneta ma le faamoemoe e maea le tatou galuega i le Aso Lua o le vaiaso a sau. E faatu ai le lafo mo le suia o itula fono e faapea, *Ia tauaofia le Palemene i le aso a taeao, Aso Toonai 27 Fepuari i le itula e 2:00 i le aoauli, seia aulia le itula e 7:00 i le po.*

O le vaega e lua o le lafo, o le a toe faafoi Itula Fono o le Fono Aoa pe a aulia le Aso Gafua, 01 Mati 2021 e pei ona i ai le lafo sa muai faamaonia e le Maota i le amataga o le vaiaso lenei.

Ma le lafo lona tolu, faaauau le lauga a le Minisita, o lea ou te vaai atu toe tasi lana pepa mo le isi 3 minute e faamaea ai, ona tatou malolo ai lea i lenei afiafi.

O le lafo lea mo le faamaoniga a le Maota.

Faaluaina e le Minisita o Tina ma Tamaitai Atinae o Nuu ma Afioga ma Agafesootai ma le Minisita mo Pisinisi, Alamanuia ma Leipa.

Na faamaonia le lafo.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Na toe faaauau felafolafoaiga ma Tali a le Malo i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

SUI FOFOGA FETALAI: Ia faamaea mai loa le saunoaga lau Afioga i le Minisita, aua le

Afioga Hon TIALAVEA FEA LENIU TIONISIO HUNT: Ia faafetai atu mo le lafo lau mo le 30 minute lau Afioga, faafetai le faaaloalo.

Mo galuega a le Komiti Faafoe e pulea le ava malosi, e le o toe po se silafia i le faatupulaia o aafiaga atoa ai ma faasea a le mamalu o le atunuu i nisi mea tau ava malosi o lo o gaosia i Samoa. O le ala lea o nisi suiga na talanoaina ma pasiaina i le Komiti Faafoe e tali atu ai e pei ona i ai le suiga tele o le fagumalosi o ituaiga e 750 mls e agai i luma. E i ai ma le suia lea o fagu plastic o lo o faaogaina i le taimi lenei le fagu mataetae.

O nei suiga e faamoemoe e amata faamamaluina i le masina o Iulai 2021. Sa faatinoina foi suesuega ma asiasiga a le Komiti Faafoe i falegaosi ava malosi aemaise le Ofisa o Soifua Maloloina. Ia faamautinoa le saogalemu atoa ai ma le sao atoatoa, le faagasologa o le gaosia o lenei ava malosi aua le fofoga taumafa o le atunuu.

O le Tausaga Faaletupe o Iulai ia Tesema 2020, 6 masina ma le Tausaga Faaletupe ua faaititia le \$475.4 miliona tupe maua ua fuafuaina e aoina ma e maualalo atu i nai lo tupe maua fuafua mo le tausaga ua tea. Ma e le taumate pe toe faamatalaina ni mafuaaga ua tuu ai i lalo nei fuafuaga mamao o le aafiaga o le Koviti-19. Mai i le masina o Iulai 2020 seia maea le Aso 30 o Tesema 2020, ua mafai ona aoina e le Matagaluega ni tupe maua e \$258.2 miliona \$37 miliona ua surplus i le 6 masina. O le tatalo ia tumau pea le galulue punouai ma le finafinai o Pulega ma le aufaigaluega e aoina le 46% tupe maua o lo o faapea ona fuafua e aoina i le afa mulimuli o lenei tausaga faaletupe.

Ia o le tele lava o isi mea ia e i i o le a taatia, ae talitonu lau Afioga...

SUI FOFOGA FETALAI: Ia silasila loa i le pepa mulimuli ma faamaea mai ai.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, ia ou te iloaina o le a taumafai e faamatala le aoina o lafoga ma tiute o pisinisi e aoina e le Matagaluega, aitalafu tuua lau Afioga. Le 2015/2015 \$11.2 miliona sa aoina, e \$21 miliona le RS Customs e \$20 miliona le... e \$32 miliona le tupe na ao i aitalafu. 2016/2017, e \$31.3 miliona na ao. 2017/2018, \$33.7 miliona, 2018/2019, \$38.2 miliona, 2019/2020, \$35.4 miliona. O le aofaiga atoa \$174.3 miliona na aoina.

E le natia aitalafu tuua o lafoga ma tiute o lo o i totonu o faamaumauga a le Matagaluega ma o lo o faapena ona aoina mai i totonu o lea tausaga ma lea tausaga faaletupe, faatasi ma lafoga ma tiute e tatau ona totogi mo piliota taitasi.

Afioga Sulamanaia Fetaiai Tauiliili Tuivasa (Vaimauga Sasae): Lau Afioga i le Fofoga Fetalai, fia maua se avanoa ona e

SUI FOFOGA FETALAI: Toe lava o se aga, malie le sui usufono mamalu toe lava o se ana o lea ua...

Afioga Sulamanaia Fetaiai Tauiliili Tuivasa: O le fesoasoani lea e tulai atu ai le sui usufono.

SUI FOFOGA FETALAI: Toe lava o le faaiuga.

Afioga Sulamanaia Fetaiai Tauiliili Tuivasa: Ioe pe o le agaga lea ou te tulai atu ai. O i ai nisi pepa o totoe a le Afioga i le Minisita, ae tufa mai e alu le tagata ia i le fale e faitau ai, ona o tatou toe omai lea taeao. Aua o lea e vaai atu e le i taitai lava le tapenaga. E pei o le agaga lena o lea na ou tulai atu ai lau Afioga i le Fofoga Fetalai.

SUI FOFOGA FETALAI: Ia, manaia foi le fautuaga, ae faamaea mai loa aua...

Afioga Hon TIALAVEA FEA LENIU TIONISIO HUNT: E na o le atili ai lou fia faaumaina o pepa ia...

SUI FOFOGA FETALAI: Ia, o oe o le toaina matua ia, sau loa.

26 FEPUARI 2021

**Tulafono Tau Faaofi o le Faatatauina o Tupe Faaopopo (Nu.1)
2020/2021 – felafolafoaiga faaauau i luga o le faitauga faalua**

Afioga Hon TIALAVEA FEA LENIU TIONISIO HUNT: O le aofaiga o le tupe na aoina i le 5 tausaga e le Matagaluega o Lafoga ma Tupe Maua, e \$2 piliona 97.1 miliona tupe lea na aoina e le Matagaluega i le 5 tausaga ua tuanai.

Ia lau Afioga, e tatau ona tuu mai se avanoa ia te au, leaga e faigata le tulaga lea ou te i ai, ona ua sui le itumalo ou te taumafai ai i le isi paeaiga o lo o...

SUI FOFOGA FETALAI: Ia, saunoa lau Afioga, e taua lou finagalo.

Afioga Hon TIALAVEA FEA LENIU TIONISIO HUNT: Ae ou te le i suatia tia o le vavau, o lea ua ou lauga faatumua. Pe ou te paia papa o le faatolotologatama, e tauilo ai Malo. Ae e muamua ona ou faapoipoililia faaalofisa o Tupu nai le malae o le vavau, aua lau faafofogaaga lou itumalo peleina Anoamaa Nu.1. Aua o lea ua motu nei le suiga ula o le papa, a ua atue ai nei le tautai o le vasa.

E avea ia lenei avanoa faaauo ou te faafeiloai ai i lou itumalo o Anoamaa i le amata atu i Lufilufi seia paia lo outou Toaono, ma le Saofaiga Tupai ma le Afio o Seutaatia, ma le mamalu ia te oe le Tumua. O ou paia na Lufilufi mai i le amataga e oo i le faavavau. O le tatou galuega, toe faaauau le tatou galuega e talosagaina o tatou auala galue.

Si ou nuu o Manunu. Afio mai Tapunuu o Leafa ma Maugatai, Afio foi Fale o Salevalasi, Ili ma Togafau ma Tupuola, Susu mai oulua o Matua o Tai ma Fonotia, Susu mai oulua Tala o le Fale Logonai ma Aumua, susu mai Faifaimea o le tagata o le Tuiatua, Susu mai Lufilufi ma le saofaiga. Ia o lena e mautinoa o le a taumafai se tatou auala ae le i faia le faiga palota.

Si ou nuu o Lalomauga, Afio mai Aiga, Afoa ma le matua o Lefao, maliu mai oulua o Ti ma Tagata, Susu mai lo outou Toaono ma le Vainalepa, Susu mai Lufilufi ma le Saofaiga, o lo o faaletonu lo tatou auala, aemaise foi se auala laupapa i le vai. Atonu a tulai mai se isi Nofoaiga, o le a faapea ona faauau.

Saleapaga. Afio mai Lealaisalanoa o le Tei o Tupua, le Tama a Maliliefā, Afio mai le Falefa o ou alo ma Usoalii, Maliu mai le Matua o Iuli ma le Gautaala. Maliu Fuaava o le Laufaaua, ma le tupe na tanoaese ma le mamalu ia oe le Gautaala. Sagapolu. Afio mai Leutele o le Tina o Tupua, Afio mai le Taauso ma le Atuga o le tamaitai, Afio mai Aloalii, Maliu mai le Matua o Moeonoono, Maliu mai Alo ma le Aiga Sa Alo, Sa Fepulupuluainiu ma le nofoaga o alii.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

E talitonu o le tatou vai lea e tuaoi ai Falefa ma Faleapuna, ua manaomia se talivai ona ua satia lo tatou nuu i le vai lea e i tua atu o Falefa aemaise foi o tuamaota mai o Faleapuna.

Gagaemalae. Afio mai Alaiasa na fitaituga na saili lou Faleatua i lou aao malosi, Afio mai Sanaeseese, Maliu mai lou nuu ma Leusoalii, Sanonu, Afio mai Suluvave o le Alo o Tuiavii, maliu mai le Matua Leuta ma le Aiga Sa Leuta, Pule na faafeagai, i le la itu o le vai, ma lenei itu o le vai. Maliu mai Fulumua o aitu tagata o Fonoti.

Falevao. Ia Afio mai Gaeolo ma le Suafa Neiote, Susu mai Ae o le Alo o Malietoa, maliu mai le Falelima o le Siitaga o Fita, ma tagata o le Tuiatua le aai o Fonoti. E tele galuega o lo o feagai ma lo tatou nuu, aemaise lo tatou talivai i tua o le faleaoga, ia ma se fanua e fai ai so tatou malae taaalo. Ua uma le malae taaalo i i le Aoga i Falefa ona fai ma faaleleia. Ia a faapea e manuia le taumafaiga, ia o auala na e fai i le tatou malae taaalo, ia ma ua uma ona asia atu le vai i tua o le faleaoga.

Ia si ou nuu i Faleapuna. Gafa ma le Aloasina ma Suafa, Fetalaiga Too o le Fua Molioo ma le Aiga Sa Molioo, o oe o le Ailaoa, ia aemaise Malepeai o le aitu o le nuu. E avea lenei avanoa e faaleo atu ai se lagona faatauavaa, o au o Tialavea Tionisio Hunt, o le sui palota mo le palota o lumanai nei.

Le paia e o le itumalo, ua laga se leo, i le ava ma le faaaloalo e tatalo atu ai i le paia o lo tatou itumalo, i se tofa saili ma le utaga loloto. Ua ou fia galue, ua ou fia tautua mo se manuia o le itumalo, aemaise o ona tupulaga lalovaoa. Ua maea lau galuega tautua i le Vaa o Fonoti, ua maea galuega uma lava a le Vaa o Fonoti, i aiga o le itumalo, Ekalesia ua maea mea uma. O lea la ua ou manatu ai, se i ou tautua foi i si o tatou itumalo, o le Anoamaa Nu.1. Le paia e o le itumalo, ou te le folafola atu ni au galuega lou itumalo, o le a outou silasila i ai pe afai, o le a se tefa le tauala, i le faautautaga mamao ma le tofa saili, o le a outou talia ai le tagi atu a le pumate, o le a se mafai o le a sou iloa, ma sou malosi o i ai, o le a faatino ai lau tautua i lou itumalo. Fesoasoani mai le agaga o le Atua i lau filifiliga o le faiga palota.

Ona faaii lea o lau folasaga i lau faafetai i le Pule Sili o le Matagaluega o Tiute, ia ae muamua atu i le Afioga i le Minisita Lagolago Lenatai Tamapua. Malo le tautua, malo le onosai, malo mo fautuaga i le ta feagai ai i le ta nofoaiga.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

E talitonu e leai se lape o lau Afioga ia te au. E oo foi o le a lava le taimi e valaau atu ai, e te tu ma e savali mai. Amuia foi au ua ou maua se

Minisita Lagolago o lo o lagolago malosi ia te au i le galuega. Faamanuia le Atua i le taumafaiga o le paeaiga, le iloa pe oo atu i le isi 5 tausaga ua e tutu i i.

Lau Afioga i le Tamaitai Pule Matafeo Avalisa Iuli, faamalo le galue, faamalo tautua, faamalo faaeaea ia te au ma le Minisita Lagolago. O a outou galuega, o au galuega sa e tu ai ma e galue punouai, e le mo au ma le Minisita Lagolago, ae mo le manuia lautele o le atunuu. Sa e faatino ou tiute ma le fautuaga e le fefe i se mea e fai atu ai e te fautua mai. Fonoti Tupu aemaise foi Ieni, o Pule Lagolago, Komesina Lagolago o le Matagaluega, malo le tautua, malo le lagolago i le tamaitai pule. Le afaigaluega, ma le paia o le afaigaluega, malo le galulue i lenei 5 tausaga, aemaise lava lau uo le leoleopo. E ta le 7:00 ua ou oo i le Ofisa, ma ma talatalanoa. Ia, faamalo le galue, amata mai i le Pule seia oo i le leoleopo, sa outou amanaia maua ma le Minisita Lagolago, le tou pule lea. Faamanuia le Atua le gasologa i le agai i luma.

Ia, talitonu lau Afioga i le Minisita Lagolago, oi lau Afioga i le Fofoga Fetalai, ia faafetai foi i mamalu o faafeagaiga taulagi e fia o le tatou itumalo o faafogafoga mai, aemaise ia faafeagaiga o le itumalo o Anoamaa. Alofagia e le Atua ia le tou auaunaga, faafetai foi tatalo mo maua ma le uso ia Alaiasa i lenei Nofoaiga ua faamaeaina nei. Faamanuia le Atua i le tatou Fonotaga i lenei afiafi. Soifua.

Na faaalua le agaga fiafia o le Palemene i le patipati o latou aao i le maea ai o le saunoaga talifuaitau a le Minisita mo Tupe Maua ma Tiute, Leoleo, Falepuipui ma le Toefuataina.

SUI FOFOGA FETALAI: Saunoaga a lau Afioga i le Minisita, na e saunoa ai e le faigofie lenei afiafi i lau Afioga. E i ai foi le talitonuga a le Nofoa ma le Maota lenei, e le faigofie foi i la matou matau. E afua i se a? A lea ua agiga i le ea, sa e saili i le ao, sa e saili i le po. E te le moe e te le moe lava. Sa e tu i le foe, aua se manuia o le Faigamalo ma le atunuu o lo o tapuai mai. O lea ua faaafogoga le Maota, aemaise o le tapuaiga matamata nonofo le atunuu, i ona itu e fia. Ua faafogoga i tiute ma faiva sa fitaituga i ai lau Afioga.

26 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O lea ua talatalapipi, afua mai lava i le 2016 seia oo mai lava i le tausaga nei. O lea le lagona, malo tautua, malo tautua malo, malo le loto atunuu. Aua o la outou Matagaluega, o lea lava e saunoa le Taitai o le Malo, e tua atu i ai. Matou te le selu atu, aua o lele ua manava le toa alii ua sao foi le

fau, i le saunoaga manino a lau Afioga. Ia, o lea lava ua sasaa faaoti le utu a le faimea, ua talatala tulaga uma. E tau ia ina matou faapea atu, malo le fai o le faiva, ua se togi la outou seu na lagatila, ua outou faapulou le tualima. O lea ua ave au faamanuiaga aua foi le Ofisa sili o Pulega o le Matagaluega, i la outou auaunaga le faatumutumulima, mo se manuia o tatou tagatanuu.

Ia faamanuia le Atua i le alofaiva i filifiliga aua lena faiga palota o lumanai. E na o le Atua na te aumaia faaiuga o mea uma. Ia i ai le agalelei o le Atua.

Ia le paia e o le Maota, malo usufono i lenei afiafi, malo le faatoatoa, tamaoiga o le tofa ma le faautauta na sasaa i le aso. O lea ua, manino uma auofala, i mea o lo o faanenefu. Ou te talitonu, ua atoa lio ua atoa lanu o le nuanua i la outou faafofoga.

Le paia e o Samoa ma la outou tapuaiga, matou afe atu, ma faapea atu, faafetai tele. O lea ua ae manuia faiva o le Fonotaga a lau Palemene ona o la outou tatalo le leoa. Faafetai tele, faamanuia le Atua i la outou tapuaiga.

Ia, Ofisa sili o Pulega o Matagaluega, aemaise lava i Matagaluega lea sa tu lauga i lenei aso. Matou te le fai atua se tala, e na o le Atua e le nenefu lana silasila. Ia i ai faamanuiaga a le Atua i taitai o Matagaluega, aemaise le loaloa o lo o tautua lima ma vae i ai le Faigamalo. Malo faafetai le onosai mai, ua matatamalii ai le tatou Fonotaga i lenei afiafi.

O lea ua tatou taunuu mai i le vaega tonu lava e faamaea ai le tatou galuega. Ae le i tolopoina galuega o lenei afiafi. Ou te talosaga atu ma le agaga faaaloalo i le sui usufono mamalu o Aleipata Itupa i Lalo, lau Afioga i le Tuiatua Faanofonofu, e te saunia se tatalo e faamaea ai tatou galuega i lenei afiafi. Ma le faaaloalo lava.

Na tolopo Taulumaga a le Fono Aoaofa Faitulafono i le itula e 10:24 i le po seia aulia le Aso Toonai, 27 Fepuari 2020 i le itula e 2:00 i le afiafi.